

ယောဟန်ပါးသို့ ဖွင့်ပြသော ဗျာဒိတ်တော် နိဒါန်း

ယောဟန်ပါးသို့ ဖွင့်ပြသော ဗျာဒိတ်တော်စာအုပ်သည် ဓမ္မသစ်ကျမ်းတွင် နောက်ဆုံးသော စာအုပ်တစ်အုပ်ဖြစ်၏။ ဤစာအုပ်သည် ခရစ်တော်မွီးဖွားပြီးနောက် ၉၅ ခုနှစ်ဝန်းကျင်တွင် တမန်တော် ယောဟန်က ရီးသားခခြင်းဖြစ်သည် (၁.၁)။ ယောဟန်သည်ကား ယောဟန်ပြုစုထားသော သတင်းကောင်းစာအုပ်နှင့် ယောဟန်ပီးစာ ပထမ၊ ဒုတိယနှင့် တတိယ စာအုပ်များကိုလည်း ရီးသားခသူဖြစ်၏။ ထိုယောဟန်ကို လူအများက “ယေသျှု၏ အချစ်ကို ခံရသောသူ” အဖြစ် သိကြသည် (ယော ၁၃.၂၃)။ သူသည် ဤစာအုပ်ကို ပတ်မူကျွန်း၌ ဟိနိန်စဉ် ရီးသားခခြင်းဖြစ်သည်။ ထိုကျွန်း၌ ဟိနိန်သည့်အကြောင်းမှာ သူသည် ယေသျှုခရစ်တော်၏ သတင်းကောင်းတရားကို ဟောပြောသောကြောင့် ထိုကျွန်းသို့ ပြည်နှင်ဒဏ်ခံရသောကြောင့် ဖြစ်၏ (၁.၉)။

ဤဗျာဒိတ်တော်စာအုပ်ကို ယောဟန်ရီးသားရသည့် ရည်ရွယ်ချက် မှာ စာ ဖတ် သော သူ ရှိ အား ယေ သျှု ခရစ်တော်၌ သစ္စာဟိစ္စာ ယုံကြည်ရန် အားပီးတိုက်တွန်း

ခြင်းနှင့် ယေသျှု ပြန်လည်ကြွလာမည့်အချိန်သည် နီးကပ်လာပြီ ဖြစ်ကြောင့် ထိုသူရို့အား မျှော်လင့်ခြင်းကို ပီးထားခြင်းပင် ဖြစ်၏ (၁.၃: ၂၂.၇)။ သူသည် ခရစ်ယာန်ဘာသာဝင်အားလုံးပါးသို့ ရီးသားခပြီး အခန်းကြီး ၂-၃ တွင် အသင်းတော် ခုနစ်ပါး ပါးသို့လည်း တိတိကျကျ ရီးသားခခြင်းဖြစ်၏။ ယောဟန်သည် မိမိ၏ စာအရီးအသား များကို ပရောဖက်ပြုထားသကဲ့သို့ ရီးသားထား (၁.၃) ပြီး သူမြင်သမျှသောအရာတို့ကို ဤစာအုပ်တွင် ဖော်ပြရာ၌ ပုံရိပ်များစွာကို အသုံးပြုထားသည်။ ဤစာအုပ်၏ အချို့သော အပိုင်းများမူကား ဓမ္မဟောင်းကျမ်းမှ အထူးသဖြင့် ဇာခရိ ၆.၁-၈ နှင့် အလားသဏ္ဌာန်တူညီနိုင်သည်။ တံပိုးခုနစ်လုံးနှင့် မီးခွက်ခုနစ်လုံး တိကလည်း အဲဂုတုတုပြည်ကို အပြစ်စီရင်ခြင်းငှာ ဘုရားသခင် စီရွတ်သော ဘေးဒဏ်ကြီးများနှင့် လွန်စွာ အလားသဏ္ဌာန်တူနိုင်၏ (ထွက်မြောက်ရာကျမ်း ၇-၉)။ ဗျာဒိတ်ကျမ်းတွင် အချိန်ကာလ၏ အဆုံးသတ်အကြောင်းကို ပြောပြထားပြီး ထိုအကြောင်းအရာသည်ကား ယေသျှုသည် အောင်နိုင်သောသူဖြစ်လာ၍ ထိုသူ၌ ယုံကြည်သောသူအားလုံးသည် ထိုသူနှင့်အတူ ထာဝရ အသက်ရှင်လိမ့်မည်။ ဤစာအုပ်သည်ကား ယေသျှုသည် မကြာမီပြန်လာမည့်အကြောင်းသင့်အဖို့ သတိပီးခြင်းနှင့် မျှော်လင့်ခြင်းကို ပီးပါစိသောဝံ။

အကြောင်းအရာ အကျဉ်းချုပ်

၁။ ယောဟန်က မိမိသည် အသူဖြစ်ကြောင်းနှင့် ဤပရောဖက်နှင့်ဆိုင်သော ရှုပါရုံကို သူသည် အပိုင်ရဟံကြောင်းကို ပြောကြားခြင်းဖြင့် အစပြုခြင်း (၁.၁—၁.၂၀)

၂။ သူသည် အသင်းတော်ခုနစ်ပါး ပါးသို့ ယေသျှုထံမှ တိုက်ရိုက်ရဟံသော သတင်းစကားတစ်ခုကို ပီးခြင်း (၁.၁—၃.၂၂)

၃။ ထို့နောက်တွင် သူသည် တံဆိပ်ခုနစ်မျိုးနှင့် တံပိုးခရာခုနစ်လုံးတို့ကို ဖော်ပြခြင်း (၄.၁—၁၁.၁၉)

၄။ ထိုအရာများကို ဖော်ပြပြီးနောက်၊ ဂေါင်းခုနစ်လုံးဟံသော နဂါးနှင့် သိုးသူငယ်၏ စစ်ပွဲကို ယောဟန် ဖော်ပြခြင်း (၁၂.၁—၁၄.၂၀)

၅။ ထို့နောက်၊ သူသည် အမျက်တော် ဖလားခွက်ခုနစ်လုံး အကြောင်းကို ရီးသားထားခြင်း (၁၅.၁—၁၆.၁၈)

၆။ ထို့အပြင်၊ ယောဟန်က ဘုရားသခင်သည် မိမိ၏ ရန်သူတို့ကို ကောင်းကင်ဘုံ၌ အပိုင် အောင်နိုင်ခကြောင်းကို ဖော်ပြခြင်း (၁၇.၁—၂၀.၁၅)

၇။ နောက်ဆုံး၊ အဆုံးသတ်ကာလ၌ ကောင်းကင်သစ်နှင့် မြီကြီးသစ် ဖြစ်ပေါ်လာမည့်အကြောင်းကို ယောဟန် ဖော်ပြခြင်း (၂၁.၁—၂၂.၂၁)

¹ ဤစာအုပ်သည် ယေသျှုခရစ်တော် ဖွင့်ပြတော်မူသည့်အကြောင်းကို မှတ်တမ်းတင်ထားသောစာအုပ်

ဖြစ်၏။ မကြာခင် ဖြစ်ပျက်ရမည့် အမှုအရာများကို မိမိ၏အခိုင်းအစီရိုအား သိစိခြင်းငှာ ဘုရားသခင် သည် ကိုယ်တော်အား ဤဗျာဒိတ်တော်ကို ပီးရခြင်း ဖြစ်ပေ၏။ ခရစ်တော်သည် မိမိ၏ အခိုင်းအစီဖြစ် သော ယောဟန်ပါးသို့ မိမိ၏ကောင်းကင်တမန်ကို စီ ရွတ်၍ ဤဗျာဒိတ်တော်ကို ဖွင့်ပြတော်မူ၏။

² ယောဟန်သည်လည်း ဘုရားသခင်၏ နှုတ်ကပတ် တော်နှင့် ယေသျှုခရစ်တော်၏ သက်သိခံတော်မူချက်တို့ ကို မိမိမြင်တို့ရသည်အတိုင်း သက်သိခံလေ၏။

³ ကာလအချိန် နီးကပ်ပြီဖြစ်၍ ဤ ပရောဖက်ပြု ဟောပြောထားသော စကားတို့ကို ဖတ်ရှုသောသူနှင့် ဤ စကားတို့ကို ကြား၍ လိုက်နာကျင့်သုံးသောသူရို့သည် မင်္ဂလာဟိကြ၏။

အသင်းတော် ခုနစ်ပါးသို့ နှုတ်ဆက်ခြင်း

⁴ ငါ ယောဟန်ပါးမှ၊

အာယုံပြည်၌ဟိသော အသင်းတော် ခုနစ်ပါးသို့ စာ ရီးလိုက်ပါ၏။

အတိတ်၊ ပစ္စုပ္ပန်၊ အနာဂတ်ကာလ၌ အစဉ် ဟိ တော်မူသော ဘုရားသခင်ထံတော်မှ လည်းကောင်း၊ ကိုယ်တော်၏ ပလ္လင်တော်ရှိ၌ ဟိသော ဝိညာဉ်ခုနစ် ပါးထံမှ လည်းကောင်း၊ ⁵ သစ္စာဟိသော သက်သိခံ၊ သိခြင်းမှ ဦးစွာပထမ ရှင်ပြန်ထမြောက်တော်မူသော၊

လောကီသျှင်ဘုရင်တို့ကို အစိုးရတော်မူသော ယေသျှု
ခရစ်တော်ထံပါးမှ လည်းကောင်း၊ ကျေးဇူးတော်နှင့်
ငြိမ်သက်ခြင်းသည် သင်ရှိ၌ ဟိပါစီသောဝ်။

ထိုသူသည် ငါရှိို့ကို ချစ်တော်မူ၍ မိမိ၏အသွီးတော်
အားဖြင့် ငါရှိို့၏ အပြစ်တရားမှ ငါရှိို့အား လွတ်မြောက်
စီတော်မူပြီးလျှင်၊

⁶ မိမိ၏ခမည်းတော် ဘုရားသခင်၏ အမှုတော်ကို
ဆောင်ရွက်နိုင်စီရန် ငါရှိို့အား နိုင်ငံတော်သားအရာ၌
လည်းကောင်း၊ ယဇ်ပုရောဟိတ်အရာ၌ လည်းကောင်း
ခန့်ထားတော်မူသော ယေသျှုခရစ်တော်သည် ကမ္ဘာ
အဆက်ဆက် ဘုန်းတန်ခိုး ကြီးတော်မူပါစီသတည်း။ အာ
မင်။

⁷ ကြည့်ရှုလော့။ ကိုယ်တော်သည် မိုးတိမ်စီး၍ ကြွလာ
တော်မူလိမ့်မည်။ ကိုယ်တော့်ကို လုံဖြင့် ထိုးခသော သူ
တိပါမကျန် လူအပေါင်းရှိသည် ကိုယ်တော့်ကို မြင်
ကြရလိမ့်မည်။ မြီကြီး၌ ဟိသော လူအပေါင်းရှိသည်
ကိုယ်တော်ကြောင့် ရင်စည်တီးလျက် ငိုကြွေးကြလိမ့်မည်။
ထိုသို့ ဖြစ်ပါစီသောဝ်၊ အာမင်။

⁸ အတိတ်၊ ပစ္စုပ္ပန်၊ အနာဂတ်ကာလ၌ ဟိတော်မူသော
အနန္တတန်ခိုးသျှင် ဘုရားသခင်က “ငါသည် အစနှင့်အဆုံး
ဖြစ်၏” ဟု မိန့်တော်မူ၏။

ရှုပါရုံအားဖြင့် ခရစ်တော်ကို မြင်ခြင်း

⁹ ငါ ယောဟန်သည်ကား သင်ရိုး၏ အစ်ကိုဖြစ်ပြီး ယေသျှု၏နောက်လိုက် တစ်ယောက်ဖြစ်သည့်နည်းတူ နိုင်ငံတော်နှင့် စပ်ဆိုင်သောကြောင့် ခံရသည့် ဒုက္ခဆင်းရဲကို သင်ရိုးနှင့်အတူ သည်းခံနိုင်ရသောသူလည်း ဖြစ်၏။ ငါသည် ဘုရားသခင်၏ နှုတ်ကပတ်တော်နှင့် ယေသျှု ဖော်ပြသော သမ္မတရားကို ဟောပြောကြေညာသည့်အတွက် ပတ်မူကျန်းသို့ အပို့ခံရ၏။

¹⁰ သခင်ဘုရား၏ နိတွင် ငါသည် ဝိညာဉ်တော်ကို ခံရ၍ တံပိုးခရာသံနှင့်တူသော အသံကြီး တစ်ခုကို ငါ့နောက်၌ ကြားရ၏။

¹¹ ထိုအသံက “သင် မြင်ရသည့်အရာကို စာစောင်တွင် ရီးသား၍ ဖောက်မြို့၊ စမုရနမြို့၊ ပေရဂုံမြို့၊ သွာတိရမြို့၊ သာဒိမြို့၊ ဖိလဒေလဖိမြို့၊ လောဒိကံမြို့များ၌ဟံသော အသင်းတော်ခုနစ်ပါးသို့ ပီးပို့လော့” ဟု ဆို၏။

¹² ထိုသို့ ငါ့အား ပြောနိုင်သောအသံသည် ဇာသူ၏အသံ ဖြစ်ပါသည်။ ဟု လှည့်၍ ငါ ကြည့်လိုက်သောအခါ ရှိမီးခွက်ခုနစ်လုံးကိုလည်းကောင်း၊

¹³ ထိုမီးခွက်တိအလယ်၌ လူသားနှင့်တူသော သူတစ်ဦး ကိုလည်းကောင်း ငါတို့ရ၏။ ထိုသူသည် ဝတ်ရုံကို ခြံဖျားတိုင်အောင် ခြုံ၍ ရှိရင်စည်းကို ဝတ်ဆင်ထား၏။

¹⁴ သူ၏ဆံပင်သည် မိုးပွင့်ကဲ့သို့ လည်းကောင်း၊ သိုးမီးကဲ့သို့ လည်းကောင်း ဖြူ၏။ သူ၏မျက်လုံးများသည်

လည်း မီးလျှံကဲ့သို့ တောက်ပလျက် နိန်၏။

¹⁵ သူ၏ခြံသည် မီးဖြင့် ချွတ်ထားသည့် တောက်ပသော ကြီးဝါနှင့် တူ၏။ သူ၏အသံမှာ ကြီးမားသော ရီတံခွန်၏ အသံနှင့် တူ၏။

¹⁶ သူ သည် လက်ယာလက် ဖြင့် ကြယ် ခုနစ် လုံး ကို ကိုင်ထား၏။ သူ၏ခံတွင်းမှ ပြတ်သောသန်လျက် ထွက် လာ၏။ သူ၏မျက်နှာ သည် လည်း တန်ခိုး နှင့် ထွန်းတောက်သည့် မွန်းတည့်နီ၏ အလင်းကဲ့သို့ ဖြစ်၏။

¹⁷ ထိုသူကို တို့သောအခါ ငါသည် သူ၏ခြံတော်ရင်း၌ လဲကျလားပြီး လူသီကဲ့သို့ ဖြစ်လေ၏။ ထိုသူသည် ငါ့ အထက်၌ လက်ယာလက်တော်ကို တင်တော်မူပြီးလျှင် “မ ကြောက်ကေ့၊ ငါသည် အစနှင့် အဆုံးဖြစ်၏။

¹⁸ ငါသည် အသက်ရှင်တော်မူသော သူဖြစ်၏။ ငါ သည် သီခသော်လည်း အဂ္ဂုတွင် ထာဝရအသက်ရှင် လျက် ဟိ၏။ ငါသည် သီခြင်းတရားနှင့် မရဏာနိုင်ငံကို အစိုးရ၏။

¹⁹ သင် မြင်တို့ရသည့် အမှုအရာများမှာ အဂ္ဂု ဖြစ်ပျက် နိန်သော အမှုအရာများနှင့် နောင်အခါ၌ ဖြစ်ပျက်မည့် အမှုအရာများသာ ဖြစ်၏။ ထိုအကြောင်းအရာများကို ရိုး ထားလော့။

²⁰ ငါ၏ လက်ယာလက်တော်တွင် သင် မြင်တို့ရသည့် ကြယ်ခုနစ်လုံးနှင့် ရွှံ့မီးခွက် ခုနစ်လုံး၏ လျှို့ဝှက်သည့် အနက်အဓိပ္ပာယ်မှာ မီးခွက် ခုနစ်လုံးသည် အသင်းတော်

ခုနစ်ပါး ဖြစ်၍၊ ကြယ်ခုနစ်လုံးသည် ထိုအသင်းတော် ခုနစ်ပါး၏ ကောင်းကင်တမန်တို့ ဖြစ်သတည်း” ဟု မိန့်တော်မူ၏။

2

ဖက်မြို့အသင်းတော်သို့ သတင်းစကား

¹ “ဧ ဖက် မြို့၌ ဟိ သော အသင်း တော်၏ ကောင်းကင်တမန်ပါးသို့ ဤသို့ စာရီးပီးလိုက်လော့။

“ဤ သတင်းစကား သည် ကြယ် ခုနစ် လုံး ကို လက်ယာလက်ဖြင့် ကိုင်ကာ ရွှံ့မီးခွက်ခုနစ်ခွက်အကြား တွင် လားလာနိုင်သော သူ၏ထံမှ ဖြစ်၏။

² သင်ပြုသော အမှုများကို ငါသိ၏။ ထိုအရာများ မှာ သင်သည် ဇာပိုင် ကြိုးပမ်းလုပ်ဆောင်ကြောင်း၊ ဇာမျှ လောက် သည်းခံကြောင်းကို ငါသိ၏။ သင်သည် ဆိုးညစ် သောသူရို့ကို သည်းမခံနိုင်ကြောင်း၊ တမန်တော် မဟုတ် ဘဲ မိမိကိုယ်ကိုမိမိ တမန်တော်ဟု ခေါ်ဆိုကြသော သူရို့ အား စစ်ဆီး၍ လှည့်ဖြားသောသူတို့ ဖြစ်ကြောင်းကို သိ ကြောင်းပင် ဖြစ်၏။

³ သင်သည် စိတ်ရှည်သည်းခံလျက် ငါ၏ နာမအတွက် များစွာဒုက္ခဆင်းရဲခံ၍ အားလျော့ခြင်း မဟိပေ။

⁴ သို့သော် သင်သည် အယင်ကကဲ့သို့ အဂုအခါ ငါ့ကို မ ချစ်သဖြင့် သင့်အား အပြစ် ဆိုစရာဟိ၏။

⁵ သို့ဖြစ်၍ သင်သည် ဇာမျှလောက် ကျဆင်းလာသည်ကို ဆင်ခြင်လော့။ နောင်တရ၍ အယင်က ပြုခသည့်အတိုင်း ပြုလော့။ သင်သည် နောင်တ မရလျှင် သင်ဟိရာသို့ ငါလာ၍ သင်၏မီးခွက်ကို နီရာမှ ငါ ရှို့ပစ်မည်။

⁶ သို့ရာတွင် နိကာလ၏တပည့်ရို့ကျင့်ကြံပုံကို ငါ မုန်းသကဲ့သို့ သင်သည်လည်း မုန်းသဖြင့် သင့်အား ချီးမွမ်းစရာဟိ၏။

⁷ “ဝိညာဉ်တော်သည် အသင်းတော်များအား မိန့်တော်မူသော စကားများကို ကြားတတ်သောနား ဟိသောသူသည်ကား ကြားပါစီ။

“ငါ သည် အောင်မြင် သော သူ အား ဘုရားသခင်၏ဥယျာဉ် တော်၌ ဟိ သော အသက်ပင်၏အသီးကို စားရသောအခွင့်ကို ပီးမည်။

စမုရနအသင်းတော်သို့ သတင်းစကား

⁸ “စမုရနအသင်းတော်၏ ကောင်းကင်တမန်ပါးသို့ ဤသို့ စာရီး၍ ပီးလိုက်လော့။

“ဤသတင်းစကားသည် အစနှင့် အဆုံးဖြစ်သောသူ၊ သီပြီးမှ အသက်ပြန်၍ ရှင်လာသောသူ၏ထံမှ ဖြစ်၏။

⁹ သင်သည် ဒုက္ခဆင်းရဲခံရ၍ ဒုက္ခရောက်သည်ကို ငါ သိ၏ — သို့ရာတွင် အမှန်စင်စစ် သင်သည် ကြွယ်ဝသူ ဖြစ်၏။ မိမိရို့ကိုယ်ကို ယုဒလူမျိုးတိဟု ဆိုကြသောသူ ရို့သည် သင့်အား ကဲ့ရဲ့သည့် စကားများအားဖြင့် ပြောဆို

ကြကြောင်းကို ငါသိ၏။ သို့ရာတွင် သူ့ရို့သည် ယုဒလူမျိုးတို့ မဟုတ်၊ စာတန်မာရ်နတ်၏ အဖွဲ့ဝင်များဖြစ်ကြ၏။

10 သင်ခံရမည့် ဆင်းရဲဒုက္ခများအတွက် မစိုးရိမ်ကေ့။ မာရ်နတ်သည် သင်ရို့ထဲမှ တချို့ကို ထောင်ထဲ၌ အကျဉ်းချထားခြင်းအားဖြင့် စစ်ဆီးလိမ့်မည်။ သင်သည် ဆယ်ရက်တိုင်တိုင် ဒုက္ခခံရလိမ့်မည်။ သိဆုံးသည်ထိ တိုင်အောင် သစ္စာစောင့်လော့၊ သို့မှသာ သင့်အား အသက်သရဖူကို ငါပီးမည်။

11 “အသင်းတော်များအား ဝိညာဉ်တော်မိန့်တော်မူသော စကားများကို ကြားတတ်သော နားဟိသောသူရို့ ကြားကတ်စီ။

“အောင်မြင်သော သူသည် ဒုတိယ သီ ခြင်း ဘေးနှင့် ကင်းလွတ်လိမ့်မည်။

ပေရုမြို့အသင်းတော်သို့ သတင်းစကား

12 “ပေရုမြို့အသင်းတော်၏ ကောင်းကင်တမန်ပါးသို့ ဤသို့ စာရီးလိုက်လော့။

“ဤသတင်းစကားသည် အသွားနှစ်ဖက်ဟိသည့် ပြတ်သောသန်လျက်ကို ဆောင်ထားသော သူထံမှ ဖြစ်၏။

13 သင်သည် ဇာအရပ်၌ နီထိုင်သည်ကို ငါသိ၏။ သင်သည် စာတန်၏ ပလ္လင်ဟိရာအရပ်တွင် နီထိုင်၏။ ငါ့ဖက်၌ သစ္စာဟိစွာ သက်သီခံသောသူ အနုတိပသည် စာတန်မာရ်နတ် နီထိုင်ရာတွင် အသတ်ခံရသော

အချိန်၌ပင် သင်သည် ငါ၌ သစ္စာစောင့်၍ သင်၏ယုံကြည်ခြင်းကို မစွန့်။

¹⁴ သို့ရာတွင် သင်ရို့အထဲတွင် ဗာလမ၏အယူဝါဒကို လိုက်လျှောက်သောသူများ ဟိနန်သဖြင့် သင့်အား အပြစ်ဆိုစရာ အနည်းချေဟိ၏။ ဣသရေလလူမျိုးရို့သည် ရုပ်တုအား ပူဇော်သော အစားအစာများကို စားကြစီရန်နှင့် မတရားသောမေထုန်ကို လိုက်စားကြစီရန် ဗာလမသည် ဗာလက်မင်းအား သင်ကြားပီးခ၏။

¹⁵ ထိုနည်းတူစွာ သင်ရို့အထဲတွင်လည်း နိကောလ၏တပည့်တိ သင်ကြားပို့ချသည့် အယူဝါဒများကို လိုက်လျှောက်နိန်သူများ ဟိပေ၏။

¹⁶ ထို့ကြောင့် နောင်တရလော့။ နောင်တ မရလျှင် မကြာခင် ငါလာ၍ ထိုသူရို့အား ငါ၏ ခံတွင်းမှ ထွက်သော သန်လျက်နှင့် တိုက်ခိုက်မည်။

¹⁷ “ဝိညာဉ်တော်က အသင်းတော်ရို့အား မိန့်တော်မူသော စကားများကို ကြားတတ်သောနား ဟိသောသူရို့ ကြားပါစီ။

“အောင်မြင်သောသူအား ဝှက်ထားသောမနုဉ်းကို ငါပီးမည်။ ကျောက်ဖြူတစ်လုံးကိုလည်း ငါပီးမည်။ ထိုကျောက်ဖြူအထက်တွင် အကွေ့ရာတင်ထားသည့် နာမည်သစ်ကို ဇာသူမျှ မသိနိုင်ရာ။ ထိုကျောက်ကို ခံယူရဟိ သူသာလျှင် သိဟိနိုင်ပေ၏။

သွာတိရမြို့အသင်းတော်သို့ သတင်းစကား

18 “သွာတိရမြို့အသင်းတော်၏ ကောင်းကင်တမန်ပါး သို့ ဤသို့ စာရီးလိုက်လော့။

“ဤသတင်းစကားသည် ဘုရားသခင်၏ သားတော် ထံမှ ဖြစ်၏။ ထိုအချင်း၏ မျက်စိများသည် မီးလျှံ ကဲ့သို့ တောက်ပလျက်၊ ခြံတော်သည်လည်း တောက် ပြောင်သော ကြီးဝါကဲ့သို့ ဖြစ်၏။

19 ငါသည် သင်ပြုသောအမှုကို သိ၏။ သင်၏ မေတ္တာ နှင့် သစ္စာဟိမ္မကိုလည်းကောင်း၊ သင်၏ အမှုတော်ဆောင် ခြင်းနှင့် သည်းခံခြင်းကိုလည်းကောင်း ငါသိ၏။ သင် သည် အယင်က လုပ်ဆောင်ခဲ့သည်ထက် အဂ္ဂ သာ၍ လုပ်ဆောင်ကြောင်းကိုလည်း ငါ သိ၏။

20 သို့သော် သင့်အား အပြစ်တင်စရာဟိသည်မှာ ယေ ဇဗေလဟုခေါ်သော မိန်းမကို သင်သည် လက်ခံထားခြင်း ပင် ဖြစ်၏။ ထိုမိန်းမသည် မိမိကိုယ်ကို ပရောဖက်မတစ် ယောက် ဖြစ်သည်ဟု ဆို၏။ ထိုမိန်းမသည် ငါ၏ အစီခံ ရှိအား မတရားသောမေထုန် လိုက်စားစီရန်နှင့် ရုပ်တုတိ အား ပူဇော်သည့်အစားအစာများကို စားစီရန် သွန်သင် သဖြင့် လမ်းလွဲစီလေ၏။

21 ငါသည် ထိုမိန်းမအား မိမိ၏ ကာမဂုဏ်အပြစ်မှ နောင်တရစီခြင်းငှာ အချိန်ပီးခဲ့ယာ။ သို့ရာတွင် သူမသည် မိမိ၏အကျင့်ပျက်မှုမှ နောင်တရလိုစိတ်မဟိ။

22 ယင်းကြောင့် ငါသည် သူမအား အိပ်ရာ၌ ပစ်ထား

မည်။ သူမနှင့် ဖောက်ပြန်သော သူရို့၌လည်း မိမိရို့ပြုသောအမှုမှ နောင်တမရပါက ပြင်းစွာသော ဒုက္ခဝေဒနာကို ခံရစီမည်။

23 ငါသည် သူမ၏ နောက်လိုက်ရို့ကို သီမင်းလက်သို့ အပ်မည်။ ထိုအခါ၌ ငါသည် လူရို့၏စိတ်နှလုံးနှင့် အကြံအစည်တို့ကို သိမြင်တော်မူသောသူ ဖြစ်ကြောင်း အသင်းတော်အပေါင်းရို့သည် သိကြလိမ့်မည်။ သင်ရို့အသီးသီး၏အကျင့်အတိုင်း အကျိုးအပြစ်ကို ငါပီးမည်။

24 “သို့ရာတွင် အခြားသော သွာတိရမြို့ ယုံကြည်သူရို့သည်ကား ဤဆိုးညစ်သည့် အယူဝါဒကို မလိုက်နာကြ။ ‘စာတန်မာန်နတ်၏ နက်နဲသည့် လျှို့ဝှက်ချက်များ’ ဟု သူရို့ ခေါ်ဆိုကြသည့် အရာများကိုလည်း မခံမယူကြ။ သင်ရို့ အထက်၌ အခြားဝန်ထုပ်ဝန်ပိုး တစ်စုံတစ်ခုကိုမျှ ငါမတင်။

25 သင်ရို့သည် မိမိရို့၌ ဟိသည့်အရာကို ငါလာသည်တိုင်အောင် စွဲမြဲစွာကိုင် ထားကြလော့။

26 အကြင်သူသည် အောင်မြင်၍ အဆုံးတိုင်အောင် ငါ၏အမှုကို စောင့်ထိန်း၏။ ငါ့ခမည်းတော်သည် ငါ့အား အခွင့် ပီးတော်မူသကဲ့သို့၊ လူမျိုးတို့ကို အုပ်စိုးစီခြင်းငှာ ထိုသူအား ငါသည် အခွင့်ပီးမည်။

27 ထိုသူသည် သူရို့ကို သံလှံတံနှင့် အုပ်စိုး၍၊ မြီအိုးကို အစိတ်စိတ်အမြွှာမြွှာ ရိုက်ခွဲသကဲ့သို့ ရိုက်ခွဲလိမ့်မည်။

28 မိုးသောက်ကြယ်ကိုလည်း ထိုသူအား ငါ ပီးမည်။

29 “အသင်းတော်ရှိအား ဝိညာဉ်တော်မိန့်တော်မူသော စကားများကို ကြားတတ်သော နားဟိသောသူရှိ ကြားပါစီ။

3

သာဒိမြို့အသင်းတော်သို့ သတင်းစကား

1 “သာဒိမြို့အသင်းတော်၏ ကောင်းကင်တမန်ပါးသို့ ဤသို့ စာရီးပီးလိုက်လော့။

“ဤသတင်းစကားသည် ဘုရားသခင်၏ ဝိညာဉ်ခုနစ်ပါးနှင့် ကြယ်ခုနစ်လုံးဟိသော သူထံမှ ဖြစ်၏။ သင်ပြုသောအမှုကို ငါသိ၏။ သင်သည် အသက်ရှင်ဟန် ဟိသော်လည်း သီလျက်နိန်၏။

2 သို့ဖြစ်၍ နိုးထလော့။ သင်၏ အသက်မချုပ်ငြိမ်းသိမ့်ခင် ကျန် ဟိ နိန် သိမ့်သော အရာ ကို ပြုစုလော့။ သင်၏အပြုအမူသည် ငါ၏ဘုရားသခင်ရှ်တော်၌ ပြည့်စုံခြင်း မဟိသိမ့်သည်ကို ငါတို့ရ၏။

3 ထို့ကြောင့် သင်သည် ကြားနာသမျှ၊ ခံယူထားသမျှ တရားကို အောက်မွဲသတိရလျက် နာခံလိုက်လျှောက်လော၊ နောင်တရလော့။ သင်သည် မနိုးထလျှင် သူခိုးလာသကဲ့သို့ ငါသည် သင့်ပါးသို့ လာမည်။ ငါလာမည့်အချိန်ကို သင် သိရလိမ့်မည် မဟုတ်။

4 သို့ရာတွင် သာဒိမြို့၌ မိမိရှိအဝတ်ကို အညစ်အကြေးနှင့် ကင်းစင်စီသောလူ အနည်းချေဟိသိမ့်၏။ ထိုသူရှိ

သည် ထိုက်တန်သူများ ဖြစ်သဖြင့် ဝတ်ဖြူစင်ကြယ်ကို ဝတ်၍ ငါနှင့်အတူ လားလာရကြလိမ့်မည်။

⁵ အောင်မြင်သော သူရို့သည် ဝတ်ဖြူစင်ကြယ်ကို ဝတ်ရလိမ့်မည်။ ငါသည် သူရို့၏နာမည်ကို အသက် စာစောင်မှ ဖျက်ပယ်မည် မဟုတ်။ ငါသည် သူရို့နာမည် ကို ငါ၏ခမည်းတော်နှင့် ကိုယ်တော်၏ ကောင်းကင်တမန် တို့ရှို့တွင် ထုတ်ဖော်ဝန်ခံမည်။

⁶ “ဝိညာဉ်တော်သည် အသင်းတော်များအား မိန့်တော်မူ သမျှသောစကားများကို ကြားတတ်သော နားဟိသောသူ ရို့သည် ကြားကတ်စီ။

ဖိလဒေလဖိမြို့ အသင်းတော်အတွက် သတင်းစကား

⁷ “ဖိလဒေလဖိမြို့ အသင်းတော်၏ ကောင်းကင်တမန် သို့ ဤသို့ စာရီးပီးလိုက်လော့။

“ဤ သတင်းစကား သည် မြင့်မြတ် သ န် ယှ င်း ပြီး ဖြောင့်မှန်သောသူထံပါးမှ ဖြစ်၏။ ကိုယ်တော်သည် ဒါဝိဒ်မင်း၏ တန်းခါးသော့ကို ပိုင်တော်မူ၏။ ထိုတန်းခါးကို ကိုယ်တော်ဖွင့်တော်မူသောအခါ ဇာသူမျှ မပိတ်နိုင်ပေ။ ပိတ်တော်မူသောအခါလည်း ဇာသူမျှ မဖွင့်နိုင်ပေ။

⁸ သင် ပြုသည့်အမှုကို ငါသိ၏။ သင်သည် ခွန်အား အနည်းချောသာ ဟိသော်လည်း ငါ့နာမကို မငြင်းပယ်ဘဲ ငါ့ဩဝါဒကို လိုက်နာစောင့်ထိန်းခကြောင်းကို ငါသိ၏။

သင်ရို့အတွက် တန်းခါးကို ငါဖွင့်ထားယာ။ ထိုတန်းခါးကို
အသူမျှ မပိတ်နိုင်ပေ။

⁹ နားထောင်လော့။ ကိုယ်တိုင် ယုဒလူမျိုး မဟုတ်
ဘဲ ယုဒလူမျိုး ဖြစ်သည်ဟု လိမ်လည်ပြောဆိုနိုင်သော
သူတည်းဟူသော စာတန်မာရ်နတ်၏ အဖွဲ့ဝင်ရို့ အား
သင်၏ခြံရံသို့ လာရောက်ပျပ်ဝပ်စီမည်။ သင့်အား ငါ
ချစ်ကြောင်းကို သူရို့ သိကြလိမ့်မည်။

¹⁰ သင်သည် ငါမှားထားသည့်အတိုင်း စိတ်ရှည်သည်းခံ
လျက် နိန့်ခဲ၏။ သို့ဖြစ်၍ လောကတစ်ခုလုံးကို စစ်ဆီးရန်
ဒုက္ခဆင်းရဲ ကျရောက်လာချိန်၌ သင့်အား ငါ ကာကွယ်
စောင့်ရှောက်မည်။

¹¹ ငါသည် မကြာခင် ကြွလာမည်။ သင်၏ ဆုသရဖူကို
အသူမျှ မလုမယူနိုင်စီခြင်းငှာ သင် ရဟိထားသောအရာ
ကို စွဲကိုင်လော့။

¹² အောင်မြင်သော သူကို ငါ၏ဘုရားသခင်ဗိမာန်တော်
တွင် တိုင်ဖြစ်စီမည်။ ထိုသူရို့သည် နောင်အခါမျှ ဗိမာန်
တော်အပြင်သို့ မရောက်ရ။ ငါ၏ဘုရားသခင်ထံတော်
မှ ထွက်၍ ကောင်းကင်ဘုံမှ ဆင်းသက်လာသော ယေရု
ဆလင်မြို့သစ်တည်းဟူသော ငါ့ဘုရားသခင်၏ မြို့တော်
နာမကိုလည်းကောင်း၊ ငါ၏ဘုရားသခင် နာမတော်ကို
လည်းကောင်း ငါသည် ထိုသူ၌ ကမ္ပပည်းရီးထိုးမည်။
ငါ၏အသစ်သော နာမတော်ကိုလည်း ထိုသူ၌ ငါရီးထိုး

မည်။

13 “ဝိညာဉ်တော်သည် အသင်းတော်များအား မိန့်တော်မူသော စကားများကို ကြားတတ်သောနားဟံသောသူရို့ ကြားပါစီ။

လောဒိကိအသင်းတော်အတွက် သတင်းစကား

14 “လောဒိကိအသင်းတော်၏ ကောင်းကင်တမန်ပါးသို့ ဤသို့ စာရီးပီးလိုက်လော့။

“ဤသတင်းစကားသည် ဘုရားသခင်ဖန်ဆင်းတော်မူသော အရာအပေါင်းရို့၏ အစမူလ *ဖြစ်တော်မူသော၊ သစ္စာဟံ၍ ဖြောင့်မှန်သော သက်သီခံ ဖြစ်တော်မူသော အာမင်၏ ထံပါးမှ ဖြစ်၏။

15 သင် ပြုခသည့်အမှုကို ငါသိ၏။ သင်သည် အပူလည်း မဟုတ်၊ အအီးလည်း မဟုတ်သည်ကို ငါသိ၏။ သင်သည် အပူဖြစ်စီ၊ အအီးဖြစ်စီ တစ်ခုခုဖြစ်ရန် ငါအလိုဟံ၏။

16 သို့ရာတွင် သင်သည် မပူမအီးဘဲ နွီးရုံမျှသာ ဟိသဖြင့် သင့်အား ငါ၏ခံတွင်းမှ ထိုးထုတ်မည်။

17 ‘ငါသည် ချမ်းသာကြွယ်ဝ၏။ ငါလိုသမျှအားလုံး ငါ၌ ဟိ၏’ ဟု သင်ဆို၏။ သို့ရာတွင် မိမိ၌ ဇာလောက် အတိဒုက္ခဖြစ်ခြင်း၊ သနားစရာကောင်းခြင်း၊ ဆင်းရဲခြင်း၊ မျက်စိကန်းခြင်း၊ အဝတ်အချည်းစည်း ဖြစ်ခြင်း ဟိန်နိသည်ကို သင်သည် မသိပါတကား။

* 3:14 အစမူလ၊ သို့မဟုတ် အုပ်ချုပ်သူ။

18 သို့ဖြစ်၍ သင်သည် ချမ်းသာကြွယ်ဝခြင်းငှာ ရှိစင်ကို ငါ့ထံမှ ဝယ်ယူရန် ငါအကြံပီး၏။ ထို့အပြင် သင်၏ ရှက်စရာကောင်းသော အဝတ်ဗလာဖြစ်မှုကို ဝတ်ဖြူစင်ကြယ်ကိုလည်းကောင်း၊ မျက်စိအလင်းရစီရန် မျက်စဉ်းခတ်ဆီးကိုလည်းကောင်း ငါ့ထံမှ ဝယ်ယူလော့။

19 ငါသည် ငါချစ်သော သူအပေါင်းရဲ့အား ဆုံးမ၍ အပြစ်ဒဏ်ပီးတတ်၏။ ထို့ကြောင့် စိတ်အားထက်သန်မှု ဟိလော့။ နောင်တ ရလော့။

20 နားထောင်လော့။ ငါသည် တန်းခါးရဲ့တွင် ရပ်၍ တန်းခါးခေါက်လျက် နိန်၏။ ငါ၏အသံကို ကြား၍ တန်းခါးကို ဖွင့်၏။ ထိုသူ၏ အိမ်သို့ ငါဝင်ပြီးလျှင် သူနှင့်အတူ စားသောက်မည်။ သူသည်လည်း ငါနှင့်အတူ စားသောက် ရလိမ့်မည်။

21 ငါသည် အောင်မြင်၍ ငါ့ခမည်းတော်၏ ပလ္လင်ထက်တွင် ခမည်းတော်နှင့်အတူ ထိုင်နိန်သကဲ့သို့ အောင်မြင်သောသူအား ငါ၏ ပလ္လင်ထက်တွင် ငါနှင့်အတူ ထိုင်ရသောအခွင့်ကို ငါပီးမည်။

22 “အသင်းတော်ရဲ့အား ဝိညာဉ်တော် မိန့်တော်မူသော စကားများကို ကြားတတ်သော နားဟိသောသူရဲ့ ကြားပါစီ။”

4

ကောင်းကင်ဘုံ၌ ကိုးကွယ်ဝတ်ပြုခြင်း

1 ထို့နောက် ငါကြည့်လျှင်၊ ကောင်းကင်တန်းခါးပွင့်လျက် ဟိသည်ကို ငါမြင်ရ၏။

အယင်ဦးစွာ ငါကြားရသော တံပိုးခရာသံနှင့် တူသည့် အသံကား၊ “ဤအရပ်သို့ တက်လာလော့။ နောင်အခါ၌ ဖြစ်လာမည့် အမှုအရာတို့ကို ငါပြမည်” ဟု ငါ့အား ဆို၏။

2 ထိုအခါ ငါ့ထံ၌ ဝိညာဉ်တော်သည် ချက်ချင်း သက်ရောက် လေ၏။ ကောင်းကင်ဘုံ၌ ပလ္လင် တစ်ခု ဟိ၏။ ထိုပလ္လင်ထက်တွင် ထိုင်နိန့်တော်မူသော သူလည်း ဟိ၏။

3 ထိုသူ၏ မျက်နှာတော်သည် နဂါးသွဲ့ကျောက်၊ ပတ္တမြား ကျောက် ကဲ့သို့ တောက်ပ၏။ ပလ္လင်၏ ပတ်လည်တွင် မြရောင်တောက်နိန့်သော သက်တန့်သည် တည်လျက်ဟိ၏။

4 ထိုပလ္လင်၏ ပတ်လည်တွင် အခြားပလ္လင်နှစ်ဆယ့် လေးခုကိုလည်း ငါတို့မြင်ရ၏။ ထိုပလ္လင်တို့ထက်တွင် အသက်ကြီးသူ နှစ်ဆယ့်လေးပါးရှိသည် ထိုင်လျက် နိန့်ကြ၏။ သူရှိသည် ဝတ်ဖြူစင်ကြယ်များကို ဝတ်လျက် ရွှံ့သရဖူများကို ဆင်ယင်ထားကြ၏။

5 ပလ္လင်တော် ထဲမှ လျှပ်စစ်လက်သည့် အရောင်များ၊ မြည်ဟီးသော အသံများနှင့် မိုးကြိုးခြိမ်းသံများ ထွက်ပေါ်လာ၏။ ပလ္လင်တော်၏ ရှိတွင် ဘုရားသခင်၏ ဝိညာဉ် ခုနစ်ပါး တည်း ဟူသော မီးတိုင် ခုနစ်တိုင် သည်

ထွန်းလင်းလျက် ဟိ၏။

⁶ ပလ္လင် တော်၏ရှိ၊ တွင် သလင်း ကျောက် ကဲ့သို့ ကြည်လင်သော ဖန်ရီကန်ဟု ထင်ရသော ကန်ဟိ၏။

ထို့ပြင် ပလ္လင် တော်၏ပတ်လည် တစ်ဖက်တစ်ချက် တွင် သက်ဟိသတ္တဝါ လေးပါးဟိ၏။ သူရို့ကိုယ် ခနုဓာ ရှိပိုင်းနှင့် နောက်ပိုင်းတွင် မျက်စိများဖြင့် ပြည့်နှက်လျက် ဟိ၏။

⁷ ပထမသတ္တဝါသည် ခြင်္သေ့နှင့် တူ၏။ ဒုတိယသတ္တဝါ သည် နွားပေါက် ချေ နှင့် တူ၏။ တတိယ သတ္တဝါ၏ မျက်နှာသည် လူမျက်နှာနှင့် တူ၏။ စတုတ္ထသတ္တဝါသည် ပျံလျက်နိန်သော လင်းယုန်နှင့် တူ၏။

⁸ ထိုသတ္တဝါ လေးပါးစလုံးတွင် အတောင်ခြောက်ခုစီ ဟိကြ၏။ သူရို့၏ကိုယ် အတွင်းအပြင်၌ မျက်စိများနှင့် ပြည့်နှက်လျက် ဟိကြ၏။ သူရို့သည် နိနှင့်ညပါ မနားဘဲ၊ “အနန္တတန်ခိုးသျှင် ဘုရားသခင်သည် သန့်ယှင်းတော် မူ၏။

သန့်ယှင်းတော်မူ၏၊ သန့်ယှင်းတော်မူ၏။

ကိုယ်တော်သည် အတိတ်၊ ပစ္စုပ္ပန်၊ အနာဂတ် ကာလ အစဉ် ဟိနိန်တော်မူ၏”

ဟု မြက်ဆိုကြ၏။

⁹ ပလ္လင် ထက် တွင် စံတော် မူ၍ ကမ္ဘာ အဆက်ဆက် အသက်ရှင်တော်မူသော အသျှင်၏ကျေးဇူးတော်၊ ဂုဏ် တော်၊ ဘုန်းတန်ခိုး တော် များ ကို ထို သတ္တဝါ ရို့ သည်

ချီးမွမ်းကြသည့်အခါတိုင်း၊

10 အကြီးအကဲ နှစ်ဆယ့်လေးပါးရှိသည် ပလ္လင်ထက်
တွင် စံတော်မူလျက် ကမ္ဘာအဆက်ဆက်အသက် ရှင်တော်
မူသော အသျှင်၏ရှို်တော်၌ ပျပ်ဝပ်လျက် ကိုးကွယ်
ကြကုန်၏။ သူရှိသည် ပလ္လင်တော်ရှိတွင် မိမိရှိ၏ သရဖူ
များကို ချလျက်၊

11 “အကျွန်ရှိ၏အသျှင် ဘုရားသခင်၊

ကိုယ်တော်သည် ခပ်သိမ်းသောအရာတိကို ဖန်ဆင်း
တော်မူ၏။

ထို အရာ ခပ်သိမ်း ရှိသည် ကိုယ်တော်၏ အလိုတော်
အားဖြင့် ဖန်ဆင်းခြင်းကို ခံရပြီး တည်ဟံကြ
ပါ၏။

ထို့ကြောင့် ကိုယ်တော်သည် ဘုန်းတော်၊

ဂုဏ်တော်၊ တန်ခိုးတော်တိကို ခံယူထိုက်တော်မူပါ၏”
ဟု မြက်ဆိုကြ၏။

5

စာလိပ်နှင့် သိုးသူငယ်

1 ပလ္လင်တော်ထက်တွင် စံတော်မူသော အသျှင်၏
လက်ယာလက်တော်တွင် စာလိပ်တစ်လိပ်ကို ငါမြင်၏။
ထို စာလိပ်သည် စာမျက်နှာ နှစ်ဖက်လုံး၌ စာများ ရီး
သားထားပြီး တံဆိပ်ခုနစ်ခုဖြင့် ခတ်နှိပ်ထား၏။

2 ထို့နောက် ခွန်အား ကြီးသော ကောင်းကင်တမန်
တစ်ပါးက “ဇာသူသည် တံဆိပ်များကို ခွာ၍ ဤစာလိပ်

ကို ဖွင့်နိုင်ပါမည်နည်း” ဟု အသံကျယ်စွာ ကြွေးကြော်နိုင်သည်ကို ငါမြင်၏။

³ သို့ရာတွင် ကောင်းကင်၊ မြီကြီး၊ မြီကြီးအောက်၌* ထိုစာလိပ်ကို ဖွင့်နိုင်သောသူ၊ ဖတ်နိုင်သောသူ တစ်ယောက်မျှမဟိ။

⁴ ဤစာလိပ်ကို ဖွင့်ထိုက်သောသူ၊ ကြည့်ထိုက်သောသူ တစ်ယောက်မျှ ရှာ၍ မတွေ့ရသဖြင့် ငါသည် လွန်စွာ ငိုကြွေး၏။

⁵ ထိုအခါ အကြီးအကဲတစ်ပါးက ငါ့ကို “မငို ကေ။ ကြည့်ရှု လော့။ ယုဒအနွယ်ဝင် ခြင်္သေ့တည်း ဟူသော ဒါဝိဒ်မှ ဆင်းသက်သော သူသည် အောင်မြင်ယာ။ ထိုသူသည် တံဆိပ်ခုနစ်ခုနှင့် ဤစာလိပ်ကို ဖွင့်ထိုက်တော်မူ၏” ဟု ပြောလေ၏။

⁶ ထို့နောက် သိုးသူငယ်သည် သက်ဟိသတ္တဝါလေးပါး ရှိနှင့် အကြီးအကဲရှိ ဝန်းရံလျက်ဟိသည့် ပလ္လင်တော် အလယ်၌ ရပ်လျက် နိန်သည်ကို ငါမြင်၏။ သူသည် ယဇ်ပူဇော်ခြင်းငှာ သတ်ရန်ထားသည့် သိုးနှင့်တူ၏။ ထိုသူ၌ ဦးပြိုခုနစ်ချောင်းနှင့် မျက်စိခုနစ်လုံး ဟိ၏။ ထိုအရာများသည် မြီကြီးတစ်ပြင်လုံးသို့ ဘုရားသခင် စီရင်တော်မူသော ဝိညာဉ်ခုနစ်ပါး ဖြစ်၏။

⁷ ထိုသိုးသူငယ်သည် လာ၍ ပလ္လင်ထက်တွင် ထိုင်လျက် နိန်သော အသျှင်၏လက်ယာလက်တော်မှ စာလိပ်

* 5:3 မြီကြီးအောက်၊ မရဏာနိုင်ငံ သို့မဟုတ် အသိကောင်ရှိ၏ ကမ္ဘာ (ရှု ၁.၁၈)။

ကို ယူ၏။

8 ထိုသို့ ယူလိုက်သောအခါ သတ္တဝါလေးပါးနှင့် အကြီးအကဲနှစ်ဆယ့်လေးပါးရှိသည် သိုးသူငယ်တော်၏ ရှို့တော်၌ ပျပ်ဝပ်လျက် နိန်ကြ၏။ ထိုသူအသီးသီးရှိသည် စောင်းများကိုလည်းကောင်း၊ ဘုရားသခင် လူစုတော်၏ ဆုတောင်းပတုထနာတည်းဟူသော နံ့သာပေါင်းနှင့် ပြည့်လျက် ဟိသည့် ရွှံ့ဖလားများကိုလည်းကောင်း တစ်ခုစီ ကိုင်ဆောင်လျက် ဟိကြ၏။

9 ထို့နောက် သူရို့က၊

“ကိုယ်တော်သျှင်သည် ဤစာလိပ်တော်ကို ယူ၍၊

ခြံပ်တံဆိပ်များကို ဖွင့်ထိုက်သောသူ ဖြစ်ပါ၏။

အကြောင်းမူကား ကိုယ်တော်သျှင်သည် အသိသတ်ခြင်းကို ခံတော်မူသောအားဖြင့်၊

ခပ်သိမ်းသော မျိုးနွယ်စုနှင့် ဘာသာစကားအမျိုးမျိုး၊ ခပ်သိမ်းသော လူမျိုးနှင့် တိုင်းနိုင်ငံအသီးသီးထဲမှ လူတို့ကို ဘုရားသခင်အဖို့ ရွီးနှုတ်တော်မူပါ၏။

10 ကိုယ်တော်သည် သူရို့အား အကျွန်ရို့ဘုရားသခင်၏ အမှုတော်ကို အစီအစဉ်ကြစီရန် နိုင်ငံတော်၏ ယဇ်ပုရောဟိတ်အရာကို ပီးအပ်တော်မူပြီး၊ ကမ္ဘာမြေကြီးတွင်လည်း စိုးစံရသောအခွင့်ကို ရဟိကြလိမ့်မည်”

ဟု သီချင်းသစ်ကို သီဆိုကြ၏။

¹¹ တဖန် ငါ ကြည့်လိုက်သောအခါ ပလ္လင်တော်၌ လည်းကောင်း၊ သတ္တဝါလေးပါးနှင့် အကြီးအကဲရို့၏ ပတ်လည်၌ လည်းကောင်း ရပ်နိန်သော ကောင်းကင်တမန် ရို့၏ အသံကို ကြားရ၏။ ထိုကောင်းကင်တမန်ရို့၏ အရံ အတွက်ကား ကုဋေသင်္ချေမက အတိုင်းမသိ များပြား၏။

¹² သူရို့က၊

“အသီသတ်ခြင်းကို ခံရသော သိုးသူငယ်တော်သည် တန်ခိုး၊ စည်းစိမ်၊ ဉာဏ်ပညာ၊ ခွန်အား၊ ဂုဏ်ပြုခြင်း၊ ဘုန်းကြီးခြင်း၊

ချီးမွမ်းခြင်းများကို ခံထိုက်တော်မူပါ၏” ဟု ကျယ်သော အသံဖြင့် မြွက်ဆိုကြ၏။

¹³ ထို့ပြင် ကောင်းကင်၊ မြီကြီးအထက်၊ မြီကြီးအောက်၊ ပင်လယ်အရပ်ရပ်၌ ဟိသမျှသော သတ္တဝါအပေါင်းရို့က၊

“ပလ္လင် ထက် တွင် ထိုင် နိန်တော် မူသော သူနှင့် သိုး သူငယ်တော်သည်

ကမ္ဘာ အဆက်ဆက် ချီးမွမ်း ခြင်း ကို ခံ ရ ပါ စီ သတည်း။

ဂုဏ်ပြုခြင်း၊ ဘုန်းကြီးခြင်း၊ တန်ခိုးကြီးခြင်းများဖြင့် ပြည့်စုံတော်မူပါစီသတည်း” ဟု ကြွေးကြော်ကြ သည်ကို ငါကြားရ၏။

¹⁴ ထိုအခါ သတ္တဝါလေးပါး ရို့က “အာမင်” ဟု မြွတ်ဆိုကြ၏။ အကြီးအကဲရို့သည်လည်း ပျပ်ဝပ်လျက်

ကိုးကွယ်ကြ၏။

6

တံဆိပ်များ

¹ ထို့နောက် သိုးသူငယ်တော်သည် တံဆိပ်ခုနစ်ခုအနက် ပထမ တံဆိပ် အား ဖွင့်သည်ကို ငါ မြင်၏။ သက်ဟိ သတ္တဝါလေးပါးအနက် တစ်ပါးသည် မိုးကြိုးခြိမ်းသံနှင့် တူသော အသံဖြင့် “လာလော့” ဟု ဆိုသည်ကို ငါ ကြားရ၏။

² ငါ ကြည့်လိုက်သောအခါ မြင်းဖြူတစ်ကောင်ကို တွေ့ရ၏။ မြင်းစီးသူသည် လေးကို ကိုင်ထား၏။ သူသည် သရဖူတစ်ခုကို ပီးအပ်ခြင်း ခံထားရ၏။ သူသည် အောင်နိုင်သောသူ တစ်ယောက်ကဲ့သို့ အောင်ပွဲခံခြင်းငှာ ထွက်လာလေ၏။

³ ထို့နောက် သိုးသူငယ်တော်သည် ဒုတိယတံဆိပ်ကို ဖွင့်လိုက်သောအခါ ဒုတိယသတ္တဝါက “လာလော့” ဟု ဆိုသည်ကို ငါကြားရ၏။

⁴ ထိုအခါ မြင်းနီတစ်ကောင် ထွက်လာ၏။ လူရို့သည် အချင်းချင်း တစ်ယောက်ကိုတစ်ယောက် သတ်ဖြတ်ကြစီ ခြင်းငှာ မြင်းစီးသူအား ဤလောကတွင် စစ်မက်ဖြစ်ပွားစီ နိုင်သည့် တန်ခိုးကို ပီးအပ်ထား၏။ ဒါးကြီးတစ်လက်ကို လည်း သူ့အား ပီးထား၏။

⁵ ထို့နောက် သိုးသူငယ်တော်သည် တတိယတံဆိပ်ကို ဖွင့်လိုက်သောအခါ တတိယသတ္တဝါက “လာလော့” ဟု

ဆိုသည်ကို ငါကြားရ၏။ ငါ ကြည့်လိုက်သောအခါ မြင်း
နက်တစ်ကောင်ကို တွေ့ရ၏။ မြင်းစီးသူသည် မိမိလက်တွင်
ချိန်ခွင်ကို ကိုင်ထား၏။

⁶ သတ္တဝါလေးပါးရှိ အလယ်မှ ထွက်ပေါ်လာသည်ဟု
ထင်ရသော အသံတစ်ခုကို ငါကြားရ၏။ ထိုအသံက
“တစ်နို့လုပ်အားခအတွက် ဂျုံဆန်တစ်ခွက်ရပြီး တစ်နို့
လုပ်အားခ အတွက် မုယောဆန် သုံးခွက်ရ၏။ သို့ရာတွင်
သံလွင်ပင်များနှင့် စပျစ်ဥယျာဉ်များကို မဖျက်ဆီးကတ်
ကေ့” ဟု ဆို၏။

⁷ ထို့နောက် သိုးသူငယ်တော်သည် စတုတ္ထတံဆိပ်ကို
ဖွင့်လိုက်သောအခါ စတုတ္ထသတ္တဝါ၏ အသံကို ငါ ကြား
ရ၏။ ထိုသတ္တဝါက “လာလော့” ဟု ဆို၏။

⁸ ငါ ကြည့်လိုက်သောအခါ မြင်းမွဲတစ်ကောင် ကို
တွေ့ရ၏။ မြင်းစီးသူရဲ၏ နာမည်ကား သီမင်း ဖြစ်၏။
သူ၏နောက်မှ မရဏာနိုင်ငံ လိုက်ပါလာ၏။ သူရှိသည်
ကမ္ဘာမြေကြီး၏ လေးပုံတစ်ပုံတွင် ဟိသောလူရို့အား
ဒါးဘေး၊ ငတ်မွတ်ခေါင်းပါးခြင်းဘေး၊ ရောဂါကပ်ဘေး၊
သားရဲတိရစ္ဆာန် များ၏ ဘေးများဖြင့် သီစီနိုင်သည့်
အခွင့်အာဏာကို ပီးအပ်ခြင်း ခံထားရကြ၏။

⁹ ထို့နောက် သိုးသူငယ်တော်သည် ပဉ္စမ တံဆိပ်ကို
ဖွင့်လိုက်သောအခါ ဘုရားသခင်၏ နှုတ်ကပတ်တော်ကို
ဟောပြောသည့် အတွက်ကြောင့်လည်းကောင်း၊ သစ္စာနှင့်
သက်သိခံသည့် အတွက်ကြောင့် လည်းကောင်း အသတ်ခံ

ကြရသောသူရှိ၏ ဝိညာဉ်များကို ယဇ်ပလ္လင်အောက်တွင်
ငါ မြင်ရ၏။

¹⁰ ထိုဝိညာဉ်များက “သန့်ယှဉ်းဖြောင့်မှန်တော်မူသော
အနန္တတန်ခိုး သျှင်၊ အကျွန်ုပ်၏အား သတ်ဖြတ်ခဲ့သည့်
အပြစ်အတွက် လောကီသားရှိအား ဇာကာလတိုင်အောင်
တရားမစီရင်၊ အပြစ်ဒဏ်မပီးဘဲ နိန်တော်မူမည်နည်း” ဟု
ကျယ်သောအသံဖြင့် ဟစ်အော်ကြ၏။

¹¹ ထိုသူ ရှိသည် ဝတ်လုံဖြူတစ်ထည် စီ ရပြီး
လျှင် မိမိရှိနည်းတူ အသတ်ခံရကြမည့် အစီခံရှိ
နှင့် ညီအစ်ကိုမောင်နှမရှိ အရီအတွက် ပြည့်စုံသည့်
တိုင်အောင် တအောင့်ချေ စောင့်နိန်ကြရန် အမိန့်ကို ခံရ
ကြ၏။

¹² ထို့နောက် သိုးသူငယ်တော်သည် ဆဋ္ဌမတံဆိပ်ကို
ဖွင့်သောအခါ မြိုင်လျင်ပြင်းစွာ လှုပ်လေ၏။ နီသည် အ
မွှီးဖြင့်ရက်ထားသော လျှော်တေအဝတ်ကဲ့သို့ မည်းနက်
လာ၏။ လတစ်ခုလုံးသည်လည်း သွေးကဲ့သို့ နီလာ၏။

¹³ အာကာ ပြင်၌ဟိသော ကြယ်များသည် လီပြင်း
ဒဏ်ကြောင့် သင်္ဘောသဖန်းပင်မှ ကြို့ကျလားသော
သင်္ဘောသဖန်းသီး အစိမ်းများကဲ့သို့ မြိကြီးထက်သို့ ကျ
ကြကုန်၏။

¹⁴ မိုးကောင်းကင်သည် စာစောင်ကို လိပ်သကဲ့သို့
ပျောက်ကွယ်လား၏။ တောင်များနှင့် ဟိသမျှသောကျွန်း

များသည် မိမိရို့၏ နိရာမှ ရှို့လားကြကုန်၏။

15 ထိုအခါ လောကီဘုရင်၊ အာဏာပိုင်၊ စစ်သူကြီး၊ သူဌေးသူကြွယ်၊ တန်ခိုးအာဏာဟံသူမှ စ၍ ကျွန်နှင့် ကျွန် မဟုတ်သောသူ အပေါင်းရို့သည် လိုဏ်ဂူများ၌ လည်းကောင်း၊ တောင်ထက် ကျောက်ဆောင်များ၌ လည်းကောင်း ပုန်းအောင်းနိုင်ကြကုန်၏။

16 ထိုသူရို့က တောင်များ၊ ကျောက်ဆောင်များ အား “ငါရို့အထက်သို့ ပြိုကျလျက် ပလ္လင်တော် ထက်တွင် စံတော်မူသောသူ၏ မျက်နှာတော်ကို မမြင်ရစီရန်နှင့် သိုး သူငယ်တော်၏ အမျက်တော် မသင့်ကြစီရန် ငါရို့အား ဖုံးကွယ်ထားကြပါ။

17 ထိုအသျှင်ရို့၏ အမျက်တော်သင့်မည့် နိရုဏ်ကာလ ရောက်လာယာ။ ထိုအမျက်တော်ကို ဇာသူသည် ခံရပ်နိုင် ပါမည်နည်း” ဟု ဆိုကြ၏။

7

၁၄၄,၀၀၀ သော ကုသရေလလူတို့

1 ထို့နောက်မှ ကောင်းကင်တမန် လေးပါးရို့သည် ကမ္ဘာမြေကြီး အစွန်း အရပ်လေးမျက်နှာတွင် ရပ်နိန် သည်ကို ငါမြင်ရ၏။ သူရို့သည် ကုန်းမြေထက်သို့ လည်းကောင်း၊ ပင်လယ်ပြင်၌ လည်းကောင်း၊ သစ်ပင် များကိုလည်းကောင်း လီမတိုက်ခတ်နိုင်စီခြင်းငှာ အရပ် လေးမျက်နှာမှ လီများကို ဆွဲကိုင်ထားကြ၏။

2 ထို့နောက် အသက်ရှင်တော်မူသော ဘုရားသခင်၏ တံဆိပ်တော်ကို ကိုင်ဆောင်လာသော ကောင်းကင်တမန် တစ်ပါးသည် အရှိုအရပ်မှ တက်လာသည်ကို ငါမြင်ရ၏။ ထိုသူသည် မြီကြီးနှင့် ပင်လယ်ကို ဘေးဥပါဒ်သင့်စီနိုင်သော တန်ခိုးကို ရဟိထားသည့် ကောင်းကင်တမန်လေးပါးရှိအား ကျယ်သောအသံဖြင့် ခေါ်လေ၏။

3 ထို့နောက် ထိုကောင်းကင်တမန်က၊ “ငါရှိဘုရားသခင် အခိုင်းအစီရှိ၏ နဖူးတွင် ငါရှိတံ တံဆိပ် ခတ်နှိပ်သည် ထိတိုင်အောင် သင်ရှိသည် မြီကြီး၊ ပင်လယ်၊ သစ်ပင်တို့ကို မည်သို့မျှ ဘေးဥပါဒ် မသက်ရောက်စီကတ်ကေ့” ဟု ကျယ်လောင်စွာဟစ်အော်၍ ပြော၏။

4 ထို့နောက် တံဆိပ်ခတ်နှိပ်ထားသော သူရှိ၏ ဦးရေကို ငါ ကြားသိရ၏။ ဣသရေလလူမျိုးရှိ၏ မျိုးနွယ်စုအားလုံးထဲမှ ၁၄၄,၀၀၀၊

5 ယုဒအနွယ်ထဲမှ ၁၂,၀၀၀၊

ရုဗင်အနွယ်မှ ၁၂,၀၀၀၊

ဂဒ်အနွယ်မှ ၁၂,၀၀၀၊

6 အာသျှာအနွယ်မှ ၁၂,၀၀၀၊

နဿလိအနွယ်မှ ၁၂,၀၀၀၊

မနာသျှေအနွယ်မှ ၁၂,၀၀၀၊

7 သျှိုမောင်အနွယ်မှ ၁၂,၀၀၀၊

လေဝီအနွယ်မှ ၁၂,၀၀၀၊

ကုသခါအနွယ်မှ ၁၂,၀၀၀၊

⁸ ဇာဗုလုန်အနွယ်မှ ၁၂,၀၀၀၊

ယောသပ်အနွယ်မှ ၁၂,၀၀၀၊

ဗ်ယာမိန်အနွယ်မှ ၁၂,၀၀၀ တို့သည် တံဆိပ်ခတ်နှိပ်
ခြင်းကို ခံရကြ၏။

လူထုပရိသတ်ကြီး

⁹ ထို့နောက် ငါ ကြည့်လိုက်သောအခါ ဇာဗုလု မ
ရို့တွက်နိုင်သော လူအုပ်ကြီးကို တွေ့ရ၏။ သူရို့သည်
ဘာသာစကား အမျိုးမျိုးကို ပြောဆိုသော တိုင်းနိုင်ငံ
အသီးသီး၊ ခပ်သိမ်းသော လူမျိုးအနွယ်အသီးသီးမှ လာ
ကြသောသူတို့ ဖြစ်ကြ၏။ သူရို့သည် ဝတ်လုံဖြူတို့ကို
ဝတ်ပြီး စွန်ပလွဲခက်တို့ကို ကိုင်ကာ ပလ္လင်တော်နှင့် သိုး
သူငယ်တော်၏ ရှိ၌ ရပ်နိန့်ကြ၏။

¹⁰ သူရို့က၊

“ကယ်တင်ခြင်းသည်

ပလ္လင်တော်ထက်မှာ စံတော်မူသော ငါရို့၏ ဘုရားသခင်
နှင့်

သိုးသူငယ်တော်ထံမှ ဆင်းသက်လာ၏” ဟု ကြီးသော
အသံနှင့် ကြွေးကြော်ကြ၏။

¹¹ အားလုံးသော ကောင်းကင်တမန်ရို့သည် ပလ္လင်တော်
ကိုလည်းကောင်း၊ အကြီးအကဲများနှင့် သက်ဟိသတ္တဝါ
လေးပါးရို့ကိုလည်းကောင်း ဝိုင်းရံလျက် ရပ်နိန့်ကြ၏။

ထို့နောက် သူ့ရဲ့သည် ပလ္လင်တော်ရှိ၌ ပျပ်ဝပ်ကာ
ဘုရားသခင်အား ကိုးကွယ်ကြပြီး၊

¹² သူ့ရဲ့က၊

“အာမင်၊

ငါရဲ့၏ ဘုရားသခင်သည် ချီးမွမ်းခြင်း၊ ဘုန်းကြီးခြင်း၊
ဉာဏ်ပညာဟံခြင်း၊ ဂုဏ်ကြီးခြင်းနှင့် ကျေးဇူးတရား
ပွားများခြင်း၊

တန်ခိုးကြီးခြင်း၊ ခွန်အားကြီးခြင်းနှင့်
ကမ္ဘာအဆက်ဆက် ပြည့်စုံတော်မူပါစီသတည်း။
အာမင်။” ဟု မြွက်ဆိုကြ၏။

¹³ အသက်ကြီးသူရဲ့ထဲမှ တစ်ပါးက “ဝတ်ဖြူစင်ကြယ်
ဝတ်ဆင်ထားသူရဲ့သည် မည်သူရဲ့နည်း။ ထိုသူရဲ့သည် ဇာ
အရပ်က လာကြသနည်း” ဟု ငါ့အား မိန်း၏။

¹⁴ ငါက “အကျွန် မသိပါ ဆရာ။ သင်သာ သိပါ၏” ဟု
ပြန်၍ ဖြေ၏။

ထိုသူက “သူရဲ့သည် ဆင်းရဲဒုက္ခကြီးထဲမှ လွတ်မြောက်
လာသောသူများဖြစ်၏။ သူရဲ့သည် မိမိရဲ့ ဝတ်လုံများကို
သိုးသူငယ်တော်၏ သွီးဖြင့် ဖြူစင်အောင် ဖွပ်ခပြီးယာ။

¹⁵ ထို့ကြောင့်

“သူရဲ့သည် ဘုရားသခင်၏ ပလ္လင်တော်ရှိသို့ ရောက်ဟိ၍
ကိုယ်တော်၏ ဗိမာန်တော်တွင် နိညမပြတ် ဝတ်ပြုန်
န်ကြခြင်း ဖြစ်၏။

ပလ္လင်တော်ထက်၌ စံနိန်တော်မူသော အသျှင်သည်လည်း
သူရို့နှင့်အတူ ဟိတော်မူ၍ ကာကွယ်စောင့်ရှောက်
တော်မူလိမ့်မည်။

16 သူရို့သည် နောက်တဖန် အစာရီစာ
မငတ်မွတ်ရ။

နီရောင်ခြည်သည် လည်းကောင်း၊
ပြင်းထန်သော အပူဟိန်သည် လည်းကောင်း သူရို့
အထက်သို့ မကျရောက်ရ။

17 အကြောင်းမူကား ပလ္လင်တော်အလယ်တွင် ဟိတော်မူ
သော သိုးသူငယ်တော်သည်
သူရို့၏ သိုးထိန်းဖြစ်ကာ
အသက်စမ်းရီ ဟိရာအရပ်သို့ ပို့ဆောင်တော်မူမည် ဖြစ်
သောကြောင့်တည်း။
ဘုရားသခင်သည်လည်း သူရို့၏ မျက်ရည်ဟိသမျှ
ကို သုတ်ပီးတော်မူလိမ့်မည်” ဟု ဆို၏။

8

သတ္တမတံဆိပ်

1 သိုးသူငယ်တော်သည် သတ္တမတံဆိပ်ကို ဖွင့်လိုက်
သောအခါ ကောင်းကင်ဘုံတွင် နာရီဝက်ခန့် တိန်းဆိတ်
လားလေ၏။

2 ထို့နောက် ဘုရားသခင်၏ ရှိတော်တွင် ရပ်လျက်နိန်
သည့် ကောင်းကင်တမန် ခုနစ်ပါးကို ငါမြင်ရ၏။ သူရို့
အား တံပိုးခရာ ခုနစ်လုံးကို ပီးအပ်ထားလေ၏။

3 ထို့နောက် အခြား သော ကောင်းကင်တမန် တစ်ပါးသည် ပလ္လင်တော်အနားသို့ လာ၍ ရပ်၏။ သူသည် နံ့သာပေါင်းကို ထည့်၍ပူဇော်သည့် ရှို့ခွက်ကို ကိုင်ထား၏။ ပလ္လင်တော်ရှိ၌ ဟိသော ရှို့ယဇ်ပလ္လင်ထက်မှာ ဘုရားသခင်လူအပေါင်းရှိ၏ ဆုတောင်းပတုထနာများနှင့်အတူ ပူဇော်ရန် များစွာသော နံ့သာပေါင်းကို သူ့အား ပီးအပ်ထား၏။

4 ဘုရားသခင်၏ ရှို့တော်တွင် ရပ် နိ န် သော ကောင်းကင်တမန်၏လက်၌ ဟိသော နံ့သာပေါင်းမှ ထွက်လာသောမီးခိုးသည် ဘုရားသခင်လူရှိ၏ ဆုတောင်းပတုထနာများနှင့်အတူ အထက်သို့ တက်လေ၏။

5 ထို့နောက် ကောင်းကင်တမန်သည် နံ့သာပေါင်းကို ထည့်ပူဇော်သည့် ရှို့ခွက်ကို ယူပြီးလျှင် ယဇ်ပလ္လင်မှ မီးကို ထည့်၍ မြီကြီးထက်သို့ ပစ်ချလိုက်၏။ ထိုအခါ မိုးခြိမ်းခြင်း၊ အသံမြည်ခြင်း၊ လျှပ်ပြက်ခြင်း၊ မြီလျင်လှုပ်ခြင်းများ ဖြစ်ပေါ်လာလေ၏။

တံပိုးခရာများ မှုတ်ခြင်း

6 ထို့နောက် တံပိုးခရာ ခုနစ်လုံးကို ကိုင်ထားသော ကောင်းကင်တမန် ခုနစ်ပါး ရှို့သည် တံပိုး ခရာမှုတ်ရန် အသင့်ပျင်ဆင်ကြ၏။

7 ပထမ ကောင်းကင်တမန်သည် မိမိ ကိုင်ထားသော တံပိုးခရာကို မှုတ်လိုက်သောအခါ သွီးနှင့်ရောနှိပ်သော မီး

နှင့် မိုးသီးများသည် မြီကြီးထက်သို့ ကျလာ၏။ မြီကြီး၏ သုံးပုံတစ်ပုံ၊ သစ်ပင် သုံးပုံတစ်ပုံ စိမ်းစိုသောမြက် ဟံ သမျှရှိသည် လောင်ကျွမ်းလေ၏။

8 ဒုတိယကောင်းကင်တမန်သည် မိမိကိုင်ထားသော တံပိုးခရာကို မှုတ်လိုက်သောအခါ မီးတောက်နိန်သော တောင်ကြီး တစ်တောင် ကဲ့သို့သော အရာ တစ်ခုကို ပင်လယ်ထဲသို့ ပစ်ချလိုက်လေ၏။ ထိုအခါ ပင်လယ်ရီ သုံးပုံတစ်ပုံသည် သွီးအဖြစ်သို့ ပြောင်းလားလေ၏။

9 ပင်လယ်သတ္တဝါ သုံးပုံတစ်ပုံရှိသည် သီဆုံးလား ကြ၏။ သုံးပုံတစ်ပုံမျှသော သဘောတိလည်း ပျက်စီး လားကြ၏။

10 တတိယကောင်းကင်တမန်သည် မိမိကိုင်ထားသော တံပိုးခရာ ကို မှုတ် လိုက် သောအခါ မီးရှူး တိုင် ကဲ့သို့ တောက်လောင်နိန်သော ကြယ်ကြီးတစ်လုံးသည် အာကာ ပြင်မှ ကြွဆင်းလာကာ မြစ်သုံးပုံတစ်ပုံနှင့် စမ်းပေါက် များ၌ ကျလေ၏။

11 ယင်းကြယ်ကို “ခါးသီးခြင်း” ဟု ခေါ်၏။ သုံးပုံတစ် ပုံသော ရီသည် ရီခါးအဖြစ်သို့ ပြောင်းလားကြ၏။ များ စွာသော လူရှိသည် ထိုရီခါးကို သောက်သဖြင့် သီဆုံး ကြကုန်၏။

12 စတုတ္ထကောင်းကင်တမန်သည် မိမိကိုင်ထားသော တံပိုးခရာကို မှုတ်လိုက်သောအခါ နီ၏ သုံးပုံတစ်ပုံ၊ လ၏ သုံးပုံတစ်ပုံ၊ ကြယ်တာယာများ၏ သုံးပုံတစ်ပုံသည်

ကြတ်၍ ၎င်းရို့၏ အလင်းသည် သုံးပုံတစ်ပုံ မိုက်လားလေ၏။ နို့၏ သုံးပုံတစ်ပုံ၊ ည၏ သုံးပုံတစ်ပုံသည်လည်း အလင်း မရကြ။

13 ထို့နောက် ငါ ကြည့်လိုက်သောအခါ ကောင်းကင် အလယ်၌ ပျံဝဲလျက်နိန်သော လင်းယုန်ငှက်တစ်ကောင်ကို မြင်ရ၏။ ထိုငှက်က “အခြားသော ကောင်းကင်တမန် သုံးပါး မှတ်ကြမည့် တံပိုးခရာအသံကြောင့် မြီကြီးထက်၌ ဟံသော သတ္တဝါရို့သည် အမင်္ဂလာ ဟံကြလိမ့်မည်၊ အမင်္ဂလာ ဟံကြ လိမ့်မည်၊ အမင်္ဂလာ ဟံကြလိမ့်မည်” ဟု အသံကျယ်လောင်စွာ ပြောဆိုနိုင်သည်ကို ငါကြားရ၏။

9

1 ထို့နောက် ပဉ္စမကောင်းကင်တမန်သည် မိမိကိုင်ထားသော တံပိုးခရာကို မှတ်လိုက်သောအခါ ကောင်းကင်မှ မြီကြီးထက်သို့ ကြယ်တစ်လုံးကြွေကျလာသည်ကို ငါမြင်ရ၏။ ထိုပဉ္စမကောင်းကင်တမန်သည် အနက်ဆုံးသော တွင်း*၏ သော့ကို ထိုကြယ်အား ပီးအပ်လေ၏။

2 သူသည် ထိုတွင်းကို ဖွင့်လိုက်သောအခါ မီးခိုးသည် မီးဖိုကြီးတစ်ခုမှ ထွက်သည့် ထွက်လာလေ၏။ ထိုမီးခိုးကြောင့် နီ၏အလင်းနှင့် အာကာသကောင်းကင်သည် မှောင်မိုက်လားလေ၏။

* 9:1 အနက်ဆုံးသောတွင်း၊ ဝိညာဉ်နတ်ဆိုးများကို နှောင့်နှေးသော ပြစ်ဒဏ်စီရင်မည့် နို့ထိတိုင်အောင် ချုပ်နှောင်ထားရာ ကမ္ဘာမြီကြီး၏ အနက်ဆုံးသော နံရာ တစ်ခုရာ။

3 ထိုမီးခိုးထဲမှ ကျိုင်းကောင်တိထွက်လာပြီးလျှင် မြို့ကြီးထက်သို့ ကျကြကုန်၏။ သူရို့သည် ကင်းမီးကောက်တိကဲ့သို့ အစွမ်းဟိကြ၏။

4 သူရို့အား မြက်ပင်၊ သစ်ပင်များနှင့် အခြားသော ဇာအပင်ကိုမဆို ဘေးဥပါဒ်မပြုရန် မှာထားတော်မူ၏။ သို့ရာတွင် နဖူးတွင် ဘုရားသခင်၏ တံဆိပ်တော် မပါသည့် လူရို့ကိုသာလျှင် ဘေးဥပါဒ်ပြုရန် မှာထား၏။

5 ထိုသူရို့ကို အသိသတ်ရန် ထိုကျိုင်းကောင်ရို့အား ခွင့်မပြုထား။ သို့ပင်သျှောင်လည်း ငါးလမျှသာ ညှဉ်းဆဲပိုင်ခွင့် ဟိ၏။ ကျိုင်းကောင်အကိုက် ခံရသူရို့သည် ကင်းမီးကောက် အထိုးခံရသကဲ့သို့ နာကျင်စွာ ဝေဒနာခံရကြ၏။

6 ထိုငါးလအတွင်း လူရို့သည် သီခြင်းတရားကို ရှာကြလိမ့်မည်။ ရှာသော်လည်း မတို့ရကြ။ ထိုသူရို့သည် သီဖို့ရန် တောင့်တကြသော်လည်း သီမင်းသည် သူရို့ပါးမှ တိမ်းယောင်နိုင် လိမ့်မည်။

7 ထိုကျိုင်းကောင်များသည် စစ်ပွဲဝင်ရန် အသင့်ပျင်နိုင်သော မြင်းတိနှင့်တူ ကြ၏။ သူရို့၏ ဦးဂေါင်းထက်မှာ ရှို့သရဖူဆောင်းထားသည်နှင့် တူ၏။ သူရို့၏ မျက်နှာသည်လည်း လူ့မျက်နှာနှင့် တူ၏။

8 သူရို့၏အမွှေးသည် မိန်းမရို့၏ ဆံပင်နှင့်တူ၏။ သူရို့၏သွားသည် ခြင်္သေ့သွားနှင့် တူ၏။

9 သူရို့၏ ရင်၌ သံ ရင်အုပ်တန်ဆာ ကဲ့သို့ သောရင်အုပ်တန်ဆာ တပ်ဆင်ထားသည်နှင့် တူ၏။ သူရို့၏

အတောင်ခပ်သံသည် စစ်ပွဲဝင်ရန် မောင်းနှင်လာသော မြင်းများနှင့်လည်းကောင်း၊ မြင်းရထားများ၏ အသံနှင့် လည်းကောင်း တူ၏။

10 သူရို့၏ မတုံးသည် ကင်းမီးကောက်၏ မတုံးနှင့် တူ၍ ဆူးဟိ၏။ သူရို့မတုံး၌ လူရို့အား ငါးလတိုင်တိုင် ဘေးဥပါဒ်ရောက်စီနိုင်သော အစွမ်းဟိ၏။

11 သူရို့၏ ဘုရင် ကား တွင်းနက် ကြီးကို အုပ်စိုးသော ကောင်းကင်တမန် ဖြစ်၏။ သူ၏နာမည် ကား ဟေဗြဲ ဘာသာ စကား အားဖြင့် အ ဗ ဒု ဒု န် ဟူ၍ လည်းကောင်း၊ ဟေလသ ဘာသာ အားဖြင့် အ ပေါ လျု န်ဟူ၍ လည်းကောင်းဖြစ်၏။ အပေါလျုန်၏ အနက်မှာ “ဖျက်ဆီးသူ” ဟူ၍ ဖြစ်သတည်း။

12 အမင်္ဂလာတစ်ပါး ကုန်လွန်လားပြီးနောက် အခြားသော အမင်္ဂလာနှစ်ပါး လာဦးမည်။

13 ထို့နောက် ဆဋ္ဌမကောင်းကင်တမန်သည် မိမိ၏တံပိုး ခရာကို မှုတ်လိုက်သောအခါ ဘုရားသခင်၏ရှုံ့တော်၌ ဟိသော ရှီယဇ်ပလ္လင်၏ ထောင့်လေးထောင့်မှ ထွက်လာသောအသံကို ငါသည် ကြားရ၏။

14 ထိုအသံက “ဥဖရတ်မြစ်ကြီးအနားမှာ ချိုင့်ထားသော ကောင်းကင်တမန်လေးပါးကို ဖြိုခွတ်လော့” ဟု ဆဋ္ဌမကောင်းကင်တမန်အား ဆို၏။

15 ထိုကောင်းကင်တမန် လေးပါးရှိသည် လွတ်မြောက်ကြ၏။ သူရို့သည် ဤမည်သော အချိန်နာရီ၊ နိရက်၊

လ၊ နှစ်အဖို့ လူသားမျိုးနွယ်၏ လူဦးရေသုံးပုံတစ်ပုံကို သုတ်သင်ပစ်ရန် အတွက် အသင့်ဟိန်နီသူများ ဖြစ်ကြ၏။

16 မြင်းစီးသူရဲရို့၏ အရီအတွက်မှာ သန်းပေါင်း ၂၀၀ ဟိကြောင်းကို ငါသည် ကြားသိရ၏။

17 ထို့အတူ ငါ၏ဗျာဒိတ်ရှုပါရုံ၌ မြင်းစီးသူရဲရို့သည် ကန့်ကွဲသို့သော အဝါရောင်၊ နက်ပြာရောင်၊ မီးလျှံကဲ့သို့ သော အနီရောင်ဟိသော ရင်အုပ်တန်ဆာတိကို ဝတ်ဆင်ထားကြသည်ကို ငါ မြင်ရ၏။ မြင်းများ၏ ဦးဂေါင်းများသည် ခြင်္သေ့ဦးဂေါင်းများနှင့် တူ၏။ သူရို့၏ခံတွင်းမှ မီးလျှံ၊ မီးခိုး၊ ကန်များ ထွက်လာ၏။

18 ထိုသို့ သူရို့၏ခံတွင်းမှ ထွက်လာသည့် မီးလျှံ၊ မီးခိုး၊ ကန်တည်းဟူသော ကပ်သုံးပါးကြောင့် လူသားမျိုးနွယ်၏ လူဦးရေ သုံးပုံတစ်ပုံသည် သီဆုံးကြကုန်၏။

19 မြင်းများ၏ အစွမ်းသည် သူရို့၏ခံတွင်းနှင့် မတုံးများတွင် ဟိ၏။ သူရို့၏ မတုံးများသည် မြွေများ၏ ဦးဂေါင်းတိနှင့်တူ၏။ ထိုမတုံးများဖြင့် လူရို့အား အန္တရာယ်ပြုကြ၏။

20 ဤဘေးဒဏ်ဖြင့် မသိဘဲ ကျန်ဟိန်နီသော သူရို့သည် မိမိရို့၏ ဆိုးညစ်သော အကျင့်များမှ နောင်တရရန်နှင့် ဘုရားသခင်ထံသို့ ပြန်လှည့်ရန် ငြင်းပယ်ကြ၏။ ထိုသူရို့သည် နတ်မိစ္ဆာများကိုလည်းကောင်း၊ မျက်စိမမြင်၊ နားမကြား၊ မလှုပ်မယှားနိုင်သော ရွှံ့၊ ငွါ၊ ကြေး၊ ကျောက်၊ သစ်သားစသည်ဖြင့် ပြုလုပ်ထားသော ရုပ်တုများကို

လည်းကောင်း ကိုးကွယ်လျက်ပင် ဟိနိန်ကြသိမ့်၏။

²¹ သူရို့သည် လူ့အသက်ကို သတ်ခြင်း၊ ပြုစားခြင်း၊ ကာမဂုဏ်လိုက်စားခြင်း၊ သူ့ဥစ္စာခိုးခြင်း အပြစ်များကို ပြုကြသော်လည်း နောင်တမရကြပေ။

10

ကောင်းကင်တမန်နှင့် စာစောင်ငယ်

¹ ထို့နောက် ခွန်အား ကြီးသော ကောင်းကင်တမန် တစ်ပါးသည် ကောင်းကင်မှ ဆင်းသက်လာသည်ကို ငါ မြင်ရ၏။ သူသည် မိုးတိမ်ကို ဝတ်ဆင်၍ သူ၏ဦးဂေါင်းပတ်လည်တွင် သက်တန့်တစ်ခု ဟိ၏။ သူ၏မျက်နှာသည် နီနှင့်တူ၏။ သူ၏ခြံထောက်သည် မီးတိုင်များ နှင့်တူ၏။

² သူသည် ဖွင့်ထားသော စာစောင်ငယ်ကို ကိုင်ထား၏။ ထိုသူ၏ ညာဖက်ခြံသည် ပင်လယ်ထက်၌လည်းကောင်း၊ ဘယ်ဖက်ခြံသည် ကုန်းမြီထက်၌လည်းကောင်း ရပ်လျက်လည်းကောင်း၊

³ ခြင်္သေ့ ဟောက် သကဲ့သို့ ကျယ်သော အသံ ဖြင့် ကြွေးကြော်၏။ ယင်းသို့ ကြွေးကြော် လိုက် သောအခါ မိုးကြိုးခြိမ်းသံခုနစ်ချက် မြည်လေ၏။

⁴ ထိုသို့ မိုးကြိုးခြိမ်းသံခုနစ်ချက် မိန့်မြောက်သည်နှင့် ချက်ချင်း ငါသည် ထိုအရာများကို ရိုးမှတ်မည်ပြုစဉ်၊ “ရိုးမှတ်မထားကေ့။ မိုးကြိုးခြိမ်းသံ ခုနစ်ချက်က မိန့်မြောက်

သည့် စကားကို တံဆိပ်ခပ်ထားလော့” ဟု ကောင်းကင်မှ ထွက်သောအသံကို ငါကြားရ၏။

5 ထို့နောက် ပင်လယ်နှင့် ကုန်းမြီထက်တွင် ရပ်နိန်သော ကောင်းကင်တမန်သည် မိမိ၏ညာ ဖက်လက်ကို ကောင်းကင်သို့ မြှောက်၍၊

6 ကမ္ဘာ အဆက်ဆက် အသက် ရှင်တော် မူ၍ ကောင်းကင်၊ မြီကြီး၊ ပင်လယ်မှ စ၍ အရာခပ်သိမ်းကို ဖန်ဆင်းတော်မူသော ဘုရားသခင်၏ နာမတော်ကို တိုင်တည်လျက် “ထပ်၍ ကြန့်ကြာမှု ဟိလိမ့်မည် မဟုတ်။

7 သို့ရာတွင် ဘုရားသခင် သည် မိမိ၏အစီခံ ပရောဖက် ရှိ အား ဗျာဒိတ် ပီးတော်မူခဲသည်နှင့် အညီ၊ သတ္တမ ကောင်းကင်တမန် သည် မိမိ၏ တံပိုးခရာကို မူတ်သောအခါ ကိုယ်တော် သည် မိမိ၏နက်နဲသော အကြံအစည်တော်များကို ပြီးမြောက်စီတော်မူမည်” ဟု ဆိုလေသည်။

8 တဖန် ကောင်းကင်မှ ငါ ကြားရသော အသံကား “လားလော့။ ပင်လယ်နှင့် ကုန်းမြီထက်တွင် ရပ်နိန်သော ကောင်းကင်တမန်၏ လက်၌ ဖွင့်ထားသောစာလိပ်ကို ယူလော့” ဟု ငါ့အား ဆို၏။

9 သို့ဖြစ်၍ ငါသည် ထို ကောင်းကင်တမန် ပါး သို့လားပြီးလျှင် စာလိပ်ငယ်ကို ပီးရန် တောင်း၏။ ထို ကောင်းကင်တမန်ကလည်း “ဤစာလိပ်ငယ်ကို ယူ၍

စား လော့။ သင်၏ဝမ်း၌ ခါး လိမ့်မည်။ သို့ရာတွင် သင်၏ခံတွင်း၌မူကား ပျားရည်ကဲ့သို့ ချိုလိမ့်မည်” ဟု ဆို၏။

¹⁰ ငါသည် ထိုကောင်းကင်တမန်၏လက်မှ စာလိပ်ငယ် ကို ယူ၍ စား၏။ ထိုစာလိပ်သည် ငါ၏ခံတွင်း၌ ပျားရည် ကဲ့သို့ ချို၏။ သို့ရာတွင် စားပြီးသောအခါ ဝမ်းထဲ၌ ခါး လေ၏။

¹¹ ထို့နောက် ကောင်းကင်တမန်က “သင်သည် များစွာ သော လူ၊ တိုင်းနိုင်ငံ၊ ဘာသာစကား၊ သျှင်ဘုရင်ရို့နှင့် ပတ်သက်၍ ဘုရားသခင်၏ ဗျာဒိတ်တော်ကို နောက်တ ဖန် ဟောပြောရမည်” ဟု ငါ့အား ဆို၏။

11

သက်သေခံနှစ်ပါး

¹ ထို့နောက် ကောင်းကင်တမန်သည် ငါ့အား တိုင်းတာ ရန် ကျူရို့ တစ် ချောင်း ကို ပီး ပြီး လျှင် “လား၍ ဘုရားသခင်၏ ဗိမာန်တော်နှင့် ယဇ်ပလ္လင်ကို တိုင်းလော့။ ထိုအရပ်တွင် ဝတ်ပြုကိုးကွယ်နိန်သော သူရို့ကိုလည်း ရှိ တွက်လော့။

² သို့ရာတွင် ဗိမာန် တော် ဝင်း ကို မ တိုင်း ကေ၊ အကြောင်းမူကား ထို အရာ ကို အခြား လူမျိုး ရို့ အား ပီးထားသောကြောင့်ဖြစ်၏။ သူရို့သည် သန့်ယှင်းသော

မြို့တော်ကို လေးဆယ့်နှစ်လတိုင်တိုင် ခြံဖြင့် နင်းကြလိမ့်မည်။

³ ငါ၏ သက်သီခံနှစ်ပါးအား လျော်တေအဝတ်ကို ဝတ်၍ ငါစီရွတ်မည်။ သူရို့သည် ရက်ပေါင်း ၁,၂၆၀ တိုင်တိုင် ပရောဖက်ပြု၍ ဟောပြောကြလိမ့်မည်” ဟု ဆို၏။

⁴ ထိုသက်သီခံနှစ်ပါးကား မြို့ကြီးကို အစိုးပိုင်တော်မူသော အသျှင်၏ ရှို့တော်၌ ဟိသော သံလွင်ပင်နှစ်ပင်နှင့် မီးခွက်နှစ်လုံးဖြစ်၏။

⁵ တစ်စုံတစ်ယောက်သောသူက ထိုသက်သီခံနှစ်ပါးအား အန္တရာယ်ပြုလျှင် သူရို့၏ခံတွင်းမှ မီးလျှံများ ထွက်၍ ထိုရန်ပြုသောသူကို ကျွမ်းလောင်စီလေ၏။ သူရို့အား အန္တရာယ်ပြုရန် ကြိုးစားသူ မှန်သမျှသည် ဤနည်းအတိုင်း သီကြရလိမ့်မည်။

⁶ ထိုသူရို့သည် ဗျာဒိတ်တော်ကို ဟောပြောသည့် အချိန်ကာလအတွင်း မိုးမရွာစီရန် မိုးကောင်းကင်ကို ပိတ်နိုင်သော တန်ခိုးဟိကြ၏။ ရီကို သွီးအဖြစ်သို့ ပြောင်းလဲစီနိုင်သော တန်ခိုးလည်း ဟိကြ၏။ သူရို့သည် မိမိရို့ အလိုဟိသည့်အခါတိုင်း ကမ္ဘာမြို့ကြီးကို ဘေးဒဏ်အမျိုးမျိုး သင့်စီနိုင်ကြ၏။

⁷ သူရို့၏ သက်သီခံ ဟောပြောသည့်အလုပ် ပြီးစီးသောအခါ၌ တွင်းနက်ကြီးထဲမှ သားရဲသည် တက်လာ၍ သူရို့အား တိုက်ခိုက်လိမ့်မည်။ ထို့နောက် သူသည် ထိုသူရို့ကို အောင်နိုင်၍ အသိသတ်လိမ့်မည်။

8 သူရို့၏ အလောင်းများသည် မြို့ကြီးများ၏ လမ်းမထက်၌ ဟိကြလိမ့်မည်။ ထိုမြို့ကား သူရို့၏သခင်ဘုရားသည် လက်ဝါးကပ်တိုင်တွင် တင်၍အသတ်ခံရာ မြို့ဖြစ်၏။ ယင်းမြို့သည် သောဒိုမြို့ကို ဖြစ်စီ၊ အဲဂုတ္တုပြည်ကို ဖြစ်စီ ပုံဆောင်သောမြို့ဖြစ်သတည်း။

9 တိုင်းနိုင်ငံအသီးသီး၌ ဟိသောဘာသာစကား အမျိုးမျိုးပြောကြသော လူမျိုးအနွယ် အပေါင်းရို့သည် သူရို့၏ အလောင်းများကို သဂြိုဟ်ရန် ခွင့်မပြုဘဲ သုံးရက်ခွဲတိုင်အောင် ကြည့်နိုင်ကြလိမ့်မည်။

10 မြို့ကြီးသားရို့သည် ပရောဖက်နှစ်ပါး သီဆုံးလားသည့်အတွက် ပွဲခံလျက် အချင်းချင်းလက်ဆောင်များကို ပီးကာ အောင်ပွဲခံကြလိမ့်မည်။ ဇာကြောင့်ဆိုသော် ထိုပရောဖက်နှစ်ပါးသည် မြို့ကြီးသားရို့အား ဒုက္ခများစွာကို ရောက်စီခကြသောကြောင့်ဖြစ်၏။

11 သို့ရာတွင် သုံးရက်ခွဲ ကြာပြီနောက် ဘုရားသခင်သည် အသက်ဝိညာဉ်ကို ထိုသူရို့အထဲသို့ တဖန်မှုတ်သွင်းသဖြင့် သူရို့သည် ထ၍ မတ်တတ်ရပ်ကြ၏။ ဤအမှုအရာကို တို့မြင်သူ မြို့ကြီးသားရို့သည်လည်း ကြောက်ရွံ့ကြ၏။

12 ထို့နောက် ပရောဖက်နှစ်ပါးရို့သည် “ဤအရပ်သို့ တက်လော့” ဟု မိမိရို့အား ကောင်းကင်မှ ကျယ်လောင်စွာပြောသော အသံကို ကြားရကြ၏။ ထိုသူရို့သည် သူရို့၏ရန်သူတိ စောင့်ကြည့်နိုင်စဉ် မိုးတိမ်တိုက်ကို စီး၍

ကောင်းကင်သို့ တက်လားကြ၏။

13 ထိုခဏ၌ ငလျင်ပြင်းထန်စွာ လှုပ်သဖြင့် မြို့၏ ဆယ် ပုံတစ်ပုံ ပျက်စီး၍ လူပေါင်း ၇,၀၀၀ သိဆုံးကြကုန်၏။ ကြွင်းကျန်သော သူရို့သည် ထိတ်လန့်လျက် ကောင်းကင်ဘုံသျှင် ဘုရားသခင်၏ ဘုန်းတော်ကို ချီးကျူးကြကုန်၏။

14 ဒုတိယအမင်္ဂလာကား ကုန်လွန်လားသော်လည်း တတိယအမင်္ဂလာသည် မကြာခင် လာလိမ့်မည်။

သတ္တမတံပိုးခရာမှုတ်ခြင်း

15 ထို့နောက် သတ္တမ ကောင်းကင်တမန် သည် မိမိ၏တံပိုး ခရာ ကို မှုတ်လိုက်သောအခါ “အ ဂူတွင် လောကကို အုပ်စိုးမည့် အာဏာသည် ငါ့ရို့၏ သခင်ဘုရားနှင့် ကိုယ်တော်၏ မေသျှိယလက်ထဲသို့ ရောက်လာယာ။ ထိုသူသည် ကမ္ဘာအဆက်ဆက်စိုးစံတော် မူလိမ့်မည်” ဟု ကောင်းကင်မှ ကျယ်လောင်စွာ ပြောသော အသံများကို ကြားရ၏။

16 ထိုအခါ ဘုရားသခင်၏ ရှိတော်၌ဟိသော ပလ္လင်ထက်တွင် ထိုင်လျက်နိန့်ကြသော အကြီးအကဲ ၂၄ ပါးရို့သည် ဘုရားသခင်အား ပျပ်ဝပ်ကိုးကွယ်လျက်၊

17 “အတိတ်၊ ပစ္စုပ္ပန် ကာလ ရို့၌ ဟိတော် မူသော အနန္တတန်ခိုးနှင့် ပြည့်စုံတော် မူသော အသျှင် ဘုရားသခင်၊

ကိုယ်တော် သည် မိမိ၏ မဟာ တန်ခိုး တော် ကို
ယူဆောင်တော်မူလျက်
လောကကို စတင်အုပ်စိုးတော်မူပြီဖြစ်၍ ကျေးဇူးတော်ကို
ချီးမွမ်းပါ၏။

18 ကိုယ်တော်၏ အမျက်တော် သက်ရောက်ရာ ကာလ
သည် လည်းကောင်း၊

သီလွန်သောသူရို့ကို တရားစီရင်တော်မူရာ ကာလ
သည် လည်းကောင်း

အဂုဏ်အခါ ကျရောက်လာသည်ဖြစ်၍ မယုံကြည်သောသူ
အပေါင်းရို့သည် အမျက်ထွက်ကြပါ၏။

ကိုယ်တော်၏ အစီအစဉ်များဖြစ်ကြသော ပရောဖက်ရို့၊
ဘုရားသခင်၏လူရို့၊

ကိုယ်တော်ကို ကြောက်ရွံ့ရုံသိသောသူရို့ အကြီးအငယ်ရို့
ကို ဆုလာဘ်ပီးရန် အချိန်ရောက်လာပြီဖြစ်၏။

ကမ္ဘာမြေကြီးကို ဖျက်ဆီးသောသူရို့အား ဖျက်ဆီးခြင်းငှာ
အချိန်ကာလသည်လည်း ရောက်ဟိလာယာ”

ဟု လျှောက်ထားကြ၏။

19 ထိုအခါ ကောင်းကင်ဘုံ၌ ဘုရားသခင်၏ ဗိမာန်တော်
တံခါးသည် ပွင့်လာသဖြင့် ဗိမာန်တော်ထဲ၌ ပဋိညာဉ်
သေတ္တာတော်ကို ငါမြင်ရ၏။ ထို့နောက် လျှပ်စစ်များ
ပြက်ခြင်း၊ မိုးခြိမ်းခြင်း၊ ငလျင်လှုပ်ခြင်း၊ ကြီးစွာသော
မိုးသီးမုန်တိုင်း ကျရောက်ခြင်းများ ဖြစ်လေ၏။

12

မိန်းမနှင့် နဂါး

¹ ထို့နောက် ကောင်းကင် တွင် အတိတ်နိမိတ် ကြီး တစ်ရပ် ပေါ်လာသည်ကို ငါမြင်ရ၏။ မိန်းမတစ်ယောက် သည် နီကို ဝတ်ကာ၊ လကို ခြံဖြင့်နင်းလျက် ကြယ်တစ် ဆယ့်နှစ်လုံးပါသည့် သရဖူကို ဆောင်းထား၏။

² သူမသည် မကြာမီ မွီးဖွားမည်ဖြစ်၍ မွီးဖွားခြင်း ဝေဒနာကိုခံကာ အော်နိုင်၏။

³ အာကာပြင်တွင် အခြားသော အတိတ်နိမိတ်တစ်ခု ပေါ်လာ၏။ ဦးဂေါင်း ခုနစ်လုံး၊ ဦးပြို ဆယ်ချောင်းဟိ သော နဂါးနီကြီးတစ်ကောင်သည် မိမိ၏ဦးဂေါင်းများတွင် သရဖူ ခုနစ်လုံးကို ဆောင်းထား၏။

⁴ သူသည် အာကာပြင်၏ ကြယ်တာယာသုံးပုံ တစ်ပုံကို မိမိ၏မတုံးဖြင့် ဆွဲငင်၍ မြီကြီးထက်သို့ ပစ်ချလိုက်၏။ နဂါးကြီးသည် မွီးဖွားအံ့ဆဲဆဲဖြစ်သော မိန်းမ၏ရှို့တွင် ရပ်လျက် မွီးဖွားသည်နှင့် တစ်ပြိုင်နက် သူမ၏သားငယ် ကို စားရန် စောင့်နိုင်၏။

⁵ ထို့နောက် ထိုမိန်းမသည် လူမျိုးတကာရို့ကို သံ လှံတံဖြင့် အုပ်စိုးမည့် သားယောက်ျား ကို ဖွားမြင် လေ၏။ သို့သော် ထိုသားငယ်သည် ဘုရားသခင်ထံ ပါးသို့ လည်းကောင်း၊ ကိုယ်တော်၏ ပလ္လင်တော်သို့ လည်းကောင်း ချီဆောင်ခြင်းကို ခံရ၏။

⁶ မိန်းမသည် တောကန္တာရ၌ ဘုရားသခင် ပျင်ဆင်ထား
တော်မူသော အရပ်သို့ ထွက်ပြီးလေ၏။ ထိုအရပ်တွင်
သူမသည် ရက်ပေါင်း ၁,၂၆၀ အထိ ပြုစုစောင့်ရှောက်
ခြင်းကို ခံရ၏။

⁷ ထို့နောက် ကောင်းကင်၌ စစ်ဖြစ်လေသည်။ မိကုခေ
လနှင့် သူ၏ကောင်းကင်တမန်ရှိသည် နဂါးကို တိုက်ခိုက်
ကြ၏။ နဂါးနှင့် သူ၏ ကောင်းကင်တမန်ရှိသည် ပြန်လှန်
တိုက်ခိုက် ကြ၏။

⁸ သို့သော် နဂါး သည် စစ် ယှဉ်း လေ၏။ သူ နှင့်
သူ၏ကောင်းကင်တမန်ရှိသည် ကောင်းကင်၌ နိန်ရန်
အခွင့်မရကြပေ။

⁹ မြီ ကြီး သား ရှိ အား လှည့်ဖြား သော နတ်မိစ္ဆာ
ဟူ၍ လည်းကောင်း၊ စာတန်မာရ်နတ်ဟူ၍ လည်းကောင်း
ခေါ်ဝေါ်ခြင်းကို ခံရသူ ရှိဟောင်း မြီနဂါးကြီးသည် မိမိ၏
ကောင်းကင်တမန်တို့နှင့်အတူ မြီကြီးထက်သို့ ပစ်ချခြင်း
ကို ခံရလေ၏။

¹⁰ ထို့နောက် ငါသည် ကောင်းကင်မှ ကျယ်လောင်သော
အသံကို ကြားရသည်ကား၊ “အဂုအခါ ဘုရားသခင်၏
ကယ်တင်ခြင်းနှင့် တန်ခိုးတော်သည် သက်ရောက်လာ
လေယာ။ မေသျှိယသည်လည်း မိမိ၏အခွင့်အာဏာကို
ပြတော်မူယာ။ ဇာကြောင့်ဆိုသော် ယုံကြည်သောသူရှိ
အား နိညမပြတ် ငါရှိ၏ဘုရားသခင် ရှိတော်၌ ပြစ်တင်

စွပ်စွဲလျက် နိန်သောသူကို ကောင်းကင်ဘုံမှ နှင်ချလိုက်ပြီ ဖြစ်သောကြောင့်တည်း။

11 ထို သူ ရှိ သည် သိုး သူငယ်တော်၏ အ သိုး အားဖြင့် လည်းကောင်း၊ မိမိရှိ ဟောပြောကြေညာသည့် နှုတ်ကပတ်တရားတော်အားဖြင့် လည်းကောင်း စာတန် မာရ်နတ်ကို အောင်မြင်ခကြ၏။ သူရှိသည် အသိခံသည့် တိုင်အောင် မိမိရှိအသက်ကို မနှမြိုးကြပေ။

12 သို့ဖြစ်၍ အချင်း ကောင်းကင်နှင့် ကောင်းကင်သား ရှိ၊ ဝမ်းမြောက် ရွှင်မြူး ကြ လော့။ သို့ရာတွင် ကုန်း မြီ နှင့် ပင်လယ်ရှိ အတွက် အမင်္ဂလာဖြစ်ပါသည် တကား။ အကြောင်းမူကား မာရ်နတ်သည် မိမိ၏နိရက်ကာလသည် အနည်း ချေသာ ကျန် ဟိသည် ကို သိသဖြင့် ပြင်းစွာ အမျက်ထွက် လျက် သင် ရှိ ပါးသို့ ရောက်လာ ပြီ ဖြစ် သောကြောင့်တည်း” ဟူ၍ ဖြစ်၏။

13 ထိုနဂါးက မိမိသည် မြီကြီးသို့ ပစ်ချခြင်းခံရသည်ကို သိသောအခါ သားယောက်ျားကို ဖွားမြင်သော မိန်းမအား လိုက်၍ဖမ်းလေ၏။

14 ထိုမိန်းမသည် တောကန္တာရဟိသော မိမိအရပ်သို့ ပျံ လားနိုင်ရန် လင်းယုန်ကြီးတစ်ကောင်၏ အတောင် နှစ် ခုကို ရဟိထား၏။ သူမသည် ထိုအရပ်တွင် သုံးနှစ်ခွဲ တိုင်တိုင် နဂါး၏ ဘေးအန္တရာယ်မှ လွတ်ကင်းလျက် ပြုစု စောင့်ရှောက်ခြင်းကို ခံရလိမ့်မည်ဖြစ်၏။

15 ထို့နောက် နဂါးသည် မိန်းမအား ရီအဟုန်ဖြင့် မျော

ပါစီရန် မိမိ၏ ခံတွင်းမှ ရီကို မြစ်ရီစီးသကဲ့သို့ မှုတ်ထုတ် လိုက်၏။

¹⁶ သို့သော် မြီကြီးသည် မိမိ၏ခံတွင်းကို ဖွင့်၍ နဂါး မှုတ်ထုတ်လိုက်သော မြစ်ရီကို မျိုချကာ မိန်းမအား ကူညီ လေ၏။

¹⁷ ထိုအခါ နဂါးသည် ထိုမိန်းမကို ဒေါသထွက်သဖြင့် သူမ၏ ကျန်ကြွင်း သော သား မြီး များ တည်း ဟူသော ဘုရားသခင်၏ ပညတ်တော်များကို နာခံလိုက်လျှောက် ပြီး ယေ သျှု ဖော်ပြတော် မူသော သမ္မာတရားတော် ကို စွဲလမ်းသောသူရို့အား တိုက်ခိုက်ရန် ထွက်ခွာလား လေ၏။

¹⁸ နဂါးသည် ပင်လယ်ကမ်းခြံတွင် ရပ်နိန်၏။*

13

သားရဲနှစ်ကောင်

¹ ထို့နောက် ပင်လယ် ထဲ မှ ဦး ဂြို ဆယ် ချောင်း နှင့် ဦး ဂေါင်း ခုနစ် လုံး ဟိ သော သားရဲ တစ် ကောင် တက် လာသည်ကို ငါမြင်ရ၏။ သူ၏ ဦး ဂြို တစ် ချောင်း စီ၌ သရဖူဆောင်းထား၏။ သူ၏ ဦး ဂေါင်း တစ်လုံး စီ၌လည်း ဘုရားသခင်၏ဘုန်းတော်ကို ယူတ်ချသည့် အမည် ပါ ဟိ၏။

* **12:18** နဂါးသည် ပင်လယ်ကမ်းခြံတွင် ရပ်နိန်၏။ ဤကျမ်းပိုဒ်နှင့်ပတ်သက်၍ အချို့သော မူရင်းလက်ရိုးမူကျမ်းများတွင် ပြီးလျှင် ငါ ရပ်ခ၏။ ဟူ၍ ပါဟိသည်။ **13:1** ဗျာ ၁၇.၃၇-၁၂

၂ ငါမြင်ရသည့် သားရဲသည် ကျားသစ်နှင့် တူ၏။ သူ၏ခြံသည် ဝက် ဝံ ခြံ နှင့် တူ၍ သူ၏နှုတ်သည် ခြင်္သေ့၏နှုတ်နှင့် တူ၏။ နဂါးသည် မိမိ၏ တန်ခိုးနှင့် မိမိ၏ ပလ္လင်ကိုလည်းကောင်း၊ ကြီးမားသောအာဏာစက်ကိုလည်းကောင်း ထိုသားရဲအား ပီးအပ်လေ၏။

၃ သူ၏ဦး ဂေါ် င်း တစ်လုံး မှာ သီ လောက် သည့် ဒဏ်ရာရထားသကဲ့သို့ ဟိသော်လည်း ထိုဒဏ်ရာသည် ပျောက်ကင်း လျက် ဟိ၏။ မြို့ကြီး သား အပေါင်း ရို့သည် ထိုသားရဲအား အံ့ဩလျက် သူ၏နောက်သို့ လိုက်ကြကုန်၏။

၄ နဂါးသည် မိမိ၏အာဏာကို သားရဲအား အပ်နှင်းပီး သူဖြစ်သဖြင့် လူရို့သည် နဂါးကို ကိုးကွယ်ကြ၏။ လူရို့က “ဤသားရဲနှင့် ဇာသူတူပါသနည်း။ သူ့အား ဇာသူဆိုင်ပြိုင်တိုက်ခိုက်နိုင်ပါသနည်း” ဟု ဆိုလျက် သားရဲကိုလည်း ကိုးကွယ်ကြ၏။

၅ ထိုသားရဲသည် ကြွေးဝါ၍ ဘုရားသခင်အား ပြစ်မှားပြောဆိုခွင့်ကိုလည်းကောင်း၊ လေးဆယ့် နှစ်လပတ်လုံး အုပ်စိုးပိုင်သောအခွင့်ကိုလည်းကောင်း ရဟိတထား၏။

၆ သူသည် ဘုရားသခင်နှင့် ကိုယ်တော်၏ နာမတော်ကိုလည်းကောင်း၊ ကိုယ်တော် ကိန်းဝပ်တော် မူရာကိုလည်းကောင်း၊ ကောင်းကင်ဘုံ၌ စံစားသောသူရို့ကိုလည်းကောင်း ပြစ်မှားပြောဆိုရန် မိမိ၏နှုတ်ကို ဖွင့်လေ၏။

7 သူသည် ဘုရားသခင်၏လူ ရှိ အား တိုက်ခိုက်၍ အနိုင်ရသော အခွင့်နှင့် တိုင်းနိုင်ငံ အသီးသီး၌ဟံ သော ဘာသာစကား အမျိုးမျိုး ကို ပြောဆိုသော လူအမျိုး အနွယ်ခပ်သိမ်းအား အုပ်စိုးပိုင်သောအခွင့်ကိုလည်း ရဟံ ထား၏။

8 အသီသတ်ခြင်းကို ခံရသည့် သိုးသူငယ်တော်၏ အသက်စာစောင်တွင် လောကကို ဖန်ဆင်းတော်မမူခင်က ပင် စာရင်းဝင်သောသူရှိမှတစ်ပါး မြီကြီးသားအပေါင်းရှိ သည် ထိုသားရဲအား ကိုးကွယ်ကြလိမ့်မည်။

9 “ကြားစရာနား ဟံသောသူရှိသည်ကား ကြားကတ်ပါ စီ။

10 အဖမ်းခံရမည့်သူသည် အဖမ်းခံရမည်ဖြစ်၏။ ဒါး ဘေးနှင့် သီရမည့်သူသည်လည်း ဒါးဘေးနှင့် သီရမည် ဖြစ်၏။ ဤအကြောင်းကား ဘုရားသခင်၏လူ ရှိ သည် သည်းခံခြင်း၊ ယုံကြည်ခြင်း ဟိစီရန်ပင်ဖြစ်၏။”

11 ထို့နောက် အခြားသားရဲတစ်ကောင်ကို ငါ မြင်ရ၏။ သူသည် မြီကြီးထဲမှ ထွက်လာ၏။ သူ၌ သိုးဂြိုနှင့် တူသော ဦးဂြိုနှစ်ချောင်းဟိ၏။ သူသည် နဂါးကဲ့သို့ စကားပြော၏။

12 သူသည် ပထမသားရဲ၏ အာဏာဟိသမျှကို ထို သားရဲ၏ ရှိ၌ သုံးစွဲ၏။ သူသည် သီလောက်သည့်ဒဏ်ရာ မှ ပျောက်ကင်းသည့် ပထမသားရဲကို မြီကြီးသားရှိအား ကိုးကွယ်စီ၏။

13 ဒုတိယ သားရဲ သည် အံ့ ဩ ဖွယ်သော နိမိတ်

လက္ခဏာများကို ပြ၏။ လူ့အပေါင်းရို့၏ မျက်မှောက်၌ ကောင်းကင်မှ မြီကြီးထက်သို့ မီးများကျလာစီ၏။

14 သူသည် ပထမသားရဲ၏ ရှိ၌ ပြပိုင်ခွင့်ဟိသည့် နိမိတ်လက္ခဏာများကို ပြ၍ မြီကြီးသားရို့အား လှည့်ဖြားလေ၏။ ဒါးဒဏ်ရာကို ရဟိသော်လည်း အသက်ရှင်နိုင်သူ ထိုသားရဲအား ရှိသီဂုဏ်ပြုသည့် အနိန်ဖြင့် သူ၏ရုပ်တုကို ပြုလုပ်ရန် မြီကြီးသားရို့အား စီခိုင်း၏။

15 ဒုတိယ သားရဲသည် ထိုရုပ်တုအား စကားပြော နိုင်ရန် လည်းကောင်း၊ ထိုရုပ်တုအား မကိုးကွယ်သော သူ အပေါင်းရို့ကို သီစီနိုင်ရန် လည်းကောင်း၊ ရုပ်တု၌ အသက်ကို သွင်းပီးရသောအခွင့်ကိုလည်းကောင်း ရ၏။

16 ထိုသားရဲသည် ကြီးမြတ်သူနှင့် သိမ်ငယ်သူ၊ ချမ်းသာသူနှင့် ဆင်းရဲသူ၊ ကျွန်နှင့် ကျွန် မဟုတ်သောသူ၊ ဟိသမျှသောလူရို့အား လက်ယာလက်တွင်ဖြစ်စီ၊ နဖူးတွင်ဖြစ်စီ အမှတ်တံဆိပ်ရိုက်နှိပ်ထားစီ၏။

17 ထိုအမှတ်တံဆိပ်တည်းဟူသော သားရဲ၏ နာမည် ဖြစ်စီ၊ ထိုနာမည်ကို ကိုယ်စားပြုသော ကိန်းဂဏန်းဖြစ် စီ တစ်ခုခုကို ရိုက်နှိပ်မထားသောသူသည် ရောင်းဝယ်ခွင့် မရ။

18 ဤသည်ကား ဉာဏ်ပညာ ဟိစီရန်ပင် ဖြစ်၏။ ဉာဏ်ပညာဟိသောသူသည် သားရဲ၏ ကိန်းဂဏန်းအနက် ကို တွက်ချက်နိုင်၏။ ထိုကိန်းဂဏန်းသည် လူတစ်ယောက်၏ နာမည်ကို ကိုယ်စားပြု၏။ အကြောင်းမူကား

ထိုကိန်းဂဏန်းသည် ၆၆၆ ဖြစ်သတည်း။

14

သိုးသူငယ်တော်နှင့် သူ၏လူတိ

¹ ထို့နောက် ငါ ကြည့်လိုက်သောအခါ ဇိအန်တောင်ထက်တွင် သိုးသူငယ်တော် ရပ်နိန်သည်ကို မြင်ရ၏။ သူ၏နာမနှင့် ခမည်းတော်၏နာမ တော်ကို နဖူးထက်တွင် ရိုးမှတ်ထားသော လူပေါင်း ၁၄၄,၀၀၀ ရှိသည် သိုးသူငယ်တော်နှင့်အတူ ဟံကြ၏။

² ကောင်းကင်မှ သမုဒ္ဒရာဟုန်းသံနှင့် မိုးကြိမ်းသံကဲ့သို့သော အသံကို ငါကြားရ၏။ ထိုအသံသည် စောင်းသမား ရှိတီးသည့် စောင်းသံနှင့်တူ၏။

³ ထိုလူ ၁၄၄,၀၀၀ ရှိသည် ပလ္လင် တော် ရှိ၌ လည်းကောင်း၊ သက်ဟိသတ္တဝါလေးပါးနှင့် အကြီးအကဲ ရှိ၏ ရှိ၌ လည်းကောင်း ရပ်လျက် တေးခြင်းသစ်ကို သီဆိုကြ၏။ လူသားအပေါင်းရှိအထဲမှ ရွီးနုတ်ကယ်တင်ခြင်းခံရသောလူ ၁၄၄,၀၀၀ မှတစ်ပါး အခြားဇာသူမျှ ထိုတေးခြင်းကို မသီဆိုတတ်ကြ။

⁴ ထိုသူရှိသည် ကာမဂုဏ်ခံစားမှုနှင့် ကင်းလွတ်သော သူတို့ဖြစ်၍ သိုးသူငယ်တော် လားလေရာ အရပ်သို့ လိုက်ကြ၏။ သူရှိသည် လူတို့အထဲက ရွီးနုတ်ကယ်တင်ခြင်းကို ခံရသဖြင့် ဘုရားသခင်နှင့် သိုးသူငယ်တော်၏ အဦးသီးသော အသီးများဖြစ်ကြ၏။

⁵ သူရို့နှုတ်၌ မုသားမဟိ။ အပြစ်ကင်းစင်သော သူတိ ဖြစ်ကြ၏။

ကောင်းကင်တမန်သုံးပါး

⁶ ထို့နောက် ကောင်းကင်အလယ်တွင် တခြားသော ကောင်းကင်တမန် တစ်ပါး ပျံလျက် နိန်သည် ကို ငါ မြင် ရ၏။ သူသည် တိုင်းနိုင်ငံ အသီးသီး၌ဟိ သော ဘာသာစကား အမျိုးမျိုး ကို ပြောဆိုသော လူအမျိုး အနွယ် ခပ်သိမ်းရို့အား ဟောပြောရန် ထာဝရနှင့်ဆိုင် သော သတင်းကောင်းကို ယူဆောင်လာ၏။

⁷ ထိုကောင်းကင်တမန်က “ဘုရားသခင်ကို ကြောက်ရွံ့ ရှိသီ၍ ဂုဏ်တော်ကို ချီးမွမ်းကြလော့။ အကြောင်းမူကား ကိုယ်တော်၏ တရားစီရင် တော် မူ ရာ နိရက် သည် ရောက်လာယာ။ ကောင်းကင်နှင့် မြီကြီးကိုလည်းကောင်း၊ ပင်လယ်နှင့် စမ်းရီပေါက်များကိုလည်းကောင်း ဖန်ဆင်း တော် မူ သော အသျှင် ကို ကိုးကွယ် ကြ လော့” ဟု ကျယ်လောင်သောအသံဖြင့် ကြွေးကြော်လေ၏။

⁸ ထို့နောက် ဒုတိယ ကောင်းကင်တမန်သည် လာပြီး၊ “ဗာဗုလုန်မြို့ကြီး ပြိုကျလားယာ၊ ပြိုကျလားယာ။ ထိုမြို့ သည် ကာမဂုဏ်လိုက်စားမှုတည်းဟူသော စပျစ်ရည်ကို လူမျိုးတကာရို့အား တိုက်လေယာ” ဟု ကြွေးကြော်၏။

⁹ ထို့နောက် တတိယ ကောင်းကင်တမန်သည် လာ၍ “သားရဲနှင့် ထိုသားရဲ၏ရုပ်တု ကို ကိုးကွယ် ကာ ထို

သားရဲ၏ အမှတ်တံဆိပ်ကို နဖူး၌ ဖြစ်စီ၊ လက်၌ ဖြစ်စီ ရိုက်နှိပ်ထားသောသူသည်။

10 ဘုရားသခင်၏ အမျက်တော်ဖလားမှ ပြင်းထန်သော ဒေါသတည်းဟူသော စပျစ်ရည်ကို သောက်ရလိမ့်မည်။ ထိုသူသည် သန့်ယှင်းသောကောင်းကင်တမန်တို့နှင့် သိုး သူငယ်တော်၏ ရှိ၌ ကန်နှင့်ရောသော မီးထဲတွင် နှိပ်စက် ညှဉ်းခဲခြင်းကို ခံရလိမ့်မည်။

11 ထို ညှဉ်းခဲခြင်း၏ မီးခိုးသည် ထာဝရကာလ ပတ်လုံး အထက်သို့ တက် လျက် နိမ့်၏။ သားရဲ နှင့် ၎င်း၏ရုပ်တုကို ကိုးကွယ်၍၊ ၎င်း၏နာမည် တံဆိပ်ခတ် နှိပ်ခြင်းကို ခံရသောသူ အပေါင်းရှိသည် နို့ညမပြတ် သက်သာရာရလိမ့်မည် မဟုတ်” ဟု အသံကျယ်လောင်စွာ ကြွေးကြော်လေ၏။

12 ဤ ကား ဘုရားသခင်၏ပညတ် တော် ကို နာခံ လိုက် လျှောက်၍ ယေ သျှ၌ သစ္စာ ဟိ ကြ သော ဘုရားသခင်၏လူရို့အဖို့ သည်းခံနိုင်ခြင်း ဟိစီရန်ပင် ဖြစ်၏။

13 တဖန် “ရီး မှတ်ထား လော့။ အ ဂု အချိန် မှ စ၍ သခင်ဘုရား၌ သီလွန်သောသူရို့သည် မင်္ဂလာဟိကြ၏” ဟု ဆိုသော ကောင်းကင် မှ အသံကို ငါကြားရ၏။ ဝိညာဉ်တော်ကလည်း “အမှန်ပင် ဖြစ်၏။ သူရို့သည် ဆင်းရဲပင်ပန်းစွာ လုပ်ဆောင်ခြင်းမှ အနားယူခွင့်ကို ရ ဟိကြလိမ့်မည်။ အကြောင်းမူကား သူရို့၏ လုပ်ဆောင်

သော အကျိုးသည် သူရို့နှင့် အတူ လိုက်ပါလျက် ဟိ
သောကြောင့်ဖြစ်၏” ဟု မိန့်တော်မူ၏။

မြီကြီး၏ အသီးအနှံများကို ရိတ်သိမ်းခြင်း

¹⁴ ထို့နောက် ငါ ကြည့်လိုက်သောအခါ ဖြူသောမိုးတိမ်
တစ်ခုကို မြင်ရ၏။ ထိုမိုးတိမ်ထက်တွင် လူသားနှင့်
တူသော သူတစ်ဦးသည် ထိုင်နိမ့်၏။ သူ၏ ဦးဂေါင်း၌ ရွှံ့
သရဖူကို ဆောင်းထား၏။ လက်ထဲတွင် ပြတ်သောတန်း
စဉ်ကို ကိုင်ထား၏။

¹⁵ ထို့နောက် တခြားသော ကောင်းကင်တမန်တစ်ပါး
သည် ဗိမာန်တော်မှ ထွက်လာ၍ မိုးတိမ်ထက်တွင် ထိုင်
နိမ့်သောသူအား “မြီကြီးထက်၌ စပါးရိတ်သိမ်းရန် အချိန်
ရောက်လာပြီ ဖြစ်သောကြောင့်၊ ကိုယ်တော်၏ တန်းစဉ်
ကို ယူ၍ ရိတ်သိမ်းတော်မူပါ” ဟု အသံကျယ်လောင်စွာ
ပြောဆို၏။

¹⁶ ထို့ကြောင့် မိုးတိမ်ထက်တွင် ထိုင်နိမ့်သောသူက
မိမိ၏တန်းစဉ်ကို မြီကြီးထက်သို့ ဝှေ့ယမ်းကာ မြီကြီးမှ
စပါးများကို ရိတ်တော်မူ၏။

¹⁷ ထို့နောက် တခြားသော ကောင်းကင်တမန်တစ်ပါး
သည် ကောင်းကင်ဘုံ၌ ဟိသော ဗိမာန်တော်မှ ထွက်
လာ၏။ ထိုသူသည်လည်း ပြတ်သော တန်းစဉ်ကို ကိုင်
ထား၏။

¹⁸ ထို့နောက် မီးကို အစိုးရသော ကောင်းကင်တမန်
သည် ယဇ်ပလ္လင်တော်မှ ထွက်လာ၏။ သူသည် တန်း

စဉ်ကို ကိုင်ထားသည့် ကောင်းကင်တမန်အား “မြီကြီးထက်၌ စပျစ်သီး မှည့်နိန်ယာဖြစ်သောကြောင့် သင်၏တန်းစဉ်ကို ယူ၍ စပျစ်သီးများကို ရိတ်သိမ်းလော့” ဟု ကျယ်လောင်သောအသံဖြင့် ပြော၏။

¹⁹ သို့ဖြစ်၍ ထိုကောင်းကင်တမန်သည် မိမိတန်းစဉ်ကို ယူ၍ မြီကြီးထက်က စပျစ်သီးများကို ရိတ်သိမ်းလေ၏။ ထို့နောက် စပျစ်သီးများကို ဘုရားသခင်၏ အမျက်တော်တည်းဟူသော စပျစ်သီးနယ်ရာ ကျင်းထဲသို့ သွန်ချလိုက်၏။

²⁰ ထိုစပျစ်သီးများကို မြို့ပြင်တွင် နယ်၍ စပျစ်သီးနယ်ရာ တွင်းမှ မြင်းဇက်ကြိုးထိတိုင်အောင် သွီးချောင်းစီးထွက် လာ၏။ ထိုသွီးချောင်းသည် အလျားမိုင် ၂၀၀၊ အနက် ငါးပေခန့် ဟိသတည်း။

15

ကောင်းကင်တမန်တို့နှင့်အတူ နောက်ဆုံးသော ကပ်ဘေးများ

¹ ထို့နောက် ငါသည် ကောင်းကင်တွင် အံ့ဩဖွယ်ကောင်းသည့် အတိတ်နိမိတ်ကြီးတစ်ရပ်ကို မြင်ရပြန်၏။ ထိုအတိတ်နိမိတ်ကား ကပ်ဘေးခုနစ်ပါးကို ယူဆောင်လာသော ကောင်းကင်တမန် ခုနစ်ပါးဖြစ်၏။ ထိုကပ်ရောဂါများသည် ဘုရားသခင်၏ အမျက်တော်ကို အဆုံးသတ်

အကောင်အထည် ဖော်ခြင်းပင် ဖြစ်၍ နောက်ဆုံး ကျ
ရောက်လာမည့် ကပ်ဘေးများဖြစ်ပေ၏။

² ထို့နောက် မီးနှင့်ရောသည့် ဖန်ရီကန်နှင့်တူသော
အရာတစ်ခုကို ငါမြင်ရ၏။ သားရဲနှင့် သူ၏ရုပ်တုအား
လည်းကောင်း၊ ကိန်းဂဏန်း၏ နာမည်ကို ပိုင်ဆိုင်သူအား
လည်းကောင်း အောင်နိုင်သောသူရို့ကို ငါမြင်ရ၏။ သူရို့
သည် ဘုရားသခင် ပီးတော်မူသော စောင်းများကို ကိုင်
လျက် ဖန်ရီကန်အနားတွင် ရပ်လျက်နိန့်ကြ၏။

³ သူရို့သည် ဘုရားသခင်၏ အစီခံ မောသျှ၏ တေး
ခြင်းနှင့် သိုးသူငယ်တော်၏ တေးခြင်းကို သီဆိုကြ
သည်ကား၊

“အနန္တတန်ခိုးသျှင် ဘုရားသခင်၊ ကိုယ်တော်ပြုတော်မူ
သော အမှုများသည်

အလွန်ကြီးမြတ်၍ အံ့ဩဖွယ် ကောင်းလှပါသည်
တကား။

လူမျိုးတကာ*ရို့၏ ဘုရင်၊ ကိုယ်တော်သျှင်၏ နည်းလမ်း
တော်များသည်

အလွန်မျှတ မှန်ကန်လှပါသည်တကား။

⁴ အို ဘုရားသခင်၊ ကိုယ်တော်ကို မကြောက်ရွံ့ မရှိသီ၊ မ
ချိုးမွမ်းဘဲ ဇာသုန်နိန့်ပါမည်နည်း။

ကိုယ်တော် တစ်ပါး တည်း သာလျှင် သ န် ယှ င်း
မြင့်မြတ်တော်မူပါ၏။

* 15:3 လူမျိုးတကာ၊ အချို့သော မူရင်းလက်ရိုးမူကျမ်းများတွင်
ခေတ်ကာလ၊ ဟူ၍ ပါဟိသည်။

ကိုယ်တော် ပြုတော်မူသော အမှုများသည် ဖြောင့်မတ်
မှန်ကန်ကြောင်း ပေါ်လွင်ထင်ရှားသဖြင့်
လူမျိုးတကာ ရို့သည် ရှို့တော်သို့ လာ၍ ပျပ်ဝပ်
လျက် ချီးမွမ်းကိုးကွယ်ကြပါလိမ့်မည်”

ဟူ၍ ဖြစ်၏။

⁵ ထို့နောက် ကောင်းကင်ဘုံ၌ ပဋိညာဉ်တဲတော်ဟိရာ
ဗိမာန်တော်သည် ပွင့်လာသည်ကို ငါ မြင်ရ၏။

⁶ ထိုအခါ ကပ်ဘေးခုနစ်ပါးကို သယ်ဆောင်လာသော
ကောင်းကင်တမန် ခုနစ်ပါးသည် ဗိမာန်တော်ထဲမှ ထွက်
လာကြ၏။ သူရို့သည် ကြည်လင်တောက်ပသော ပိတ်
ချောထည်ကို ဝတ်ဆင်၍ ရှိရင်စည်းကို ပတ်ထားကြ၏။

⁷ ထို့နောက် သက်ဟိသတ္တဝါ လေးပါးအနက် တစ်ပါး
သည် ကာလ အစဉ် အ မြဲ အသက် ရှင်တော် မူ သော
ဘုရားသခင်၏ အမျက်တော် ပြည့် လျက် ဟိ သည့် ရှို့
ဖလားခုနစ်လုံးကို ကောင်းကင်တမန်ခုနစ်ပါးရို့အား ပီး
လေ၏။

⁸ ဘုရားသခင်၏ ဘုန်းတန်ခိုးတော်ကြောင့် ဗိမာန်
တော်သည် မီးခိုး နှင့် ပြည့် လျက် ဟိ၏။ သို့ ဖြစ်၍
ကောင်းကင်တမန် ခုနစ်ပါးသယ်ဆောင်လာသည့် ကပ်
ဘေးခုနစ်ပါး ပြီးဆုံးသည်ထိ ဇာသူမျှ ဗိမာန်တော်ထဲသို့
မဝင်နိုင်။

16

ဘုရားသခင်၏ အမျက်တော်ခွက်ဖလားများ

၁ ထို့နောက် မိမိတော် ထံမှ ကျယ်လောင်သော အသံထွက် ပေါ်လာ သည် ကို ငါ ကြား ရ၏။ ထို အသံ သည်ကား ကောင်းကင်တမန် ခုနစ် ပါး ရှိ အား “ဘုရားသခင်၏ အမျက်တော်ခွက်ဖလား ခုနစ်လုံးကို မြီကြီးသို့ သွန်းလောင်းလော့” ဟူ၍ ဖြစ်၏။

၂ ပထမကောင်းကင်တမန်သည် လား၍ မိမိ ခွက်ဖလား မှ အမျက်တော်ကို မြီကြီးထက်သို့ သွန်ချလိုက်၏။ ထိုအခါ သားရဲ၏ အမှတ်တံဆိပ်ခတ်နှိပ်ခြင်း ခံရသောသူ ရှိနှင့် သူ၏ ရုပ်တုကို ကိုးကွယ်ကြသော သူရှိတွင် အလွန် ဆိုးရွားသော အနာစိမ်းများ ပေါက်ကြလေ၏။

၃ ထို့နောက် ဒုတိယကောင်းကင်တမန်သည် မိမိခွက် ဖလားမှ အမျက်တော်ကို မြီကြီးသို့ သွန်ချလေ၏။ ထိုအခါ ပင်လယ်ရီသည် လူအသိကောင်၏ သွီးကဲ့သို့ ဖြစ် လေ၏။ ပင်လယ်ထဲ၌ အသက်ရှင်ကြကုန်သော သတ္တဝါ ဟူသမျှသည် သိဆုံးကြ၏။

၄ ထို့နောက် တတိယကောင်းကင်တမန်သည် မိမိ၏ခွက် ဖလားမှ အမျက်တော်ကို မြစ်များ၊ စမ်းပေါက်များ အထက်၌ သွန်ချလေ၏။ ထိုအခါ ရီများသည် သွီးအတိ ဖြစ်လေ၏။

၅ ရီကိုစောင့်သည့် ကောင်းကင်တမန်က “အတိတ် ပစ္စုပ္ပန်ကာလ၌ ဟိတော်မူ၍ သန့်ယှင်းမြင့်မြတ်တော် မူသော အသျှင်၊ ကိုယ်တော်၏ စီရင်တော်မူချက်သည် ဖြောင့်မတ်ပါ၏။

6 ထိုသူရို့သည် ဘုရားသခင်၏လူရို့နှင့် ပရောဖက်ရို့၏ သွီးကို လောင်းခကြသဖြင့် ကိုယ်တော်သည် သူရို့သောက်ရန် သွီးကို ပီးတော်မူထားယာ။ ထိုသူရို့သည်လည်း ခံထိုက်သော ပြစ်ဒဏ်ကို ခံရကြပါ၏” ဟု လျှောက်ထား၏။

7 ထို့နောက် ယဇ်ပလ္လင်မှ အသံတော်သည်ကား၊ “အနန္တတန်ခိုးသျှင် ဘုရားသခင်၊ ကိုယ်တော် စီရင်တော်မူချက်ရို့သည် မှန်ကန်၍ တရားမျှတပါ၏” ဟု လျှောက်ထားသည်ကို ငါကြားရ၏။

8 ထို့နောက် စတုတ္ထ ကောင်းကင်တမန်သည် မိမိ၏ခွက်ဖလားကို နီထက်သို့ သွန်ချလိုက်၏။ ထိုအခါ နီသည် လူတိအား အပူဟိန်ဖြင့် လောင်ကျွမ်းစီနိုင်သောအခွင့်ကို ရလေ၏။

9 လူရို့သည် အားကြီးသော အပူဟိန်ဖြင့် လောင်ကျွမ်းခြင်းကို ခံရသဖြင့် ကပ်ဘေးများကို အစိုးရသော ဘုရားသခင်၏နာမတော်ကို ကျိန်ဆဲကြ၏။ သို့သော် သူရို့သည် နောင်တရရန်နှင့် ကိုယ်တော်၏ ဂုဏ်တော်ကို ချီးမွမ်းဖို့ရန် ငြင်းပယ်ကြ၏။

10 ထို့နောက် ပဉ္စမကောင်းကင်တမန်သည် မိမိ၏ ခွက်ဖလားကို သားရဲ၏ပလ္လင်ထက်သို့ သွန်းလောင်းလေ၏။ ထိုအခါ သားရဲ၏ နိုင်ငံသည် မှောင်မိုက် အတိဖြစ်လေ၏။ ထိုနိုင်ငံသားရို့သည် ဝေဒနာခံရသောကြောင့် မိမိရို့၏ လျှာကို ကိုက်ကြလေ၏။

11 မိမိ ရှို့၏ ဝေဒနာ နှင့် အနာစိမ်း များ ကြောင့် ကောင်းကင် ဘုံ သျှင် ဘုရားသခင် ကို ကျိန်ဆဲ ကြ၏။ သို့ရာတွင် မိမိရှို့၏ ဆိုးညစ်သော အကျင့်များမှ နောင်တ မရကြ။

12 ထို့နောက် ဆဋ္ဌမ ကောင်းကင်တမန်သည် မိမိ၏ ဖလားကို ဥဖရတ်မြစ် ကြီးထက်သို့ သွန်ချလိုက်၏။ ထိုအခါ အရှိုအရပ်မှ လာသော သျှင်ဘုရင်ရှို့အတွက် လမ်းဖြစ်စီခြင်းငှာ မြစ်ရီသည် ခန်းခြောက်လားလေ၏။

13 ထို့နောက် ဖားနှင့်တူသည့် ညစ်ညူးသော ဝိညာဉ်သုံး ပါးကို ငါ မြင်၏။ သူ့ရှို့သည် နဂါး၊ သားရဲ၊ မိစ္ဆာပရောဖက် ရှို့၏ ခံတွင်းအသီးသီးမှ ထွက်လာကြ၏။

14 သူ့ရှို့သည် နိမိတ်လက္ခဏာများကို ပြနိုင်သော နတ်မိစ္ဆာများ၏ ဝိညာဉ်များဖြစ်ကြ၏။ အနန္တတန်ခိုးသျှင် ဘုရားသခင်၏ နိရိုက်ကြီး၌ စစ်ပွဲဝင်ရန် တစ်လောက လုံးတွင်ဟိသော သျှင်ဘုရင်တို့ကို စုရုံးခြင်းငှာ သူ့ရှို့သည် ထွက်လားကြ၏။

15 “နားထောင်ကြလော့၊ ငါသည် သူ့ခိုးကဲ့သို့ လာမည်။ သို့ဖြစ်၍ မိမိ၏အဝတ်များကို သတိနှင့်စောင့်ကြပ်သော သူသည် မင်္ဂလာဟိ၏။ အကြောင်းမူကား လူ့ရှို့၏ရှို့၌ အဝတ်မပါဘဲ သွားလာ၍ အရှက်မရစီရန် ဖြစ်၏။”

16 ထို့နောက် ဝိညာဉ်ရှို့သည် သျှင်ဘုရင်ရှို့အား ဟေမြဲ ဘာသာအားဖြင့် အာမဂေဒုန်ဟု နာမည်တွင်သော အရပ်

သို့ ခေါ်ဆောင်စုရုံးစီကြ၏။

17 သတ္တမကောင်းကင်တမန်သည် မိမိခွက်ဖလားကို လီထဲသို့ သွန်ချလိုက်၏။ ထိုအခါ ဗိမာန်တော်၏ အတွင်း၌ဟိသော ပလ္လင်တော်မှ “အမှု ပြီးယာ” ဟု ကျယ်လောင်သော အသံထွက်ပေါ်လာ၏။

18 ထို့နောက် လျှပ်စစ်ပြက်ခြင်း၊ အသံမြည်ခြင်း၊ မိုးကြိမ်းခြင်း၊ ငလျင်ပြင်းစွာလှုပ်ခြင်းများ ဖြစ်လေ၏။ လူသားမျိုးနွယ်ကို ဖန်ဆင်းကတည်းမှစ၍ ဤမျှလောက် ပြင်းထန်သော ငလျင်လှုပ်ခြင်း မဟိတဖူးပေ။

19 မြို့ကြီးသည် သုံးပိုင်းကွဲလေ၏။ အလုံးစုံသော တိုင်းနိုင်ငံ၌ ဟိသော မြို့များသည်လည်း ပြိုပျက်ကုန်၏။ ဘုရားသခင်သည် ဗာဗုလုန်မြို့ကြီးကို သတိရတော်မူလျက် မိမိ၏ခွက်ဖလားမှ ပြင်းထန်သော အမျက်တော်တည်းဟူသော စပျစ်ရည်ကို သောက်စီတော်မူ၏။

20 ကျွန်းဟိသမျှသည် ပျောက်လားကုန်၏။ တောင်များသည် ကွယ်ပျောက်လား၏။

21 အာကာပြင်မှ ပိဿာတစ်ရာမျှ အလီးချိန်ဟိသော မိုးသီးကြီးများသည် လူ့ရို့အထက်သို့ ကျကြကုန်၏။ ထိုဆိုးရွားလှသော မိုးသီးဘေးဒဏ်ကြောင့် လူ့ရို့သည် ဘုရားသခင်ကို ကျိန်ဆဲကြ၏။

17

ပြည့်တန်ဆာမကြီးနှင့် သားရဲတစ်ကောင်

¹ ထို့နောက် ဖလား ခုနစ် လုံး ကို ကိုင် ထား သော ကောင်းကင်တမန် ခုနစ်ပါးအနက် တစ်ပါးသည် ငါ့ပါး သို့ လာ၍ “လာလော့၊ မြစ်များအနားတွင် တည်ဟိသော မြို့ကြီးတည်းဟူသော ပြည့်တန်ဆာမကြီး ခံရသည့် အပြစ်ဒဏ်ကို သင့်အား ငါပြမည်။

² မြို့ကြီးထက်၌ဟိသော သျှင်ဘုရင်များသည် ထိုမိန်းမ နှင့် ကာမဂုဏ်ခံစားခဲ့ကြ၏။ လောကီသားရှိသည်လည်း သူမ၏ ကာမဂုဏ်ခံစားမှုတည်းဟူသော စပျစ်ရည်နှင့် မူးယစ်ခဲ့ကြ၏” ဟု ဆို၏။

³ ထို့နောက် ကောင်းကင်တမန် သည် ဝိညာဉ်တော် အားဖြင့် ငါ့အား တောကန္တာရသို့ ဆောင်ယူလေ၏။ ထို အရပ်တွင် နီရဲသောသားရဲထက်၌ ထိုင်နိန်သော မိန်းမတစ် ယောက်ကို ငါမြင်ရ၏။ သားရဲ၏ ကိုယ်တစ်ခုလုံးတွင် ဘုရားသခင်၏ ဘုန်းတော်ကို ယူတ်ချသည့် အမည်နာမ များကို ရိုးသားထား၏။ ထိုသူ၌ ဦးဂေါင်းခုနစ်လုံးနှင့် ဂြို ဆယ်ချောင်း ဟိ၏။

⁴ ထိုမိန်းမသည် အနီနှင့် မရမ်းစို့ရောင် အဝတ်များကို ဝတ်လျက် ၏၊ ကျောက်မျက်ရတနာ၊ ပုလဲ စသောတန်း ဆာများကို ဆင်ယင်ထား၏။ သူမသည် ကာမဂုဏ် လိုက်စား မှု ဆိုင်ရာ စက်ဆုပ်ရွံရှာ ဖွယ် ကောင်းသော ညစ်ညမ်းမှုများနှင့် ပြည့်နိန်သည့် ၏ ဖလား ကို ကိုင်

ထား၏။

⁵ သူမ၏ နဖူးထက်တွင် “ပြည့်တန်ဆာအပေါင်းနှင့် လောက၌ စက်ဆုပ်ဖွယ်ရာများ၏ မိခင်၊ ဗာဗုလုန်မြို့ကြီး” ဟူ၍ အနက်ဟိသော နာမကို ရီးထိုးထား၏။

⁶ ထိုမိန်းမသည် ဘုရားသခင် လူရို့၏ အသွီးကို လည်းကောင်း၊ ယေ သျှု အကြောင်းကို သက်သိခံသောကြောင့် အသတ်ခံရသော သူရို့၏ အသွီးကို လည်းကောင်း သောက်၍ ယစ်မူးလျက် ဟိသည်ကို ငါ တို့ မြင်ရ၏။

သူမကို မြင်ရသောအခါ ငါသည် လွန်စွာအံ့သြ၍ နိန့်၏။

⁷ ကောင်းကင်တမန်က “ဇာကြောင့် အံ့သြသနည်း” ဟု ငါ့ကို မိန်းမလေ၏။ “ထိုမိန်းမ၏ လျှို့ဝှက်သည့် အနက်အဓိပ္ပာယ်ကိုလည်းကောင်း၊ သူမစီးနိန်သော ဦးဂေါင်းခုနစ်လုံးနှင့် ဂြိုဟ်ဆယ်ချောင်းဟိသည့် သားရဲ၏လျှို့ဝှက်သည့် အနက်အဓိပ္ပာယ်ကိုလည်းကောင်း ငါပြောပြမည်။

⁸ သင်မြင်ရသည့် သားရဲသည် တစ်ခါက အသက်ရှင်ခသော်လည်း အဂူ အသက်မရှင် ယာ။ သူသည် တွင်းနက်ကြီးထဲမှ တက်လာပြီးလျှင် ဖျက်ဆီးခြင်းကို ခံရလိမ့်မည်။ လောကကို မဖန်ဆင်းခင်ကပင် အသက်စာစောင်စာရင်းတွင် မပါသူ မြီကြီးသားရို့သည် ထိုသားရဲကို မြင်သောအခါ အံ့သြကြလိမ့်မည်။ သူသည် အယင်က အသက်ရှင်ခ၏။ အဂူ အသက်မရှင်သော်လည်း နောက်

တဖန် အသက်ရှင်လာဦးမည်။

9 “ဤ အမှုအရာ နှင့် ပတ်သက်၍ ဉာဏ်ပညာ နှင့် အသိတရားဟိရန် လိုပေသည်။ ဦးဂေါင်းခုနစ်လုံးသည် မိန်းမထိုင်နိန်သည့် တောင်ခုနစ်လုံးကို ဆိုလို၏။ သျှင် ဘုရင်ခုနစ်ပါးကိုလည်း ဆိုလို၏။

10 ထိုသျှင်ဘုရင်ရို့ထဲမှ ငါးပါးကား သီကျလားခယာ။ တစ်ပါးသည် အသက်ရှင်လျက် ဟိ၏။ အခြားတစ်ပါး ကား မပေါ်ထွန်းသိမ့်ပေ။ ပေါ်ထွန်းလာလျှင်လည်း တဒဂ် မျှသာ အုပ်စိုးရလိမ့်မည်။

11 အယင်က အသက်ရှင်ခ၍ အဂုအသက်မရှင်သည့် သားရဲသည် အဋ္ဌမမြောက် ဘုရင်ဖြစ်၏။ သူသည် ဘုရင် ခုနစ်ပါးထဲက တစ်ပါးဖြစ်ပြီး ဖျက်ဆီးခံရလိမ့်မည်။

12 “သင် မြင် ရသည့် ဂြိုဆယ်ချောင်းတိ ကား မင်း အာဏာစက်ကို မရသိမ့်သော သျှင်ဘုရင် ဆယ်ပါး ဖြစ်၏။ သူရို့သည် သားရဲနှင့်အတူ တစ်နာရီစီ သျှင်ဘုရင် အဖြစ် အုပ်စိုးခွင့်ရမည့် သူတိဖြစ်၏။

13 ထိုဘုရင်ရို့တွင် ရည်ရွယ်ချက်တစ်ခုတည်း ဟိ ကြ၏။ သူရို့သည် မိမိရို့၏ တန်ခိုးအာဏာတိကို သားရဲ အား ပီးအပ်ကြ၏။

14 သူရို့သည် သိုး သူငယ်တော်ကို စစ်တိုက် ကြ လိမ့်မည်။ ထိုသူသည် အသျှင်တကာရို့၏ အသျှင်၊ ဘုရင်တကာရို့၏ ဘုရင်ဖြစ်တော်မူသောကြောင့် သူရို့ကို နှိမ်နင်းတော်မူလိမ့်မည်။ ကိုယ်တော်နှင့်အတူ ဟိသောသူ

ရို့သည်လည်း ခေါ်ယူတော်မူခြင်း ခံရသောသူ၊ ရှိုးကောက်
ခြင်း ခံရတော်မူသောသူ၊ သစ္စာဟံသောသူရို့ ဖြစ်ကြ၏”
ဟု ဆို၏။

15 ထို့နောက် ကောင်းကင်တမန် က ငါ့ အား
“ပြည့်တန်ဆာမ ထိုင်နိန်သောရီသည် တိုင်းနိုင်ငံ များ၊
ဘာသာစကားအမျိုးမျိုးကိုပြောသော လူမျိုးနွယ်များဖြစ်
ကြ၏။

16 သင်မြင်ရသော သားရဲနှင့် ဂြိုဟ်ဆယ်ချောင်းရို့သည်
ပြည့်တန်ဆာမကို မုန်းကြလိမ့်မည်။ သူရို့သည် သူမပါး
မှ ဟိသမျှကို ချွတ်ယူလျက် အဝတ်မဟိဘဲ ဖြစ်စီကြ
လိမ့်မည်။ သူမ၏အသားကို စား၍ သူမကို မီးတိုက်ကြ
လိမ့်မည်။

17 အကြောင်းမူကား ဘုရားသခင် မိန့်တော်မူသော
စကားများ အကောင်အထည် ပေါ်လာသည့် တိုင်အောင်
သူရို့သည် မိမိရို့၏ အခွင့်အာဏာများကို သားရဲအား
တညီတညွတ်တည်း အပ်ပီးကြစီရန် ကိုယ်တော်သည်
သူရို့၏စိတ်နှလုံးထဲ၌ မိမိ၏အကြံအစည်တော်ကို ထည့်
ထားတော်မူ၏။

18 “သင်မြင်ရသည့် မိန်းမကား မြို့ကြီးထက်၌ဟံသော
သျှင်ဘုရင်ရို့ကို အုပ်စိုးသော မြို့ကြီးဖြစ်သတည်း” ဟု
ဆို၏။

ဗာဗုလုန်မြို့ပျက်သုဉ်းခြင်း

¹ ထို့နောက် ကောင်းကင်မှ ဆင်းသက်လာသော အခြား ကောင်းကင်တမန် တစ်ပါး ကို ငါ မြင် ရ၏။ ထို သူ သည် ကြီးစွာ သောအခွင့်အာဏာ ဟိသော သူ ဖြစ်၏။ သူ၏အရောင်အဝါသည် မြိကြီးတစ်ပြင်လုံးကို ထွန်းလင်း တောက်ပစီ၏။

² သူသည် အသံကျယ်လောင်စွာဖြင့် “ဗာဗုလုန်မြို့ကြီး သည် ပျက်သုဉ်းလားယာ။ ဗာဗုလုန်မြို့ကြီး ပျက်သုဉ်း လားယာ။ အဂ္ဂု ထိုမြို့သည် နတ်ဆိုးတို့နှင့် ညစ်ညမ်း သော ဝိညာဉ်ဆိုးတို့ နီထိုင်ရာ၊ စက်ဆုပ်ဖွယ်ကောင်းသော ငှက်ဆိုးတို့ မှီခိုရာအရပ် ဖြစ်လေယာ။

³ အကြောင်းမူကား လူမျိုးအပေါင်းရှိသည် ထိုမြို့၏ ကာမဂုဏ်လိုက်စားမှုတည်းဟူသော စပျစ်ရည်နှင့် မူးယစ် နိန်ခသောကြောင့်ဖြစ်၏။ မြိကြီးထက်၌ဟိသော သျှင် ဘုရင်အပေါင်းရှိသည် ဗာဗုလုန်မြို့နှင့်အတူ ကာမဂုဏ် လိုက်စား ခကြ၏။ လောက၌ဟိသော ကုန်သည် ရှိ သည် လည်း ထိုမြို့၏ ကာမဂုဏ်စည်းစိမ် ခံစားမှု ကို အကြောင်းပြု၍ ချမ်းသာ ကြွယ်ဝ ကြ လေ၏” ဟု ကြွေးကြော်လေ၏။

⁴ ထို့နောက် ကောင်းကင်ဘုံက အခြားသောအသံကို ငါ ကြားရ၏။ ထိုအသံကား၊
“ငါ၏လူရို့၊ ထွက်လာကြလော့။

သူမ ပြု သော အပြစ် တိ၌ မ ပါ စီ ခြင်း ဌာ
လည်းကောင်း၊

သူမနှင့်အတူ အပြစ်ဒဏ်ကို မခံရစီခြင်းဌာ လည်းကောင်း
သူမပါးမှ ထွက်လာကြလော့။

⁵ အကြောင်းမူကား သူမ၏အပြစ်သည် မိုးကောင်းကင်
တိုင်အောင် မြင့်မား၍

သူမ၏ မတရားသောအမှုများကို
ဘုရားသခင် မှတ်မိတော်မူသောကြောင့်တည်း။

⁶ သူမသည် သင်ရိုးအား ပြုသည့်အတိုင်း သူမအား ပြုကြ
လော့။

သူမပြုသော အရာအားလုံးအတွက် နှစ်ဆပီးဆပ်ကြ
လော့။

သင်ရိုးအဖို့ သူမပျင်ဆင်ပီးသော ဖလား၌
နှစ်ဆပြင်းစွာသော သောက်စရာကို သူမအဖို့ ပျင်ဆင်
ပီးကြလော့။

⁷ သူမသည် မိမိကိုယ်ကို ချီးမြှောက်၍ စည်းစိမ်ခံစားသည်
နှင့်အမျှ

သူမအား ဝမ်းနည်းပူဆွီး ဆင်းရဲဒုက္ခ ရောက်စီကြ
လော့။

အကြောင်းမူကား သူမက ‘ငါသည် မိဖုရားဖြစ်၏။ မုဆိုးမ
မဟုတ်။’

ငါသည် ဇာခါမျှ ဝမ်းနည်းပူဆွီးရလိမ့်မည် မဟုတ်’
ဟု

ပြောဆိုနိမ့်သောကြောင့် ဖြစ်၏။

⁸ ဤအကြောင်းကြောင့် ရောဂါဘေး၊ ဝမ်းနည်းပူဆိုးခြင်း
ဘေး၊

အစာငတ်မွတ်ခေါင်းပါးခြင်းဘေးများသည်
သူမ ပါး၌ တစ်ရက်အတွင်း ကျရောက်လာလိမ့်မည်။

သူမသည် မီးယှို့ခြင်းကို ခံရလိမ့်မည်။
အကြောင်းမူကား သူမအား

တရားစီရင် တော် မူ သော ထာဝရ အ သျှ င်
ဘုရားသခင်သည်

တန်ခိုးကြီးတော်မူသောကြောင့် ဖြစ်သတည်း” ဟု ဆို၏။

⁹ သူမနှင့် ကာမဂုဏ်စည်းစိမ် ခံစားခကြသော မြို့ကြီး
တစ်ပြင်လုံး၌ ဟိသော ဘုရင်ရှိသည် သူမ၌ လောင်ကျွမ်း
လျက်ဟိသည့် မီးမှ မီးခိုးများကို မြင်သောအခါ ငိုကြွေး
မြည်တမ်းကြလိမ့်မည်။

¹⁰ သူရှိသည် သူမခံရသည့် ဝေဒနာကို ကြောက်ရွံ့၍ အ
ဝီးမှရပ်လျက် “တန်ခိုး ကြီးသောမြို့၊ ကြီးမြတ်သော ဗာဗု
လုန်မြို့၊ ဖြစ်ရလေခြင်း၊ ဖြစ်ရလေခြင်း။ သင်သည် တစ်
နာရီအတွင်း၌ ပြစ်ဒဏ်စီရင်ခြင်းကို ခံရလေပြီတကား”
ဟု ဆိုကြ၏။

¹¹ မြို့ကြီး၌ဟိသော ကုန်သည်ကြီးရှိသည်လည်း မိမိ
ရှိ၏ ကုန်ပစ္စည်းများကို ဝယ်ယူမည့် သူတစ်ယောက်မျှ
မဟိသဖြင့် ငိုကြွေးမြည်တမ်းကြ၏။

¹² သူရှိ၏ ကုန်ပစ္စည်းများကား ချွံ၊ ငွေ၊ ကျောက်မျက်
ရတနာ၊ ပုလဲ၊ ပိတ်ချောထည်၊ နီမောင်းသောအထည်၊ ဖဲ
နီထည်၊ ကတ္တီပါ၊ နံ့သာသစ်သားအမျိုးမျိုး၊ ဆင်စွယ်၊

အဖိုးတန်သစ်သား၊ ကြီး၊ သံနှင့် ကျောက်ဖြူများဖြင့် ပြုလုပ်ထားသော ပစ္စည်းအမျိုးမျိုး၊

¹³ သစ်ကြံပိုးပင်၊ ဟင်းခပ်အမွှီးအကြိုင်၊ နံ့သာပေါင်း၊ မုရန်၊ ဆီမွှီး၊ လောဗန်၊ စပျစ်ရည်၊ ဆီ၊ ဂျုံဆန်နှင့် ဂျုံမှုန့်၊ ကျွဲနှင့် သိုး၊ မြင်းနှင့် ရထား၊ ကျွန်နှင့် လူ၏စိတ်ဝိညာဉ်များပင် ဖြစ်ကြလေ၏။

¹⁴ ကုန်သည်ကြီး ရို့က ထိုမြို့အား “သင် လိုချင်တောင့်တသော ကောင်းသောအရာများသည် မဟိယာ။ သင်၏ စည်းစိမ်ချမ်းသာနှင့် ဂုဏ်အသရေများသည် လည်း ကွယ်ပျောက်လားခယာ။ ထိုအရာများကို သင်သည် နောက်တဖန် ရလိမ့်မည် မဟုတ်” ဟု ဆိုကြ၏။

¹⁵ ဗာဗုလုန်မြို့ကို အမှီပြု၍ ထိုကုန်ပစ္စည်းများကို ရောင်းဝယ်ခြင်းအားဖြင့် ချမ်းသာကြွယ်ဝလာသော ကုန်သည်ကြီးရို့သည် ထိုမြို့ ခံရသည့်ဘေးဒဏ်ကြောင့် ကြောက်ရွံ့တုန်လှုပ်ကာ အဝီးမှ ရပ်လျက်၊

¹⁶ “ဖြစ်ရလေခြင်း၊ ဖြစ်ရလေခြင်း။ ပိတ်ချောထည်၊ နီမောင်းသောပိုးထည်၊ အနီရောင် အဝတ်အထည်၊ ရွှံ့တန်ဆာ၊ ကျောက်မျက်ရတနာတန်ဆာ၊ ပုလဲတန်ဆာများကို ဝတ်ဆင်ထားသော မြို့ကြီးသည်၊

¹⁷ ဤစည်းစိမ်ဟိသမျှကို တစ်နာရီအတွင်း၌ ဆုံးယှုံးရပါသည်တကား” ဟု ငိုကြွေးကြလိမ့်မည်။

ခပ်သိမ်းသော သင်္ဘောသူကြီးများနှင့် ခရီးသည်အပေါင်းရို့သည် လည်းကောင်း၊ သင်္ဘောသားများနှင့်

ရီကြောင်း ကုန်သွယ်မှုကို ပြုကြသူ အပေါင်း ရို့သည် လည်းကောင်း အဝီးက ရပ်နိန့်ကြ၏။

18 ထိုမြို့ကို ကျွမ်းလောင်စီသော မီးလျှံများမှ မီးခိုးများကို သူရို့ မြင်သောအခါ “ဇာခါ၌မျှ ဤမြို့ကြီးကဲ့သို့ ကြီးကျယ်ခမ်းနားသော မြို့မဟိခဖူးပါ” ဟု အော်ဟစ်ကြ၏။

19 သူရို့သည် မြို့မှန်များကို မိမိရို့ဂေါင်းထက်၌ ကြဲဖြန့်လျက် “မဟာမြို့ကြီးသည်ကား ဖြစ်ရလေခြင်း၊ ဖြစ်ရလေခြင်း။ ပင်လယ်ကူး သင်္ဘောပိုင်သူ၌ အပေါင်းကို ကြွယ်ဝချမ်းသာစီသော မြို့ကြီးသည် တစ်နာရီအတွင်း ဟိသမျှ ဆုံးယှုံးပါသည်တကား” ဟု ငိုကြွေးမြည်တမ်းကြ၏။

20 ကောင်းကင်ဘုံသားရို့၊ ထိုမြို့ ပျက်စီးသည့်အတွက် ဝမ်းမြောက်ကြလော့။ ဘုရားသခင်၏လူများ၊ တမန်တော်များ၊ ပရောဖက်များ ဝမ်းမြောက်ကြလော့။ အကြောင်းမူကား ထိုမြို့သည် သင်ရို့အား ပြုခသမျှအတွက် ဘုရားသခင်သည် ထိုမြို့ကို ပြစ်ဒဏ်စီရင်တော်မူဟာ။

21 ထို့နောက် ခွန်အားကြီးသော ကောင်းကင်တမန်တစ်ပါးသည် ကြိတ်ဆုံကျောက်ကြီးတစ်ခုလောက်ဟိသော ကျောက်တုံးတစ်တုံးကို ယူ၍ ပင်လယ်ထဲသို့ ပစ်ချလိုက်ပြီးလျှင် “ဗာဗုလုန်မြို့ကြီးသည် ဤသို့ ပစ်ချခြင်းကို ခံရလိမ့်မည်။ နောက်တဖန် ထိုမြို့ကို ပြန်၍ တွံ့မြင်ကြ

ရလိမ့်မည် မဟုတ်။

22 သင်၌ စောင်းသမား၊ တေးဂီတသမား၊ ပလ္လေသမား၊ တံပိုးခရာသမားရှိ၏။ တီးမှုတ်သောအသံကို နောက်တဖန် ကြားရလိမ့်မည် မဟုတ်။ သင့်ထံ၌ ဇာအလုပ်သမားကိုမျှ တို့ရလိမ့်မည် မဟုတ်။ ကြိတ်ဆုံ အသံကိုလည်း ကြားရလိမ့်မည် မဟုတ်။

23 သင်သည် ဇာခါမျှ ဆီမီး၏ အလင်းရောင်ကို မြင်ရလိမ့်မည် မဟုတ်။ မင်္ဂလာဆောင်သတို့သားနှင့် သတို့သမီး၏ အသံကိုလည်း ဇာခါမျှ ကြားရလိမ့်မည် မဟုတ်။ အကြောင်းမူကား သင်၏ကုန်သည်ကြီးရှိကား တစ်လောကလုံး၌ သြဇာအာဏာကြီးမားသော သူရှိဖြစ်ကြ၏။ သင်သည် လူမျိုးတကာရှိကို စုန်းအတတ်ဖြင့် ပြုစားကာ မှောက်မှားလမ်းလွဲ စီပြီးဖြစ်ယာ” ဟု ဆိုလေ၏။

24 ဗာဗုလုန်မြို့ အပြစ်ဒဏ်ခံရသည်မှာ ထိုမြို့တွင် ပရောဖက်ရှိ၏ အသွီး၊ ဘုရားသခင်၏လူရှိ၏ အသွီး၊ မြို့ကြီးထက်တွင် အသတ်ခံရသော သူအပေါင်းရှိ၏ အသွီးများကို တို့ဟိရသော ကြောင့်ဖြစ်၏။

19

1 ထို့နောက် ကောင်းကင်၌ များစွာသောလူအုပ်ကြီး၏ အသံနှင့်တူသည့်အသံကို ငါ ကြားရ၏။ ထိုသူရှိက “ဘုရားသခင်၏ ဂုဏ်တော်ကို ချီးမွမ်းကြလော့။ ငါ့ရှိ

ဘုရားသခင်သည် ကယ်တင်ခြင်း၊ ဘုန်းတော်၊ တန်ခိုးတော်နှင့် ပြည့်စုံတော်မူသော အသျှင်ဖြစ်တော်မူပါ၏။

² ကိုယ်တော်၏ တရားစီရင်တော် မူချက် ရှိသည် မှန်ကန်ပြီး ဖြောင့်မတ်ပါ၏။ မိမိ၏ ကာမဂုဏ်ဖြင့် မြီကြီးသားရှိအား ဖောက်ပြန်ပျက်စီးစီသော ပြည့်တန်ဆာမကြီးကို ကိုယ်တော်သည် ပြစ်ဒဏ်ပီးတော်မူ၏။ ကိုယ်တော်၏ အစီခံရှိ ကို သတ်ခသောကြောင့် ကိုယ်တော်သည် ထိုမိန်းမအား ဒဏ်ခတ်တော်မူယာ” ဟု ကြွေးကြော်ကြ၏။

³ တဖန် ထိုသူရှိက “ဘုရားသခင်၏ ဂုဏ်တော်ကို ချီးမွမ်းကြလော့။ ထိုမြို့မှ မီးခိုးများသည် ထာဝရအစဉ်အဆက် လွင့်တက်လျက် ဟိ၏” ဟု ကြွေးကြော်၏။

⁴ ထိုအခါ အသက်ကြီးသူ ၂၄ ပါးနှင့် သက်ဟိသတ္တဝါလေးပါးရှိက “အာမင်၊ ဘုရားသခင်၏ဂုဏ်တော်ကို ချီးမွမ်းကြလော့” ဟု ဆိုကာ ပလ္လင်တော်ထက်တွင် စံနံနံတော်မူသော ဘုရားသခင်အား ပျပ်ဝပ် ကိုးကွယ်ကြ၏။

သိုးသူငယ်တော်၏ မင်္ဂလာပွဲ

⁵ “ဘုရားသခင်၏ အစီခံအပေါင်းရှိနှင့် လူအားလုံးရှိ၊ ကိုယ်တော့်ကို ကြောက်ရွံ့ရှိသီသောသူ အကြီးအငယ် အပေါင်းရှိ ငါရှိ ဘုရားသခင်၏ဂုဏ်တော်ကို ချီးမွမ်းကြလော့” ဟု ပလ္လင်တော်မှ အသံထွက်ပေါ်လာ၏။

⁶ ထို့နောက် လူပရိသတ် ကြီး၏ အသံ ကဲ့သို့ လည်းကောင်း၊ အဟုန် ဖြင့် စီးသော ရီသံ ကဲ့သို့

လည်းကောင်း၊ မိုးခြိမ်းသံကဲ့သို့ လည်းကောင်း ထွက်
ပေါ်လာသော အသံကို ငါကြားရ၏။ ထိုအသံကြီးက
“ဘုရားသခင်၏ ဂုဏ်တော်ကို ချီးမွမ်းကြလော့။ အနန္တ
တန်ခိုးသျှင် ငါရှိ၏၊ ဘုရားသခင်သည် အုပ်စိုးတော်မူယာ။

⁷ သိုးသူငယ်တော်၏ မင်္ဂလာပွဲ အချိန် ကျရောက်ပြီဖြစ်
သောကြောင့် ငါရှိသည် ဝမ်းမြောက်ရွှင်လန်းလျက် ဘုန်း
တော်ကို ချီးမွမ်းကြကုန်အံ့။ ကိုယ်တော်၏ သတို့သမီး
သည် မိမိကိုယ်ကို အသင့်ပျင်ဆင် ထားယာ။

⁸ သူမသည် ဝတ်ဆင်ရန် စင်ကြယ်သော ပိတ်ချော
ထည်ကို ရထားယာ” ဟု ဆို၏။ (ထိုပိတ်ချောထည်ကား
ဘုရားသခင်လူရှိ၏ ကောင်းသော အကျင့်တံကို ဆိုလို
သတည်း။)

⁹ ထို့နောက် ကောင်းကင်တမန်က “သိုးသူငယ်တော်၏
မင်္ဂလာပွဲသို့ ဖိတ်ခေါ်ခြင်း ခံရသောသူရှိသည် မင်္ဂလာ
ဟိကြ၏ဟု ရီးမှတ်ထားလော့” ဟူ၍ လည်းကောင်း “ဤ
စကားသည် ဘုရားသခင်၏နှုတ်တော်ထွက် စကားအမှန်
ပင် ဖြစ်၏” ဟူ၍ လည်းကောင်း ငါ့အား ပြောဆို၏။

¹⁰ ထိုအခါ ငါသည် ထိုသူကို ကိုးကွယ်ခြင်းငှာ သူ၏ခြံ
ရင်းတွင် ပျပ်ဝပ်၏။ သို့ရာတွင် ကောင်းကင်တမန်က
“ဤသို့ မပြုကေ၊ ငါသည် အသျှင်ယေသျှု၏အကြောင်း
ကို သက်သိခံသော သင်နှင့် သင်၏ညီအစ်ကိုမောင်နှမရှိ
နှင့်အတူ လုပ်ဆောင်သူ တစ်ဦးသာ ဖြစ်၏။ ဘုရားသခင်

ကိုသာ ကိုးကွယ်လော့” ဟု ဆို၏။

အကြောင်းမူကား အသျှင်ယေသျှု ဖော်ပြတော်မူသော သမ္မာတရားသည် ပရောဖက်ရှိအား လှုံ့ဆော်သောအရာ ဖြစ်၏။

မြင်းဖြူစီးတော်မူသောအသျှင်

¹¹ ထို့နောက် ကောင်းကင်ဘုံ ပွင့်လျက်နိန်သည်ကို ငါ မြင်ရ၏။ ထိုအရပ်တွင် မြင်းဖြူတစ်ကောင် ဟိ၏။ ထို မြင်းကို စီးသောသူသည် သစ္စာဟိသောသူနှင့် သမ္မာ တရားဟိသောသူ ဟူ၍ နာမည် ဟိ၏။ ထိုအသျှင် သည် ဖြောင့်မတ်စွာ တရားစီရင်တတ်၏။ တရားသဖြင့် စစ်တိုက်တတ်၏။

¹² သူ၏ မျက်လုံးများသည် မီးလျှံကဲ့သို့ တောက်ပ လျက် ဟိ၏။ သူ၏ ဦးဂေါင်းတွင် သရဖူများကို ဆောင်း ထား၏။ သို့သော် မိမိမှတစ်ပါး အခြားမည်သူမျှ မသိ သော နာမည်ကို သူ၏အထက်မှာ ရီးမှတ်ထား၏။

¹³ ထိုအသျှင်သည် အသွီး၌ နှိုက်ထားသော အဝတ် ကို ဝတ်ဆင်ထား၏။ သူ၏နာမည်ကား “ဘုရားသခင်၏ နှုတ်ကပတ်တော်” ဟူ၍ ဖြစ်၏။

¹⁴ ကောင်းကင်ဗိုလ်ခြေရှိသည် စင်ကြယ်သည့် ပိတ် ချောဖြူထည်ကို ဝတ်ဆင်ကာ မြင်းဖြူများစီးလျက် ထို အသျှင်၏ နောက်တော်မှ လိုက်ကြ၏။

15 လူအမျိုးမျိုးရှိကို နှိမ်နင်းရန်အတွက် ကိုယ်တော်၏ ခံတွင်း မှ ထက်သော သန်လျက် ထွက် တော် မူ၏။ ကိုယ်တော်သည် ထိုသူရှိကို သံလုံတံဖြင့် အုပ်စိုးတော် မူလိမ့်မည်။ သူသည် အနန္တတန်ခိုးသျှင် ဘုရားသခင်၏ ပြင်းစွာသော အမျက်တော်တည်းဟူသော စပျစ်သီးနယ် ရာကျင်းကို နင်းတော်မူလိမ့်မည်။

16 ကိုယ်တော်၏ ဝတ်လုံတော် နှင့် ပေါင်တော်တွင် “ဘုရင်တကာရှိ၏ ဘုရင်၊ အသျှင်တကာရှိ၏ အသျှင်” ဟူသော နာမကို ရိုးထားလျက် ဟိ၏။

17 ထို့နောက် နီထက်တွင် ကောင်းကင်တမန်တစ်ပါး ရပ် လျက် နိန်သည်ကို ငါမြင်ရ၏။ သူသည် ကောင်းကင် အလယ်တွင် ပျံသန်းနိန်သော ငှက်အပေါင်းရှိအား “လာ ကြ၊ ဘုရားသခင်၏ စားပွဲတော်ကြီးသို့ စုဝေးကြလော့။

18 သင်ရှိသည် သျှင်ဘုရင်ရှိ၊ ဗိုလ်ချုပ်ကြီးရှိ၊ စစ်သူရဲ ရှိ၊ မြင်းစီးသူရဲရှိ၊ မြင်းများ၊ လူကြီးလူငယ်ရှိ၊ ကျွန်နှင့် ကျွန် မဟုတ်သော သူရှိ၏အသားကို စားကြရလိမ့်မည်” ဟု အသံကျယ်စွာ ကြွေးကြော်လေ၏။

19 ထို့နောက် သားရဲနှင့် မြို့ကြီးထက်၌ဟိသော သျှင် ဘုရင်ရှိနှင့် သူရှိ၏စစ်သည် ဗိုလ်ပါရှိသည် မြင်းစီးတော် မူသော အသျှင်နှင့် တိုက်ခိုက်ရန် စုရုံးကြသည်ကို ငါမြင် ရ၏။

20 သားရဲနှင့်တကွ သူ၏ရှိတွင် နိမိတ်လက္ခဏာများ

ကိုပြသော မိစ္ဆာပရောဖက်သည် အဖမ်းခံရ၏။ ထိုမိစ္ဆာ ပရောဖက်သည်ကား သားရဲ၏အမှတ်တံဆိပ်ကို ခံယူ၍ သူ၏ရုပ်တုကို ရှို့ခိုးသူ ရှို့အား နိမိတ်လက္ခဏာများ ကို ပြခြင်းအားဖြင့် လိမ်လည်လှည့်ဖျားသောသူ ဖြစ်သတည်း။ ထိုသူနှစ်ယောက်စလုံးသည် အသက်ရှင်လျက် ပင် တောက်လောင်နိန်သော ကန်နှင့်ရောသော မီးအိုင်ထဲ သို့ ပစ်ချခြင်းကို ခံရကြ၏။

²¹ ကျန်ကြွင်းသောသူရို့သည်ကား မြင်းဖြူကို စီးတော်မူသော အသျှင်၏ခံတွင်းမှ ထွက်လာသော သန်လျက်ဖြင့် ကွပ်မျက်ခြင်းကို ခံရကြ၏။ ငှက်အပေါင်းရို့သည် သူရို့၏အသားကို ဝစွာ စားကြ၏။

20

အနှစ်တစ်ထောင်

¹ ထို့နောက် ကောင်းကင်တမန်တစ်ပါးသည် တွင်းနက်ကြီး၏ သော့ကိုလည်းကောင်း၊ သံကြိုးကြီးတစ်ချောင်းကိုလည်းကောင်း မိမိ၏လက်၌ ကိုင်လျက် ကောင်းကင်မှ ဆင်းလာသည်ကို ငါမြင်ရ၏။

² သူသည် ရှို့မြွေနဂါးကြီးကို ဖမ်းဆီးပြီးလျှင် သံကြိုးဖြင့် အနှစ်တစ်ထောင်တိုင်တိုင် ချိုင့်ထား၏။ ထိုနဂါးကား နတ်မိစ္ဆာ၏ဘုရင် စာတန်မာရ်နတ်ပင်ဖြစ်၏။

³ ကောင်းကင်တမန်သည် နဂါးကို တွင်းနက်ကြီးထဲသို့ ပစ်ချကာ တွင်းကို ပိတ်ပြီး အနှစ်တစ်ထောင်ကုန်ဆုံး

သည့်တိုင်အောင် လူမျိုးတကာရို့အား မလှည့်ဖျားနိုင်စီ
ခြင်းငှာ တံဆိပ်ခတ်နှိပ်၍ ထား၏။ ထိုကာလပြီးနောက်
သူ့အား ခေတ္တခဏ လွတ်ပီးရမည်။

4 ထို့နောက် ငါသည် ပလ္လင်များကို မြင်ရ၏။ ယင်း
ပလ္လင် များ ထက် တွင် ထိုင် နိမ့်သူများ မှာ တရားစီရင်
ရန် အခွင့်အာဏာဟိသောသူများ ဖြစ်၏။ ထို့ပြင် ယေ
သျှု ဖော်ပြတော်မူသော သမ္မာတရားနှင့် ဘုရားသခင်၏
နှုတ်ကပတ်တော်ကို ဟောပြောကြေငြာသည့်အတွက်
ကွပ်မျက်ခြင်းကို ခံရကြသော သူရို့၏ ဝိညာဉ်များ
ကိုလည်းကောင်း ငါမြင်ရ၏။ သူရို့သည် သားရဲနှင့်
သားရဲ၏ ရုပ်တုကို ရှိမခိုးခကြ။ မိမိရို့၏နဖူးနှင့် လက်
များတွင်လည်း သားရဲ၏အမှတ်တံဆိပ်ကို မခံယူခကြ။
သူရို့သည် အသက် ပြန်ရှင်လာကြပြီးလျှင် ခရစ်တော်နှင့်
အတူ ဘုရင်များအဖြစ်ဖြင့် အနှစ်တစ်ထောင်အုပ်စိုးကြ
ရ၏။

5 (သီလွန်သော သူရို့ထဲမှ ကျန်ကြွင်းသော အနှစ်
တစ်ထောင် ကုန်လွန်ပြီးမှ အသက်ပြန်ရှင်ကြရ၏။)
ဤသည်ကား သီဆုံးလားသောသူရို့အား ဘုရားသခင်
သည် ပထမအကြိမ် ရှင်ပြန်ထမြောက်စီတော်မူခြင်း ဖြစ်
သတည်း။

6 ယင်းသို့ ပထမအကြိမ် ရှင်ပြန်ထမြောက်ခြင်းတွင်
ပါဝင်သော သူရို့သည် မင်္ဂလာဟိသောသူ၊ သန့်ယှ
င်းသောသူများ ဖြစ်ကြ၏။ ဒုတိယသီခြင်းသည် သူ

ရို့အား အစိုးမရနိုင် ယာ။ သူ့ရို့သည် ဘုရားသခင်နှင့် ခရစ်တော်၏ ယဇ်ပုရောဟိတ်များ ဖြစ်၍ ခရစ်တော်နှင့် အတူ အနှစ်တစ်ထောင်တိုင်တိုင် အုပ်စိုးကြရလိမ့်မည်။

စာတန်မာရ်နတ်၏ ယှုံးနိမ့်ခြင်း

7 ထို့နောက် အနှစ် တစ် ထောင် ကုန် လွန် သောအခါ စာတန်သည် အကျဉ်းကျရာမှ လွတ်လာပြီးလျှင်၊

8 ဂေါဂနှင့် မာဂေါဂ ဟု ခေါ်သော ကမ္ဘာ့အရပ် လေးမျက်နှာ၌ဟိသော လူမျိုးအပေါင်းရို့အား လှည့်ဖျား လျက် စစ်တိုက်ရန် စုဝေးစီလိမ့်မည်။ သူ့ရို့သည် အရီ အတွက်အားဖြင့် သမုဒ္ဒရာသဲလုံးနှင့်အမျှ များသတည်း။

9 သူ့ရို့သည် မြို့ကြီး မျက်နှာပြင်သို့ တက်လာပြီး လျှင် ဘုရားသခင် လူ့ရို့၏တပ် စခန်းနှင့် ကိုယ်တော် နှစ်သက်တော်မှုသော မြို့ကို ဝိုင်းထားကြ၏။ သို့ရာတွင် ကောင်းကင်မှ မီးကျသဖြင့် သူ့ရို့ကို လောင်ကျွမ်းလေ၏။

10 ထို့နောက် သူ့ရို့အား လမ်းလွဲစီသောသူ မာရ်နတ် သည်လည်း ကန်နှင့်ရောသော မီးအိုင်ထဲသို့ ပစ်ချခြင်း ကို ခံရလေ၏။ မှားယွင်းသော ပရောဖက်ရို့သည် သားရဲ နှင့်တကွ ထိုအိုင်ထဲသို့ ပစ်ချခြင်းကို ခံရပြီးဖြစ်၏။ သူ့ ရို့သည် ကမ္ဘာ့အဆက်ဆက် နိဗ္ဗာန်မပြတ် ညှဉ်းပန်းနှိပ်စက် ခြင်းကို ခံရကြလတုံတုံ။

နောက်ဆုံး တရားစီရင်ခြင်း

11 ထို့နောက် ပလ္လင်ဖြူကြီးကိုလည်းကောင်း၊ ယင်း ပလ္လင်ပေါ်တွင် စံနိန်တော်မူသော အသျှင်ကိုလည်းကောင်း ငါမြင်ရ၏။ ကမ္ဘာမြီကြီးနှင့် မိုးကောင်းကင်သည် ထိုအသျှင်၏ ရှို့တော်မှောက်မှ ရှို့လျားပျောက်ကွယ် လားကြကုန်၏။

12 သီလွန်လားသော လူကြီးလူငယ်ရှိသည် ပလ္လင်တော်ရှိ၌ ရပ်လျက်နိန်ကြသည်ကိုလည်းကောင်း၊ စာစောင်များကို ဖွင့်သည်ကိုလည်းကောင်း ငါမြင်ရ၏။ ထို့နောက် အသက်စာစောင်တည်းဟူသော အခြားစာစောင်ကို ဖွင့်လိုက်၏။ သီလွန်လားသောသူရှိသည် ထိုစာစောင်များတွင် မှတ်တမ်းတင်ထားသည့် မိမိရှိ၏ အကျင့်များနှင့် အညီ တရားစီရင်ခြင်းကို ခံရကြ၏။

13 သမုဒ္ဒရာသည် မိမိ၌ သီလွန်သောသူရှိကို ပီးအပ်လေ၏။ သီမင်းနှင့် မရဏာနိုင်ငံသည်လည်း မိမိရှိ၌ဟိသော သီလွန်သောသူရှိကို ပီးအပ်ကြ၏။ လူအပေါင်းရှိသည် မိမိရှိ အကျင့်အလျောက် တရားစီရင်ခြင်းကို ခံရကြ၏။

14 ထို့နောက် သီမင်းနှင့် မရဏာနိုင်ငံသည် မီးအိုင်ထဲသို့ ပစ်ချခြင်းကို ခံရကြ၏။ ဤမီးအိုင်သည် ဒုတိယသေခြင်း ဖြစ်သည်။

15 အသက်စာစောင်တွင် စာရင်းမဝင်သောသူ ဟိသမျှရှိသည် မီးအိုင်ထဲသို့ ပစ်ချခြင်းကို ခံရကြ၏။

21

ကောင်းကင်သစ်နှင့် မြီကြီးသစ်

¹ ထို့နောက် ကောင်းကင်သစ်နှင့် မြီကြီးသစ်ကို ငါ မြင်ရ၏။ ယခင်က ကောင်းကင်နှင့် မြီကြီးကား ပျောက်ကွယ်လားလေယာ။ ပင်လယ်သမုဒ္ဒရာသည်လည်း မဟိယာ။

² ဘုရားသခင်၏ သန့်ယှင်းသောမြို့တည်းဟူသော ယေရုဆလင်မြို့သစ်ကို ငါ မြင်၏။ ထိုမြို့သည် သတို့သားအဖို့ လှပစွာ ဆင်ယင်ထားသည့် သတို့သမီးကဲ့သို့ အဆင်သင့် ပျင်ဆင်လျက်၊ ဘုရားသခင်ထံတော် ကောင်းကင်ဘုံမှ ဆင်းသက်လာသည်ကို ငါမြင်ရ၏။

³ ငါသည် ပလ္လင်တော်မှ ကျယ်လောင်သော အသံတစ်သံကို ကြားရ၏။ ထိုအသံကား “အဂုအခါ ဘုရားသခင်သည် လူသားရို့၌ ကိန်းဝပ်တော်မူယာ။ ကိုယ်တော်သည် သူရို့နှင့်အတူ ကိန်းဝပ်တော်မူလိမ့်မည်။ ထိုသူရို့သည် ကိုယ်တော်၏လူတို့ ဖြစ်ကြလိမ့်မည်။ ဘုရားသခင် ကိုယ်တော်တိုင်ပင်လျှင် သူရို့နှင့်အတူ ဟိန်နိန်တော်မူပြီး သူရို့၏ဘုရားဖြစ်လိမ့်မည်။

⁴ ကိုယ်တော်သည် သူရို့၏ မျက်ရည်ဟိသမျှကို သုတ်တော်မူလိမ့်မည်။ နောက်တဖန် သီဆုံးခြင်း၊ ဝမ်းနည်းပူဆွဲခြင်း၊ ငိုကြွေးခြင်းနှင့် နာကျင်ခြင်းများသည် မဟိရ။ ရှိဖြစ်ဖူးသော အရာများသည် ပျောက်ကွယ်လားယာ” ဟုဆို၏။

5 ပလ္လင်တော်ထက်တွင် စံတော်မူသော အသျှင်က “အဂုအခါ၌ ခပ်သိမ်းသော အရာများကို ငါ အသစ်ဖန်ဆင်းယာ” ဟု မိန့်တော်မူ၏။ ကိုယ်တော်က “ဤစကားများသည် သစ္စာ စကား၊ ဟုတ်မှန်သော စကားဖြစ်၏။ ရိုးမှတ်၍ ထားလော့” ဟု ငါအား မိန့်တော်မူ၏။

6 ထို့နောက် ကိုယ်တော်က “အမှုပြီးယာ။ ငါသည် အာလဖနှင့် ဩမေဃဖြစ်ပြီး အစနှင့် အဆုံးလည်းဖြစ်၏။ ရီငတ်သောသူအား အသက်စမ်းရီကို အဖိုးအခ မပီးရဘဲ သောက်ရသောအခွင့်ကို ငါပီးမည်။

7 အောင်မြင်သော သူသည် ဤကောင်းကြီး မင်္ဂလာအားလုံးကို ခံစားရလိမ့်မည်။ ငါသည် သူရို့၏ဘုရားဖြစ်မည်။ သူရို့သည်လည်း ငါ၏ သားသမီးတို့ ဖြစ်လိမ့်မည်။

8 သို့ရာတွင် ကြောက်တတ်သောသူ၊ မယုံကြည်သောသူ၊ စက်ဆုပ်ရွံ့ဖွယ်ကောင်းသောသူ၊ လူ့အသက်ကို သတ်သောသူ၊ အကျင့်ပျက်သောသူ၊ ပြုစားတတ်သောသူ၊ ရုပ်တုကိုးကွယ်သောသူရို့နှင့် လိမ်လည်ပြောဆိုသော သူရို့သည် ကန်နှင့်ရောသော မီးအိုင်ထဲ၌ ကျရကြလိမ့်မည်။ ဤကား ဒုတိယသီဆုံးခြင်း ဖြစ်သတည်း” ဟု မိန့်တော်မူ၏။

ယေရုဆလင်မြို့သစ်

9 ထို့နောက် နောက်ဆုံးသော ဘေးဒဏ်ခုနစ်ပါးနှင့် ပြည့်သော ခွက်ဖလား ခုနစ်လုံးကို ကိုင်ထားသည့် ကောင်းကင်တမန် ခုနစ်ပါးအနက် တစ်ပါးသည် ငါ့ပါး

သို့ လာ၍ “လာကတ်။ သိုးသူငယ်တော်၏ မယားတည်း
ဟူသော မင်္ဂလာဆောင်သတို့သမီးကို သင့်အား ငါပြမည်”
ဟု ဆို၏။

10 ကောင်းကင်တမန်သည် ငါ့ကို ဝိညာဉ်တော်အားဖြင့်
အလွန်မြင့်သော တောင်ထိပ် တစ်ခုထက်သို့ ခေါ်ဆောင်
လားပြီးလျှင် ဘုရားသခင်စံတော်မူရာ ကောင်းကင်ဘုံမှ
သန့်ယှင်းသော ယေရုဆလင်မြို့သည် ဆင်းသက်လာ
သည်ကို ပြ၏။

11 ထိုမြို့သည် ဘုရားသခင်၏ ဘုန်းတော် နှင့်
ထွန်းတောက်၍ သလင်းကျောက် သဖွယ် ကြည်လင်
သည့် နဂါးသွဲ့ကျောက်မျက်ကဲ့သို့ အရောင်အဝါတောက်ပ
လျက် ဟိ၏။

12 ထိုမြို့တွင် တန်းခါးပေါက် တစ်ဆယ့်နှစ်ပေါက်
နှင့် မြင့်မားသော မြို့ရိုးကြီး ဟိ၏။ ထိုတန်းခါးပေါက်
များ၌ ကောင်းကင်တမန် တစ်ဆယ့်နှစ်ပါး စောင့်ရှောက်
ထား၏။ ဣသရေလအမျိုး တစ်ဆယ့်နှစ်ပါးရှိ၏ နာမည်
များကို တံခါးများထက်၌ ရီးထားလျက် ဟိ၏။

13 အရှုံဖက်တွင် တန်းခါးပေါက်သုံးပေါက်၊ မြောက်
ဖက်တွင် သုံးပေါက်၊ တောင်ဖက်တွင် သုံးပေါက်၊
အနောက်ဖက်တွင် သုံးပေါက် ဟိ၏။

14 မြို့ရိုးတွင် အုတ်မြစ်ကျောက် တစ်ဆယ့်နှစ်ခုဟိ၏။
ထိုကျောက်များအထက်တွင် သိုးသူငယ်တော်၏ တမန်
တော် တစ်ဆယ့်နှစ်ပါးရှိ၏ နာမည်များကို ရီးထားလျက်

ဟိ၏။

¹⁵ ငါနှင့်စကားပြောသော ကောင်းကင်တမန်တွင် မြို့ကို လည်းကောင်း၊ မြို့တန်းခါးများကိုလည်းကောင်း၊ မြို့ရိုးကိုလည်းကောင်း တိုင်းထွာရန် ရွှံ့ကျူလုံး တစ်ချောင်း ဟိ၏။

¹⁶ ထိုမြို့သည် စတုရန်း ပုံဟိပြီး အလျားနှင့် အနံ တူညီ၏။ ကောင်းကင်တမန်သည် ကျူလုံးဖြင့် မြို့ကို တိုင်းထွာရာ အလျား၊ အနံ၊ အမြင့်မှာ ၁,၅၀၀ မိုင်စီ ဟိကြောင်းကို တွေ့ရ၏။

¹⁷ ထို့နောက် မြို့ရိုးကို တိုင်းထွာရာ ကောင်းကင်တမန် အသုံးပြုသည့် လူရို့၏ အတိုင်းအထွာအရ၊ အမြင့်* ၂၁၆ ပေ ဟိသတည်း။†

¹⁸ မြို့ရိုးကို နဂါးသွဲ့ကျောက်ဖြင့် ဆောက်လုပ်ထား၏။ မြို့သည်လည်း ဖန်ရောင်တောက်နိန်သော ရွှံ့စင်ဖြစ်၏။

¹⁹ မြို့ရိုးအုတ်မြစ်များကို ကျောက်မျက်ရတနာ အမျိုးမျိုးဖြင့် ခြယ်လှယ်ထား၏။ ပထမအုတ်မြစ်၌ နဂါးသွဲ့ကျောက်၊ ဒုတိယအုတ်မြစ်၌ နီလာ၊ တတိယအုတ်မြစ်၌ မဟူရာ၊ စတုတ္ထအုတ်မြစ်၌ မြ၊

²⁰ ပဉ္စမအုတ်မြစ်၌ ကြောင်၊ ဆဋ္ဌမအုတ်မြစ်၌ ပတ္တမြား၊ သတ္တမအုတ်မြစ်၌ ဂေါဒန်ကျောက်၊ အဋ္ဌမအုတ်မြစ်၌ မျက်ရုံ၊ နဝမအုတ်မြစ်၌ ဥဿဖရား၊ ဒဿအုတ်မြစ်၌

* 21:17 အမြင့်၊ သို့မဟုတ် အထူ။ † 21:17 အခန်းငယ် ၁၆ နှင့် ၁၇ တွင် ဟောလသာဘာသာအားဖြင့် “၁၂,၀၀၀ ဖာလုံ” နှင့် “၁၄၄ တောင်” ဟူ၍ အထောက်အထားပြသော သင်္ကေတအဖြစ် ပါဟိ၏။

မဟူရာစိမ်း၊ ဧကဒသမအုတ်မြစ်၌ စိမ်းပြာကျောက်၊
ဒွါဒသမအုတ်မြစ်၌ ဂေါ်မိတ် ဖြစ်သတည်း။

21 မြို့တန်းခါး တစ်ခုလျှင် ပုလဲတစ်လုံးဖြင့် ပြုလုပ်
ထားသောကြောင့် မြို့တံခါးတစ်ဆယ့်နှစ်ခုရှိသည် ပုလဲ
တစ်ဆယ့်နှစ်လုံး ဖြစ်ကြ၏။ မြို့၏လမ်းရှိ ကိုလည်း
ကြည်လင်သည့် ဖန်ကဲ့သို့ ရှိစင်ဖြင့် ပြုလုပ်ထားလေ၏။

22 ထိုမြို့တော်ထဲတွင် ဗိမာန်တော်ကို ငါမတို့ရ။
အကြောင်းမူကား ထိုမြို့၏ ဗိမာန်တော်သည် အနန္တ
တန်ခိုးသျှင် ဘုရားသခင်နှင့် သိုးသူငယ်တိပင် ဖြစ်
သောကြောင့်တည်း။

23 ဘုရားသခင်၏ ဘုန်းတန်ခိုးတော်သည် ထိုမြို့၌
ထွန်းလင်း၍ သိုးသူငယ်တော်သည် ထိုမြို့၏ဆီမီး
ဖြစ်သဖြင့် ထိုမြို့သည် နီ၏ အလင်းရောင်၊ လ၏
အလင်းရောင်ကို မလို။

24 လူမျိုးတကာရှိသည် ထိုမြို့၏ အလင်းရောင်ကို
အမှီပြု၍ လားလာကြလိမ့်မည်။ မြို့ကြီးထက်၌ဟံသော
သျှင်ဘုရင်ရှိသည်လည်း မိမိရှိ၏ ဘုန်းစည်းစိမ်ဥစ္စာများ
ကို ထိုမြို့သို့ ယူဆောင်လာကြလိမ့်မည်။

25 မြို့တန်းခါးများကို တစ်နိလုံး ဖွင့်ထားလိမ့်မည်။
ထိုမြို့၌ ညအချိန် မဟိသဖြင့် မြို့တန်းခါးများကို ဇာ
ခါ၌မျှ ပိတ်ထားလိမ့်မည် မဟုတ်။

26 လူမျိုးတကာရှိသည် မိမိရှိ၏ ဘုန်းအသရီနှင့်
စည်းစိမ်ဥစ္စာများကို ထိုမြို့သို့ ယူဆောင်လာကြလိမ့်မည်။

27 သို့ရာတွင် မစင်ကြယ်သည့်ဇာအရာမျှ ထိုမြို့တွင်း သို့ ဝင်ရလိမ့်မည် မဟုတ်။ စက်ဆုပ်ရွံ့ဖွယ်ကောင်းသော အမှုကို ပြုသောသူ၊ လိမ်လည်ပြောဆိုသောသူ မှန်သမျှသည်လည်း ဝင်ခွင့် ရလိမ့်မည် မဟုတ်။ သိုး သူငယ်တော်၏ အသက်စာစောင် စာရင်း၌ ပါသော သူများသာလျှင် ဝင်ရကြလိမ့်မည်။

22

1 ထို့နောက် ကောင်းကင်တမန်သည် ငါ့အား အသက်ရီစီးရာ မြစ်ကိုလည်း ပြ၏။ ထိုမြစ်သည် သလင်းကျောက်ကဲ့သို့ ကြည်လင်တောက်ပကာ ဘုရားသခင်နှင့် သိုးသူငယ်တော်၏ပလ္လင်မှ ထွက်၍၊

2 မြို့တော်၏အလယ် လမ်းမ တ လျှောက် စီးဆင်း လေ၏။ ထို မြစ်၏တစ်ဖက် စီ၌ အသီးတစ်ဆယ့်နှစ်မျိုးသီး၍ မိမိအသီးကို လ စဉ်ပီး တတ်သည့် အသက်ပင်ဟိ၏။ ထိုအပင်၏ အရွက်များသည် လူမျိုးတကာ ရို့၏ အနာ ရောဂါ များ ကို ပျောက်ကင်း စီ ရန် အတွက် ဖြစ်၏။

3 ထိုမြို့တွင် ဘုရားသခင်၏ ကျိန်ခြင်းကို ခံရသည့် အရာဟူ၍ မတို့ရ။

ဘုရားသခင်နှင့် သိုးသူငယ်တော်၏ ပလ္လင်တော်သည် ထိုမြို့တွင် ဟိ၍ ကိုယ်တော်၏ အစီခံရုံသည် ကိုယ်တော်ကို ဝတ်ပြုကိုးကွယ်ကြလိမ့်မည်။

⁴ သူရို့သည် ကိုယ်တော်၏ မျက်နှာတော်ကို ဖူးမြင်ရကြ လိမ့်မည်။ နာမတော်ကို သူရို့၏ နဖူးတွင် ရိုးထားလျက် ဟိလိမ့်မည်။

⁵ ထိုမြို့ တွင် ည မ ဟိ ရ။ သူ ရို့ သည် ဆီမီး၏အလင်းရောင်၊ နီ၏အလင်းရောင်ကို လိုအပ်ကြ လိမ့်မည် မဟုတ်။ အကြောင်းမူကား အသျှင်ဘုရားသခင် သည် သူရို့အား အလင်းကို ပီးတော်မူမည်ဖြစ်၍၊ သူရို့ သည် ထာဝရ အုပ်စိုးရကြလိမ့်မည်။

ယေသျှု ကြွလာတော်မူခြင်း

⁶ ထို့နောက် ကောင်းကင်တမန်က ငါ့အား “ဤစကား သည် သစ္စာစကား၊ ဟုတ်မှန်သော စကားဖြစ်၏။ ပရောဖက်ရို့အား ဝိညာဉ်တော်နှင့် ပြည့်ဝစီတော်မူသော အသျှင် ဘုရားသခင်သည် မကြာမီဖြစ်ပျက်ရမည့် အမှုအရာများ ကို မိမိ၏အခိုင်းအစီရို့အား ဖော်ပြရန် ကောင်းကင်တမန် ကို စီစဉ်တော်မူယာ” ဟု ပြော၏။

⁷ ယေသျှုကလည်း “နားထောင်လော့၊ ငါသည် မကြာ မီ ကြွလာမည်။ ဤကျမ်းစောင်တွင် ပါဟိသည့် ပရောဖက်ပြုထားသော စကားများကို လိုက်လျှောက်သော သူ ရို့သည် မင်္ဂလာဟိ၏” ဟု မိန့်တော်မူ၏။

⁸ ဤအမှုအရာများကို တို့မြင်ကြားသိရသောသူကား ငါ ယောဟန်ပင် ဖြစ်၏။ ထိုအရာများကို တို့မြင်ကြားသိရပြီး သောအခါ ငါသည် ကောင်းကင်တမန်အား ကိုးကွယ်ခြင်း ငှာ သူ၏ခြံရင်း၌ ပျပ်ဝပ်လိုက်၏။

9 ကောင်းကင်တမန်က “ဤသို့ မလုပ်ကေ။ ငါသည် သင်နှင့်တကွ သင်၏ညီအစ်ကို ပရောဖက်တို့နှင့် ဤ ကျမ်းစောင်၏ စကားကို လိုက်နာစောင့်ထိန်းသောသူရှိ၏ လုပ်ဖော်ဆောင်ဖက် အစီခံတစ်ယောက်သာလျှင် ဖြစ်၏။ ဘုရားသခင်ကိုသာလျှင် ကိုးကွယ်လော့” ဟု ဆို၏။

10 ထို့နောက် ကောင်းကင်တမန်က “ဤ အမှုအရာ အားလုံးဖြစ်ပျက်မည့် အချိန်သည် နီးကပ်လာယာ ဖြစ်သောကြောင့် ဤကျမ်းစောင်တွင် ဖော်ပြပါဟံသော ပရောဖက်စကားများကို တံဆိပ်ခတ်၍ မထားကေ။

11 မတရားသောအမှုကို ပြုသောသူသည် ပြုမြဲ ပြုပါစီ။ ညစ်ညမ်းသောသူသည် ဆက်လက်၍ ညစ်ညမ်းလျက် နိန်ပါစီ။ ဖြောင့်မတ်သောသူသည် ဆက်လက်၍ ဖြောင့်မတ်ပါစီ။ သန့်ယှင်းသောသူသည် ဆက်လက်၍ သန့်ယှင်းပါစီ” ဟု ငါ့အား ဆို၏။

12 ယေသျှုက “နားထောင်လော့၊ မကြာမီ ငါ ကြွလာမည်။ ငါသည် အကျိုးအပြစ်ကို ယူဆောင်လာသည်ဖြစ်၍ လူအသီးသီးရှိအား မိမိရှိ၏ အကျင့်အလျောက် ပီးအပ်ရမည်။

13 ငါသည် အာလဖနှင့် ဩမေဃဖြစ်ပြီး အစနှင့်အဆုံး ဖြစ်၏” ဟု မိန့်တော်မူ၏။

14 မိမိရှိ၏အဝတ်ကို သန့်ယှင်းအောင် လျှော်ဖွတ်သော သူရှိသည် မင်္ဂလာဟံ ကြ၏။ ထိုသူရှိသည် အသက်

ပင်၏ အသီးကို စားသုံးနိုင်သောအခွင့်နှင့် မြို့တန်းခါးဖြင့် မြို့တွင်းသို့ ဝင်နိုင်ရသောအခွင့်ကိုလည်း ရကြလိမ့်မည်။

¹⁵ သို့ရာတွင် ခွီးတိ၊* ပြုစားတတ်သော သူတို့၊ ကာမဂုဏ်လိုက်စားသော သူတို့၊ လူ့အသက်ကို သတ်သောသူတို့၊ ရုပ်တုကိုးကွယ်သော သူတို့နှင့် လိမ်လည်ပြောဆို၍ ကျင့်ကြံသော သူရို့သည် မြို့ပြင်တွင် နိန်ရကြလိမ့်မည်။

¹⁶ “ငါ ယေ သျှသည် အသင်းတော်များ၌ ဟံကြသော သင်ရို့အား ဤအကြောင်းအရာများကို ကြေညာရန် ငါ၏ကောင်းကင်တမန်ကို စီစဉ်လိုက်၏။ ငါသည် ဒါဝိဒ်၏အနွယ်ဝင်ဖြစ်၏။ တောက်ပသော မိုးသောက်ကြယ်လည်း ဖြစ်၏။”

¹⁷ ဝိညာဉ် တော် နှင့် မင်္ဂလာဆောင်သတို့သမီး က “ကြွလာတော်မူပါ” ဟု ဆိုကြ၏။

ဤရာကို ကြားသောသူမှန်သမျှသည်လည်း “ကြွလာတော်မူပါ” ဟု ဆိုကတ်ပါစီ။

ရီငတ်သောသူသည် လာပါစီ။ အသက်ရိုကို အလိုဟိသောသူသည် အခမဲ့ ယူပါစီ။

နိဂုံး

¹⁸ ဤစာစောင်ပါ ဗျာဒိတ်တော်များကို ကြားရသောသူ အပေါင်းရို့အား ငါ ယောဟန်သည် ကြပ်တည်းစွာ သ

* 22:15 ခွီးတိ၊ ဟူသော စကားသည် ခိုင်းနှိုင်းထားခြင်းသာ ဖြစ်သည်။ အချို့သော ကျမ်းများတွင် မှောက်လှန်သောသူ၊ သို့မဟုတ် မသန့်ယှင်းသောသူ၊ ဟူ၍ ပြန်ဆိုထားကြသည်။

တံပီးလိုက်၏။ ဇာသူမဆို ဤစာအုပ်တွင် တစ်စုံတစ်ရာ ထပ်လောင်း၍ ဖြည့်စွက်ပါက ဘုရားသခင်သည် ထိုသူ၌ ဤစာစောင်တွင် ဖော်ပြသော ဘေးဒဏ်များကို ကျရောက်စီတော်မူလိမ့်မည်။

¹⁹ ဇာသူမဆို ဤစာစောင်တွင် ပရောဖက်ပြုထားသော စကားများမှ တစ်စုံတစ်ရာကို နုတ်ပယ်ပါက ဘုရားသခင်သည် ဤစာစောင်၌ ဖော်ပြသော အသက်ပင်၏အသီးကို စားသုံးခွင့်နှင့် မြင့်မြတ်သန့်ယှဉ်သော မြို့တော်သို့ ဝင်စားခွင့်ကို ထိုသူပါးမှ နုတ်ပယ်တော်မူလိမ့်မည်။

²⁰ ဤအကြောင်းအရာများကို သက်သီခံတော်မူသော အသျှင်က “မုချ၊ ငါသည် မကြာခင် ကြွလာမည်” ဟု မိန့်တော်မူ၏။

ဤအတိုင်းပင် ဖြစ်ပါစီသောဝံ။ အသျှင် ယေသျှု ကြွလာတော်မူပါ။

²¹ အသျှင်ယေသျှု၏ ကျေးဇူးတော်ကို လူတိုင်း[†] ခံစားရကြပါစီသောဝံ။ အာမင်။

[†] 22:21 လူတိုင်း၊ အချို့သော မူရင်းလက်ရှိကျမ်းများတွင် ဘုရားသခင်၏ လူများ၊ ဟူ၍ လည်းကောင်း၊ အခြားတွင် ဘုရားသခင်၏ လူအားလုံးရို့၊ ဟူ၍ လည်းကောင်း ပါဟိသည်။

ဓမ္မသစ်ကျမ်း ရခိုင်ဘာသာစကား

Rakhine: ဓမ္မသစ်ကျမ်း ရခိုင်ဘာသာစကား (Bible)

copyright © 2025 The Word for the World International

Language: ရခိုင် (Rakhine)

Contributor: The Word for the World International

ရခိုင် ဓမ္မသစ်ကျမ်း

The New Testament in Rakhine Language

The Word for the World

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

- You include the above copyright and source information.

- If you make any changes to the text, you must indicate that you did so in a way that makes it clear that the original licensor is not necessarily endorsing your changes.

- If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-06-27

PDF generated using Haiola and XeLaTeX on 27 Jun 2025 from source files dated 27 Jun 2025

51b0ff5f-817a-5607-b453-b9df7b3155f2